

萬 有 文 庫

第 二 集 七 百 種

王 雲 五 主 編

明 詩 紀 事

(二)

陳 田 輯

商 務 印 書 館 發 行

明詩紀事

(二)

陳田輯

國學基本叢書

# 明詩紀事卷四

## 甲籤

宋濂三首

濂字景濂。浦江人。元末以翰林院編修徵。不就。太祖取婺州。召見濂。還金陵。徵爲江南儒學提舉。授太子經。改起居注。洪武初。充元史總裁官。除翰林學士。降編修。遷國子司業。謫安遠知縣。召爲禮部主事。遷贊善大夫。擢侍講學士。進學士承旨。致仕歸。以孫慎得罪。安置茂州。道卒。正德中。追諡文憲。有潛溪、鑾坡、芝園、蘿山、朝天諸集七十五卷。

王世貞藝苑卮言。高帝嘗謂宋濂。浙東人才。惟卿與王禕耳。才思之雄。卿不如禕。學問之博。禕不如卿。又嘗與劉誠意論文。誠意謂宋濂第一。其次臣不敢多讓。

徐泰詩談。宋景濂王子充。詩亦純雅。以文名。

沈士謙明良錄略。濂嘗奉制咏鷹。令七舉足卽成。有自古戒禽荒之言。

詩藏。宋承旨不喜作六朝語。而思春曲十韻。如南浦沈書傳素鯉。東風將恨與新鶯。物華半老胭脂苑。春霧輕籠翡翠城。因彈別鶴心如翦。爲妬文鸞繡嬾成。陽臺樹密朝霞迴。巫峽潮迴暮渚平等句。特精工流麗。

田按景濂自幼嗜學。家貧無書。每假藏書家。手自筆錄。天大寒。硯冰堅。手指不能屈伸。弗之怠。錄畢走送。不敢逾期約。又常入

青蘿山不下書屋者屢年。得鄭氏所畜書數萬卷。無不盡閱。閱無不盡記。師事吳濶。黃文獻。柳待制。皆元代著宿。學既刻苦。授受復有淵源。故所著文章。雄峙一代。遭時遇主。司制作之柄。爲開國文臣之首。蠻夷朝貢。數問宋先生安否。日本得潛溪集。雕板國中。當其恩遇優濃。醉學士之詩歌甘露。百歲衣之賞賜。論者傳爲盛事。暨乎安置茂州。佗係於荒江野寺。投繯以歿。方希古祭文云。公之厭斯世而不居。甘遠迹於峨眉。蓋將用重華於九疑。暗屈子於江濱。吁可悲也。集中小詩。猶是元習。長篇大作。往往規撫退之時。亦失之冗沓。蓋兼才爲難。自唐以來。如韓退之。蘇長公。世不多見。正不必美備難具也。

### 鳳陽府新鑄大鐘頌并序

皇帝既正大統。建都江表。德綏威讐。萬邦咸臣。用羣臣奏。臨濠爲龍飛之地。賜名曰鳳陽。南北民大和會。百族錯居。動十萬數。然而物大而盛。不假器齊一之。無以嚴昏旦之禁。乃詔江陰侯吳良。監鑄大鐘。以定衆志。以裨治化。侯既受詔。遣使者至富春山中。徵金工何成。諭以天子明命。成卽日帥其屬十六人。以從。相地鳳陽城地三里。搏泥成範。畫其銑角衡之度。侈弇爲良。篆帶以方。候其燥剛。始穿冶一十。又三鍊青赤銅六萬五千斤。筮以洪武乙卯冬十一月己巳蒞事。厥明侯具法服。以牛一羊一豕一。祝告先冶之神。禮既成。棗籥咸興。鼓動風氣。炎光赫曦。上貫霄漢。絳液既澄。氣憤雲洩。循竇而入。肅肅有聲。陽施陰凝。勁質斯具。越二日辛未。乃發。復取牲血塗其罅隙。以厭除不祥。鐘高十六尺。有五寸。厚六寸。徑十尺。有五寸。圍三十四尺。有奇。混融其輪圓。煒燁其容輝。信技殫於人巧。妙奪於神功者也。於是營構層臺。副以篋簾。聚千夫之力。鉅絙而登之。一杵之

撞隱隱闐闐雷旋電奔。震撼太虛。遐邇聞者靡不聳愕。會濂扈從青宮。幸鳳陽。親觀盛美。侯遂請濂爲之頌。濂聞先王之世。金部有七。黃鐘乃樂之所自出。而景鐘又爲黃鐘之本。所謂景鐘大鐘也。其受至於九斛而止。律呂由是而應。陰陽由是而均。夫豈細故也哉。秦漢以來。寢失古法。小鐘或數尺。大鐘或容千石。皆不本於律度。今我熙朝。稽古右文。定於中制。宣導天地。孚洽神人。中和所致。嘉瑞必協。增拓化原。亦於是乎有賴。非特發揚蹈厲。以鳴國家之盛。侯之有請。不敢固辭。頌曰。

維天穆清。鼓以雷霆。適昭天聲。百物以生。維帝濬哲。法天之烈。大鏞斯揭。元氣噴洩。眷于濠梁。真龍飛翔。乘陰御陽。洗濯八荒。神物攸起。是爲帝里。從者如雨。於焉萃止。物大而豐。往來憧憧。節之以鏞。罔敢弗恭。乃飭臯氏。乃具鑪錘。乃烹乃鬻。化金爲水。赤氣夜明。如日之升。流亟而潏。入竇有聲。彬彬斐斐。功同神鬼。不鉏不鋸。輪圓順軌。旣啓其型。敢愛斯牲。塗釁禮成。榮光如星。千夫齊力。臺構懸植。交扛孔奭。載考載擊。宅兮困困。觸兮賁賁。摩乾盪坤。以警斯昏。發摠靈氣。昭融品彙。物無疵癘。年穀攸遂。博碩而龐。聲與天通。拓美集祥。熏于家邦。惟皇建極。福之敷錫。制器有赫。式和民則。稽樂之原。鐘實爲先。律呂以宣。功垂不刊。小臣作頌。有美無諷。爰咨于衆。是傳是誦。

送方生還甯海井序

洪武丙辰。余官禁林。甯海方生。以文爲贊。一覽輒奇之。館竄左右。與其談。經歷三時。乃去。明年丁巳。子蒙恩。謝事還浦陽。生復執經來侍。凡理學淵源之統。人文絕續之寄。盛衰幾微之載。名物度數之變。無不肆言之。離析於一絲。而會歸於大通。生精敏絕倫。每發其端。卽能推而底于極。本末兼舉。細大弗遺。其於論著。文義森蔚。千變萬態。不主故常。而辭意濯然常新。細占其進修之功。日有異而月不同。僅越四春秋而已。英發光著如斯。使後四春秋。則其所至。又不知爲何如。以近代之歐陽少師。蘇長公輩。姑置未論。自餘諸子。與之角逐於文藝之場。不識孰爲後而孰爲先也。予今爲此說。人必疑予之過情。後二十餘年。當信其爲知言。而稱許者非過也。庚申之秋。生以不見大母久。將歸省焉。予深惜其去。爲賦是詩。

昔在詞垣時。英材常駿奔。水碧與金膏。價重駭見聞。終然無根蒂。斂散空中雲。方生海上來。玉粟而春溫。袖攜絳繡書。面帶黼黻紋。揖遜入禮域。陳義凌秋旻。同餐太倉米。共勘典與墳。潛將索幽邃。穹欲攀嶙峋。蹈雪忽言別。涉險濤江津。梅花似相憐。沿途慰孤羣。湛恩來九天。憫我髮如銀。特勅還故山。許與煙霞親。生聞抱經來。處此寂寞濱。莽蒼叩太始。溟滓窮無垠。宇宙所管攝。載籍所敷陳。鉅細鉤鉗之。若大樂建均。律呂按高下。宮商肅君臣。嚶和免滄漚。疊奏歸繹純。桑濮俟揮斥。淫哇竟何存。黃鐘壓瓦缶。庭燎滅荒燐。似茲稽古力。可敵龜定勳。濡毫寫雄顯。勢欲移峨眉。漏洩混沌竅。出入造化神。變幻波起伏。清溫玉璘珣。

書抽神奇祕。不墮梟腐廬。所以日出之。逾見光景新。山鬼當灑泣。湘靈且逡巡。振古著作家。後先胡續紛。豈知萬牛毛。難媲一角麟。古今二千載。有如星在辰。豈意荒礫中。獲此席上珍。予生髮未燥。立言鄙河汾。結交一世士。暮齒越七旬。妍蚩與楛良。入目無留痕。自非病狂易。顛倒甲與瑾。甯因一學徒。諛辭浪云云。大言心不忤。祇爲所見真。生今有行期。序飲松竹根。笑摘黃金花。起泛青瑤尊。酒酣雙耳熱。劇論如抽縉。豈無贈別言。有意須當遵。真儒在用世。甯能滯彌文。文繁必喪質。適中乃彬彬。有虞號多士。九官展經綸。惟時亮天工。外夷悉來賓。不聞有著書。鼓盪摩乾坤。生乃周容刀。生乃魯瑱璠。道貴器乃貴。何須事空言。孳孳務踐行。勿負七尺身。敬義以爲衣。忠信以爲冠。慈仁以爲佩。廉智以爲鑿。特立睨千古。萬象昭無昏。此意竟誰知。爲爾言諄諄。無徒謂強聒。一一書諸紳。

田按此詩有作贈鄭楷者。蓋遵革除之禁也。牧齋謂子內殿見潛溪文粹。孝孺氏名皆用墨塗乙。此可知矣。希古謝太史公書云。近有人說執事賜教之言。以歐陽氏蘇氏以下見期爲過。某聞之不應而笑。笑而默然。竟不問其主名。流俗人省事者少。蓋謂此詩序也。又云。某妄志殆未可遽以辭盡。其大者將宏廓敷揚其所傳於世。俾人得樂生達理。其次亦將整齊周公孔子之成法。爲來今準。下此猶當著一書。總所蘊蓄。補藝文之遺缺。續斯道於無極。希古自負如此。不僅以歐蘇文章自居矣。楷亦潛溪弟子。潛溪行狀。卽楷筆也。

### 送錢允一還天台詩并序

皇帝卽位之二年。大將軍帥師取燕都。西北州郡。次第皆平。越明年冬。上將郊祀天地。大告武成。

念開國諸勞烈。錫以鐵券。以申帶礪之誓。下禮官議其制度。近臣奏言。唐和陵時。嘗賜錢武肅王。十五世孫尚德。實寶藏之。上遣使者。卽其家訪焉。尚德奉詔。櫝券及五王遺像上之。上御外朝觀之。勅省臣宴于儀曹。已而尚德思東歸。命還其券與像。以禮敦遣。錢氏寶有此券。已五百載。宋淳化中。杭守臣嘗連玉冊進之。元豐五年。又進之。宋季兵亂。券沈官渭水中。五十六年。元至順二年。漁人獲之。售於尚德之父世珪。迄今而尚德又進之。是嘗三登天子之庭。其間或顯或晦。雖若類靈物詞護。亦其子孫之多賢。能保守而弗墜也。尚德字允一。天台人。

大明天子開鴻基。雄兵百萬皆虎貔。東征西討十餘載。變化不異雲雷隨。功成治定四海一。剖券分符恩澤施。前王遺制久已泯。錢氏世寶猶無虧。天使持書往徵取。有翁囊負來丹墀。鞠躬俯伏再拜起。旋解韜藉重重披。精鍊煨成大逾瓦。中突傍偃形如箕。又如元顛剖其半。一片元玉誰瑕疵。鑿窟填金文絢爛。筆畫方整蟠蛟螭。誓辭三百有餘字。河山帶礪無嫌疑。繼陳五王有真像。彷彿猶是唐冠衣。腰圍白玉金作鈔。吻角左右分之髭。重瞳迴光屢下照。笑語逾覺天顏怡。使勅大官給珍饌。上尊法酒澆瓊卮。憶初唐綱旣解紐。恣舞鱣鱓號狐狸。斗牛王氣果凌厲。豫章占術元非欺。八都建卒猛如虎。指揮不異驅嬰兒。羅平鳥圖騁怪幻。內黃外白跳狂癡。龍劍一揮赴水死。大助星日同昭垂。因茲錫券代牲敵。彭城開府如三司。衣錦城空嘉樹老。共守尙有三樓危。淳化元豐兩進入。龍光曾受天王知。炎精訖錄九鼎沸。一旦失去官



河麩。豈伊神物欲變化。相逐雷劍爲龍飛。孰知漁者一舉網。所得非鼈還非龜。終然鬼物所訶謔。不使光彩埋荒陂。泥塗沙礫幸免累。寶玉大弓欣有歸。我知天意實有在。武肅弘烈何堪微。八州生靈數百萬。拔出水火行中達。子孫食報豈終極。政如稼穡隨年肥。高牙大纛入黃閣。金章鑿綬趨彤闈。不知堆床定幾笏。但見肘印懸累累。七世珥貂未足擬。一門三戟終前衰。沉翁文采爛五色。嗜古不管頭如絲。秦淮呼酒話離別。遠盼官舸如星馳。于時同雲羃四野。勢欲釀雪增寒威。行行若過表忠觀。好剔蒼蘚看殘碑。

朱璣金華詩錄。乾隆壬午。聖駕南巡台州。武肅王後裔臣錢文銓。奉鐵券至省。其同族嘉興在籍食俸刑部尙書臣錢陳羣。率同族衆恭呈御覽。皇上垂念前勳。御製歌詩一章。勸諸券。此所述。淳化元豐洪武三登庭者。不足多矣。俯閱前詩。仰維睿藻。謹記國典之隆。用章舊澤之遠。竊願武肅子孫世世勿忘也。金華府知府臣黃彬恭記。

### 答祿與權一首

與權字道夫。河南永甯人。元進士。由祕書監管句。歷河南北道廉訪使僉事。洪武初。用薦授秦府紀善。改御史。出爲廣西僉事。未之任。復留爲御史。擢翰林修撰。降典籍。進應奉。以年老致仕歸。有集十卷。

田按道夫其先蠻部人。有別號答祿者。子孫因以爲氏。明初流寓河南永甯。余觀道夫題咏。自署洛上人。則著籍永甯明矣。道夫集十卷。著錄於明史藝文志。及千頃堂書目。今罕傳本。史稱道夫博學強記。明初祀三皇建帝王廟。皆自道夫發之。余從宋文憲集附錄。得詩一首。以補明初詩家缺遺焉。

送宋承旨還金華

金華之山。巍乎莫測。乃在牛女之墟。天池之北。自昔初平牧羊處。至今靈氣鍾名德。聖人立極開太平。賢佐乃有宋先生。先生讀書逾萬卷。雄才獨擅文章名。至尊臨軒時顧問。皇子傳經當繡楹。漢室舊聞疏太傅。明庭今見桓五更。先生行年幾七十。新春詔許還鄉邑。誥詞御製煥奎文。子孫簪筆當朝立。先生種德非常倫。聖明天子優老臣。從茲一往三千春。高風長與初平鄰。

田按潛溪歸老時。中書舍人葉雷。朱芾。史靖可有送行詩。見於各家紀述。余檢孫賈西菴集。有送翰林宋先生致仕歸金華詩。多至二十五首。其云。門生日日待談經。獨向孫賈眼尙青。則西菴嘗及潛溪門也。其云。高麗日本朝王使。長向仙班問姓名。則外國貢使。數問宋先生起居事也。其云。東夷買得潛溪集。已向扶桑石上鐫。則日本得潛溪集。刻板國中事也。其云。祕府圖書。翻閱盡。卻從方士借丹經。則潛溪嘗爲道士。自號元真子。留心道籙也。其云。歸途跨得銀鞍馬。原是天閑小乘黃。則洪武九年。賜馬事也。其云。祖考榮封寵數優。君王親爲製詞頭。則致政時。詔加贈二代。誥辭皆太祖所親製也。其云。海內才名五十年。聖恩榮許晚歸田。金華父老如相問。曾是瀟湘第一仙。紅鞋金帶荔枝花。三品詞林內相家。歸去山中無箇事。瓦瓶春水自煎茶。蓋世文章未是雄。真純卓有古人風。賜金長是沽春酒。醉殺鄰家桑苧翁。鳳蕭龍飛御製文。人間未見墨花新。恩榮獨爲詞林重。親向宮門賜老臣。潛溪一生事業榮遇。綜括略盡。因錄道夫詩。附見於此。

朱芾三首

芾字孟辨。以字行。松江華亭人。洪武初。徵授翰林編修。改中書舍人。

松江府志。朱芾自號滄洲生。少從楊鐵崖遊。才思飄逸。工詞章。兼善翰墨。真草隸篆。清潤道勁。風度不凡。繪事亦擅。聲於時。太

顧御製集有和朱孟辨落花詩。朱謀聖畫史會要孟辨善山水白描人物。

夢蕉詩話洪武十年宋學士景濂乞骸骨歸華亭朱孟辨紀其事作詩送之其一曰天語丁寧出紫微特將文綺賜躬歸愛卿乘志如金石留取裁成百歲衣蓋瀕行聖祖諭曰卿事朕十九年忠誠可賞金石故有是賜卿今六十有八可待三十二年後以作百歲衣也其二曰楮蠶親頒當酒錢賜金不獨二疏賢想應心醉君王德慚愧長安市上眠既受文綺之賜復出寶鈔數十錠與之曰卿東歸當酒錢也其三曰城上春雲煖更飛念卿此地迹將稀臣身願作隨陽雁一度秋來一度歸聖祖一日攜景濂步午門西城上顧謂曰卿來此迹將稀矣可能再見否濂曰老臣身未就木當一歲一來也

田按此三詩文憲集附錄標目云契生中書舍人葉寧朱孟辨忝廁侍從躬觀皇上眷顧之隆謹記一時盛事賦絕句三首夢蕉詩話堯山堂外記僅屬之孟辨一人疏矣董穀碧里雜存云宋太史乞歸御製詩餞之云白下開樽話別離知君此後迹應稀濂續云臣身願作衡陽雁一度秋風一度歸據此則第三絕句又非孟辨詩矣詞亦小有異同余以爲此說蓋出附會終以潛溪集附錄爲得實也

### 寄張子政

野政老人隱者流清溪繞屋似愚溝自編蒲葉作素簡時瀉松花洗玉舟仲連未遽蹈東海孺子還復棲南州別來清事想不廢詩成應畫李營邱

### 爲志學聘君題惠麓秋晴圖

第二泉頭坐晚晴滿林松籟雜溪聲滌煩老去盧鴻乙謝俗歸來衛叔卿未必茶經隨火化擬尋茅屋待春耕臥遊畫裏遠清賞裊若他年石上烹

自題蘆洲聚雁圖

夜窗翦燭聽雨。偶閱叔升錢君所畫古木寒鴉小景。不覺技癢。因寫蘆洲聚雁以紀之。適友人黃德謙在坐。曰似瀟湘水雲景也。昔年過二妃廟。今復觀此圖。恍若重遊。但少苦竹叢深耳。予遂添叢篠於其間。殊有天趣。并賦詩一絕云。

夜窗聽雨話巴山。又入瀟湘水竹間。滿渚冥鴻誰得似。碧天飛去又飛還。

史靖可一首

靖可鄞縣人。中書舍人。

送宋學士

君王親爲計歸程。幾日攜家出鳳城。江上春來有風浪。扁舟好向裏河行。

靜志居詩話。潛溪之歸也。孝陵諭之云。大江春來風浪多。宜就裏河達於家。靖可送行詩。蓋賦以紀實也。

張唯一首

唯南陽人。洪武壬子舉人。授翰林院編修。終參政。

宋端儀立齋閒錄。洪武壬子簡會試士張唯等十八人。授編修等職。入文華堂。命濂爲之師。俾肄業。上問至堂中。取其文親評優劣。命光祿給酒饌。每食。皇太子親王迭爲之主。給冬夏衣。時賜白金鞍馬。

田按洪武四年開科取士。至六年。又當會試。詔命罷之。特選河南舉人張唯、王輝、李端、張翀、山東舉人王璉、張鳳、任敬、馬亮、陳

敏俱授編修。入禁中文華堂肄業。命太子贊善大夫宋濂、太子正字桂彥良等爲之師。嘗勅彥良曰：昔許魯齋諸生多爲宰輔，卿其勉之。濂等雖司啓迪，顧諸生皆帝所親教，不敢以師道自居。一日侍燕間，詢及肄業執進益。濂對曰：無如張唯者，備述其雋才，請錄爲弟子。帝笑而許之。諸生仕履可考者，翀字鳳舉，由編修出爲南陽教授。濂有斥贈其行，題字宗器。長山人嘗據御史廉察河南歸，奏對稱旨。帝謂近臣曰：文華堂諸生，如題等者，皆異日將相材也。亮字希孟，長清人。劉子高有題山東馬希孟。御史燕侍圖詩云：孟也問學真賢良，往昔徵入文華堂。承恩屢使江海上，反顧只憶庭闈傍。去秋官多來燕薊，自說遠離過三歲。愁心嫋嫋逐飛雲，驚夢時時問供饋。官至參政，見雙槐歲抄。

### 醉學士歌

天門白日懸高秋，五雲照耀三神洲。羣賢列坐紫清上，鳳迴玉輦瞻宸旒。翰林供奉紫綺裘，佩以明月珊瑚鉤。殿前奏賦冲斗牛，胸藏七澤吞九州。浩氣直上青天流，七寶珍床九華殿。大笑三時走飛電，金盤犀箸行八珍。大官勅賜瑤池宴，中使頻飛雙巨羅。葡萄露泛黃金波，口口龍光照肝膽。春紅散作朱顏酡，天香兩袖宮袍碧。頭上烏紗漸欹側，玉山兀兀涼風搖。銀海茫茫雪花白，重瞳一顧天爲低。奎章宸翰光陸離，羣仙起和紫芝曲。琅玕瓊玖皆生輝，請以寶函祕流彩。萬古清風灑雲海，酒酣拜舞玉階前。千載君臣慶良會。

田按醉學士歌事具首卷考功監丞華克勤詩云：內府官酒葡萄綠，黃帕擎來氣芬郁。詞林老臣被龍光，拜捧瑤巵形局縮。況當天威咫尺間，春紅頓覺生酡顏。醉來不知烏帽側，猶解披腹呈瓊玕。李白當年飲一斗，下筆玉堂皆袖手。才華何必分後先，竹帛垂名同不朽。給事中宋善詩云：御爐冉冉香煙起，殿閣氤氳五雲裏。聖王萬幾有清暇，特詔文人賦秋水。賦成奏獻天顏

歡。勅令光祿行金盤。珍羞羅列水陸具。黃封滿酌須令乾。玉堂學士金華客。白髮蕭騷雙頰赤。酒酣作賦氣豪雄。漢思清新更飄逸。老眼矍鑠醉不開。猶能拜舞趨階階。人生際遇有如此。絕勝蓮燭夜半從天回。秦府長史林溫詩云。黃閣秋高風日涼。西奎東壁昭文章。聖明天子萬幾暇。詔許儒士承清光。內官傳宣走絡繹。烏帽聯翩坐前席。大官賜饌薦珍羞。光祿行觴瀉瓊液。玉堂學士金華仙。醉酒拜舞君王前。天顏喜動笑模寫。揮洒宸翰如雲煙。臣濂再拜喜欲顛。臣有丹心赤如面。臣心忠赤臣獨知。臣面頰紅人共見。前綉後賦誇翰林。臣濂寵光冠古今。願持歸家遺孫子。百歲相傳同此心。太子正字桂彥良詩云。金華學士青雲客。氣吐虹霓成五色。才超藝苑邁古人。名動京師播殊域。天高氣爽秋澄鮮。聖主眷遇開瓊筵。勅令賜飲共爲樂。不減風流李謫仙。初筵秩秩未三爵。老臣已不勝杯杓。頭昏目眩步踉蹌。春風滿座霞光駁。龍顏一笑催賦詩。殿前醉墨猶淋漓。乃知貌醉心不醉。醉中自有神扶持。親題宸翰寫醉態。滂沛鴻恩驚絕代。明良際會古所罕。學士榮光煥千載。丈夫讀書多苦辛。恨不感遇乘風雲。況當混一太平日。大明下照皆陽春。長歌請贊醉學士。自古如公能幾人。翰林編修王璉詩云。金風撼撼吹瓊筵。寶鼎鼻鼻熏龍涎。光祿傳杯瑪瑙寒。珍羞奇味雙玉盤。聖主九重動顏色。青錢學士金門客。胸中耿耿羅星辰。氣隱虹霓鬢霜白。一飲再飲須盡觴。身軀欲側目茫茫。漸覺紅光生兩頰。晚霞爛爛明春雪。酒酣作賦楓陛前。揮毫藻思如流泉。歸來天街踏明月。回望祥雲滿金闕。賦醉學士歌者九人。方徵詩見後。惟給事中彭通。典籍孫賈。二詩無可考。孫有西菴集。亦不載此歌。

方徵一首

徵字可久。莆田人。洪武壬子舉人。授刑科給事中。兼齊王府錄事。改監察御史。出爲懷慶知府。以星變言事。謫沁陽縣丞。

田按洪武六年罷會試。選舉人之才俊者。入文華武英堂。可久應選入武英。授刑科給事中。兼齊王錄事。可久號爲敢言。有奏

讀二卷著錄於福建通志其謫沁陽縣丞有詩云行盡崎嶇到沁南淡煙疎雨溼征衫也知書奏生無計但得思君死亦甘風  
土秋來寒凜凜雲山北向石巉巖聖恩若許歸田去八百株桑一草菴

### 醉學士歌

詞臣獻賦蓬萊宮御前賜燕春融融駝峯奇味出翠釜玉瓶瀉酒玻璃鍾青氈賜坐列左右三爵不識貌  
益恭金華仙伯年最老鶴髮垂領明方瞳中官宣勸令再酌陡覺眼纈添新紅天顏回顧發微笑親御翰  
墨揮蛟龍寶章既成自天降日月照耀光曠曠老臣再拜重感激一心報國惟公忠踉蹌步出闕門去皎  
皎月上龍樓東史臣彤管會當紀明良自古欣相逢

### 牛諒一首

諒字士良東平人洪武初舉秀才爲翰林典籍出使安南還擢工部員外郎進本部侍郎拜禮部  
尙書尋降主事復擢爲本部尙書有尙友齋集

田按士良與張志道奉使安南志道卒士良枕上成句云出使艱虞萬里同歸期日日待秋風甯知永訣蠻江上纔得相逢客  
夢中岸幘尙看頭似雪掀髯猶覺氣如虹起來淚憑闌久落月曉蟄遶殯宮詩頗沈痛足增友誼之厚士良名附見鄭端簡  
吾學編陶凱傳中傳稱凱姿性過人才高學博識見卓遠爲文千言汨汨不見有艱難意初遊吳楚文多激慨中更亂離去居  
深山中經養親文多隱約明興應聘而起凡稽古禮文事多公論定又兼領翰林院事詔令封冊歌頌碑碣時時命公文章  
遂盛傳於世明詩統誤以此數語屬之士良宋弼山左明詩抄遂沿其訛余閱吾學編詳考文意特爲辨正附見于此士良在  
明初亦山左一作家惜集不傳

秋林高士圖

林皋木葉下。江潭秋水生。靈飄蕩陰靄。落景涵虛明。手擷芙蓉佩。目送孤鴻征。冲襟契元賞。迢遙千古情。

朱夢炎一首

夢炎字仲雅。進賢人。元進士。爲金谿丞。入明除國子博士。遷翰林編修。坐累謫官。起爲禮部員外郎。進侍郎。拜尙書。

訪道者不遇

何處尋芝去未還。空留雙鶴守玄關。殘碁無主石枰靜。舊藥不春雲碓閒。流水桃花香冉冉。古壇春蘚碧斑斑。尋君不遇空歸去。看徧長松雨後山。



# 明詩紀事卷五

## 甲籤

### 王禕二首

禕字子充，義烏人。明初徵爲中書省椽，改江南儒學提舉，司校理，遷侍禮郎，兼引進使，尋掌起居注，出爲南康同知，以事忤旨，降漳州通判，詔修元史，與宋濂同爲總裁官，擢翰林待制，坐失朝降編修，奉使吐蕃，未至召還，改使雲南，抗節死。建文中，贈翰林學士，謚文節。正統中，改謚忠文。有集二十四卷。

田按忠文書俞生擬古詩後云：三百篇非出於一人之手，而亦非一人所能爲。後世視古人爲何如，而顧欲以一人之所能兼乎古人之所不能，亦難矣。元明之交，擬體雖開，未盡流變，使見後來諸集，不知當作如何云云也。忠文詩質堅體潔，時作小詩，亦有風致。南城曲云：素羅束髮雙髻拖，大紅衫子小紅鞵，並馬早出南城路，問人杏花多未多。余謂此可補入楓江漁父本事詩也。

### 臨漳雜詩

此地多煙瘴，時清喜漸除。阻山猶盜賊，並海盡鹽魚。田稻春秋種，園薑伏臘需。不才叨郡寄，廩祿頗贏餘。

田按忠文以議禮忤旨降漳州通判。雜詩十首。卽此時作也。其佳聯如地偏冬少雪。海近夜多風。茉莉頭圍白。檳榔口沫紅。兒童皆喚困。男女總稱孃。綠筍供春饌。黃蕉入夏筵。珉紫裁爲硯。犀花解作杯。不雨猶穿屐。因暄盡佩香。閩中風土如繪。忠文不獨文章炳燿。其遺愛在人。漳州半芝山下有遺祠在焉。正如朱邑之俎豆桐鄉也。

送許時用歸越

舊擢庚寅第。新題甲子篇。老來諸事廢。歸去此身全。煙樹藏溪館。霜禾被石田。鑑湖求一曲。吾計尙茫然。

明詩別裁。歸去而身不全者。宋景濂也。

金華詩錄。唐賢送行。每推一人擅場。此與潛溪詩。工力悉敵。均不愧擅場之作。宋云。青雲諸老盡。白髮幾人歸。此云。老來諸事廢。歸去此身全。宋云。因君勸歸興。予亦夢柴扉。此云。鑑湖求一曲。吾計尙茫然。其後宋卒于遷所。王致身使節。皆不得遂。首邱之願。一時興到之語。遂成詩讖。此詩亦見汪忠勤集。

吳雲一首

雲字友雲。宜興人。元翰林待制。洪武初。授弘文館校書郎。改渭南縣丞。遷刑部郎中。進尙書。出爲湖廣參政。奉召招諭雲南。死之。弘治中。贈刑部尙書。諡忠節。

題周伯甯江山送別圖

江山天共遠。無限別離情。人去長亭在。空餘落雁聲。

詹同一首

同初名書。字同文。婺源人。元茂才異等。除郴州學正。仕陳友諒爲翰林學士承旨。太祖下武昌。召爲國子博士。遷考功郎中。直起居注。洪武初。進翰林直學士。遷侍讀學士。進吏部尙書。尋爲學士承旨。兼吏部尙書。致仕。復起爲承旨。弘光時。贈禮部侍郎。諡文憲。有《天衢舒嘯》。

黃佐《翰林記》：洪武六年。開局修《大明日歷》。十一月十五日。前御史中丞誠意伯劉基。偕學士宋濂。詹同等。上燕乾清宮之便閣。同被酒而還。時繕書監生黃昶在館。同愛其有俊才。賦詩贈之。字大如罽。少選奉御傳宣。召濂等赴右順門。會上適乘步輦而至。同餘醒猶未解。上謂之曰：卿醉猶未醒耶。同對曰：臣雖醉猶能賦詩贈黃秀才。謂昶也。上曰：詩何在。同對曰：在史館中。上顧濂亟取之。既上奏。上笑謂濂曰：朕卽和同詩。卿當爲朕書之。濂於是受命書焉。濂歸與昶言之。以爲詞壇盛事。

田按：同文早歲。虞伯生呼爲才子。及遭遇明主。賜方竹之記。和贈人之詩。談者詫爲盛事。要其天才俊發。咳唾琳琅。不虛也。當時與吳濬仲、樂致和、宋景濂、號中朝四學士。魏杞山詩所謂詹、吳、宋、樂。皆時彥。誤述承恩晝夜同也。景濂之文。同文之詩。良足媲美。

飲楊廉夫拄頰樓時。余奉命徵賢松江。故有此作。

飛樓高出市塵表。萬丈文光照紫微。洞仙曾與鐵爲笛。天女或裁霞作衣。酒酣尙欲招鶴舞。詩狂未可騎鯨歸。休喚小瓊歌白雪。自有紫簫吹落暉。

田按：洪武初。召諸儒纂修禮樂書。帝以楊維禎前朝老文學。思一見之。特遣同文奉幣詣門。維禎謝使者曰：豈有八十歲老婦。就木不遠。而再理嫁者耶。因作《老客婦》。《老客婦》。行年七十又一九。少年嫁夫甚分明。夫死猶有舊簪符。南山阿妹。北山姨。勸我再家我力辭。涉江采蓮。上山采蘼。采蓮采蘼。可以療饑。夜來道過娼門首。娼門蕭然驚老醜。老醜自有能養身。粵。

兩黃金在纖手。上天纒得雲錦章。繡成顧補舜衣裳。舜衣裳爲妾佩古意。揚清光辨妾不是邯鄲倡。又作不赴召有述云。太守枉於堂下拜。使臣空向日邊回。使臣卽指同文也。帝復遣松江別駕追趣。賜安車詣闕。留百有餘日。禮文畢。卽以白衣乞骸骨。宋景濂詩。所謂不受君王五色詔。白衣宣至白衣還也。維楨元遺老。例不入此集。因錄同文詩。附見於此。

吳沈一首

沈字濬仲。蘭溪人。太祖下婺州。召爲郡學訓導。洪武初授翰林待制。以事降。編修復待制。再降。編修以奏對失旨。謫渭源教諭。未行。復爲翰林典籍。尋擢東閣大學士。降翰林侍書。改國子博士。有澱川集十卷。

陸心源函宋樓藏書志。澱川集十卷。舊抄本。是集各家書目罕見著錄。四庫所未收也。

詩藪。吾色大學士吳沈。最爲太祖眷遇。然初不以詩名。近得其遺集。雖儒生本色時露。而高華整肅。體格天成。合處詎出當時名家下。惜全篇完善差寡。輒句摘之。以俟賞音。其讀史十詩。如黃石履云。蹶劉舒國步。蹴項立炎光。子陵裘云。大澤垂綸夜。東都繪象時。諸葛扇云。白旄麾牧野。赤幟指咸陽。太白靴云。遠逝觀宇宙。高舉躡星辰。皆用事精切。神州十詠。北闕雲云。紫風細作千行紫。捧日高騰一朶黃。內苑花云。萬年枝上紅雲擁。五色屏前繡幙開。禁城鐘起句。華鯨飛舞出滄溟。直上中天望闕鳴。上林鶯結句。飛飛更向高枝語。三十六宮春畫長。尤爲俊爽。他若星環太乙尊。黃道日麗層霄映翠華。九成殿上飛金雀。萬歲山中舞碧鸞。國初殊自錚錚。而諸選絕不及之。

雲山僧寺

雨後看山分外奇。山青雲白兩相宜。老僧入定蒲團上。雨落雨晴都不知。

樂韶鳳一首

韶鳳字舜儀。全椒人。謁太祖於和陽。參軍事。授江南行省管勾。洪武初。授起居注。歷給事中。中書左司員外郎。兵部侍郎。拜尚書。改翰林侍講學士。病免。起國子司業。遷祭酒。致仕歸。

田按樂吳雖與宋詹並稱文采遠不逮也詩存樸實不失開國氣象

寄郭子虛

君王龍節照江湖。從事多才冠楚都。宗廟衣冠唐典禮。祠官文物漢規模。高樓綵筆題黃鶴。空谷生芻望白駒。廣廈細旂多暇日。好將忠孝翊皇謨。

魏觀七首

觀初名已孫。字杞山。蒲圻人。太祖下武昌。聘授平江學正。遷國子助教。再遷浙江僉事。兩淮都轉運使。入爲起居注。洪武初。進太常卿。改侍讀學士。遷祭酒。坐考禮譎龍南知縣。未至。召爲禮部主事。出爲蘇州知府。擢四川參政。復知蘇州府事。坐法死。有蒲山牧唱四卷。

田按列朝詩集稱杞山爲起居注。進太常卿。翰林侍讀學士。侍皇太子及秦晉楚諸王。授經。遷國子祭酒。年六十有六矣。以衰薨乞歸。賜參政俸。優贖于家。旣行。復召還。與詹同。宋濂賜宴奉天門。命各賦詩以記其事。考杞山授經。在洪武元年。時官起居注。至二年秋。命偕文原吉詹同。等十人。分行十道。訪求遺才。所舉得人。始轉太常卿。及考訂祀典稱旨。改侍讀學士。再遷祭酒。當在三年中矣。其賜宴奉天門也。杞山本集詩標題云。二年十一月。和煖如春。上遊觀上苑。召侍臣危素宋濂詹同吳琳及觀

等。賜宴奉天門。東紫閣。命觀等各賦一詩。以紀今日之樂。宋景濂應制冬日詩序云。洪武二年冬十一月。上御外朝。召翰林學士。臣游侍講學士。臣素侍讀學士。臣同起居注。臣觀等。列坐左右。大官進饌。賜黃封酒。上親御翰墨。賦詩。命各以詩進。據此。則賜宴賦詩時。杞山僅官起居注。安得序次于官太常侍讀。祭酒後耶。又何喬遠名山藏云。杞山坐考祀孔子禮。謫知縣。召還爲禮部主事。賜燕奉天門。上曰。前日逐卿去。今日與卿飲。何樂如之。此或謫龍南召歸時。別有賜宴事。而諸家紀載。牽合爲一。踳駁如此。余詳考而正之。杞山五古。實整有味。近體亦多佳聯。如青蟲懸絲不到地。黃鳥蹴花時。近人。一羣載雲歸晚漱。百花吹雨入春流。竹樹晴煙浮遶甸。柳花春雨隔樊城。窗前峭壁懸青雨。屋上流泉繞白雲。松扉近抱橋邊翠。花島平分水上雲。鳥度春陰歸漢甸。江含雲影護襄城。皆可誦也。杞山治蹟擅絕一時。徒以修守鄆浚城河。御史張度。誣以基興滅國。淫開錦帆。遂遭慘戮。高季迪。王常宗。亦牽連以死。哀哉。

東流縣

東流古名邑。渺在江之干。民居苦蕭條。官舍亦苟完。廡陋紛草茅。垣周翳榛菅。棗植行疎疎。槐陰鬱團團。觀此餘物清。盍展規撫寬。丞無兩松哦。令乏五柳歡。簿則頽而長。或謂棲枳鸞。咨詢我再來。偶滯風雨寒。坐彼容膝軒。徐徐散幽端。龍鍾數耆翁。再拜陳肺肝。小縣喪亂餘。人煙重凋殘。百一雖幸存。門孤戶仍單。老者困以衰。弱者傷以孱。況復差役頻。斯須未遑安。賴有父母慈。桑麻慰盤桓。撫字皆得人。昭蘇固無難。援筆題此詩。考績時取看。

次韻吳子祥溪行有懷吾蒲而作

嵐光開翠嶠。旭影動晴墟。送客蒹邊去。孤帆柳外舒。山雲初度鶴。溪雨忽沈魚。自得幽居趣。諸公恐未如。

都昌懷舊隱

黨里烏巾集，鄰翁古意淳。瓶罍隨野俗，耕稼及清晨。故物青氈在，寒山白屋貧。爲傳宗有譜，長使旅情親。

壽昌道中

野寺吟詩興未闌，徐徐驄馬出松關。村原窈窕通幽徑，林壑依稀似故山。鷗泛曉溪雲碓靜，犢眠春隴雨犁閒。田家老稚相迎望，應笑征夫兩鬢斑。

白雲山

清夢悠悠續故林，書窗皎皎白雲深。法曹千里動歸思，處士十年留野心。石硯晝封涵雨潤，巖扉朝度帶松陰。何當勸盡杯中物，副我還山舊日吟。

筠艤

淇澳茅廬僅一間，宛如乘棹竹溪灣。芙蓉秋水三千頃，翠黛春風十二鬢。鳳管製來遺譜在，漁竿歸去釣絲閒。湘濱已有沿洄約，六逸清風信可攀。

大木堂

翠葆葳蕤九鳳旗，東華遙望立多時。都堂啓事貂蟬集，率衛輪班虎豹馳。月繞珠簾陞講席，花迎金輅肅朝儀。六王炳炳前星後，珠緯聯輝上玉墀。

田按元時置端本堂爲太子講讀處宋仲敏過元故宮詩所謂端本有書遺鶴禁也明洪武元年置大本堂取古今圖書充其中召四方名儒教皇太子親王用學士宋濂待制兼編修王禕修撰王儼書儒陶凱輩分番夜直選才俊之士充伴讀所授經書帝親督之時時賜燕賦詩商榷古今評論文字尋命勛舊之子執經入侍鄭國公常茂曹國公李景隆蕪春侯康鐸等與焉杞山有詩云鄭國蕪侯弟子羣儲閣時得奉殷勤紀其事也杞山以洪武元年侍太子說書及授諸王經早朝奉天殿詩云白頭謬忝儒紳後大本先容赴講筵其遷祭酒也午門闕上賦詩云成均被命仍敷教大本承恩復說書蓋其官京職先後皆得與教習誠榮遇也此詩所云六王蓋指秦王棟晉王櫛燕王棣周王櫛楚王棣齊王棟厥後太子讀書在文華堂而親王則出就所居府矣

錢用壬一首

用壬字成夫廣德人元進士授翰林院編修出使張士誠留爲行省左右司郎中參張士信軍於淮安進參政入明授按察副使遷中書參議吳元年改御史臺經歷洪武初擢禮部尙書以老賜居湖州

題趙仲穆彥徵畫馬

吳興畫馬名天下文采風流美無價子孫兩世皆絕奇筆意經營亦相亞分明雙馬如雙龍玉花對立連錢踪圉人緩轡不敢控矯矯似欲鳴長風卻想當年落筆時省郎侍綵初來歸深庭花落白晝靜紅門草綠春風微回首光陰旣非昔老者已逝難再得中原武騎更馳奔展卷令人三歎息



素字太樸。金谿人。元翰林學士承旨。洪武初召至京。授翰林侍講學士。坐失朝罷。尋復故官。兼弘文館學士。謫佃和州。有學士集五十卷。

詩談金谿危素。入國朝老矣。蓋元季之虎也。

田按宋潛溪作太樸墓誌。稱有文集五十卷。奏議二卷。宋史稿五十卷。元史稿若干卷。又謂至正初。太樸移書執政。請修宋、遼、金、三史。乘傳行宋兩都。訪摭闕遺。書成其力居多。然則宋史稿固嘗採用於史館矣。太樸入明。其人不爲世所重。故其集散佚。嘉靖中歸太樸酷好其文。嘗有奉托俞宜黃。訪求危太樸集。并屬蔣藩二同年。及長城吳博士詩云。昔年宋學士。嘗稱太樸文。獨立撐頹宇。清響薄高雲。余少略見之。諷誦每忻忻。澹然元酒味。曾不涉世氣。如欲復大雅。斯人真可羣。苟非知音賞。宋公安肯云。嗟乎輕薄子。狂犬方猖獗。惜哉簡裘亡。家篋少所蘊。徒爲嘗一鬮。盈鼎未有分。四賢宦遊地。博達多前聞。爲我一咨訪。庶以慰拳勤。迄今所傳。說學齋百三十七篇之文。卽太僕傳抄本也。雲林詩集二卷。刻于元時。明初採詩者。以太樸所作。元時傳誦已多。故轉從略。觀徐泰明風雅凡例云。元詩人入國朝。年齒最高者。若危太樸。其詩刻元集已多。但錄一二可證也。太樸之文。明初當無抗手。其詩亦可並立於作者之林。採錄雖多。猶憾未窺其備云。

### 遊廬山棲賢寺

弱冠好山水。竭來廬阜陽。憩澗微雨至。入林春風香。載經三峽橋。地籟聞鏗鏘。解帶緣石磴。愛此泉流長。泄巖凝素乳。灑樹見飛霜。泠泠轉空曲。湛湛流清光。五老九千仞。巉絕天中央。紫煙射仙壑。白雲冠僧坊。幽思稍愉快。良朋共翱翔。訪古慕宗向。悟元愧裴楊。超然色界遊。圓靈大無方。終當畢吾志。混迹麋鹿行。

### 和吳尊師早飯楮飯

舟泊櫓陂驛。斫魚餐早飯。是行新雨過。水落寒沙半。櫂謳方零亂。鷗鳥忽驚散。笛聲起滄洲。又逐鷺鷥斷。  
與鄧叔賓兄弟叔姪以王喬下天壇。微月映皓鶴。分韻送三吳山人遊龍虎山。兼簡江左諸師友。  
蘿風吹蕭蕭。筠露淨灑灑。明霞結晴曦。曉色晃相射。手指雙瑤英。一去青山下。迢迢鳳麟洲。雲氣浩如瀉。  
寄謝山中人。離情若爲寫。

徐人歌

季子劍有秋水色。徐君見之惜不得。徐君墓上荒草寒。季子解劍挂樹間。一死一生見交義。嗟哉延陵吳季子。

隴頭水

隴頭之水向西流。莽莽寒雲草樹秋。水中尙有秦時血。今古征人到此愁。

送朱尊師

上清真人佩瑤環。遠遊荆楚何當還。月波流空寒似雪。雲氣拔地高於山。去年乘風上京國。稽首靈君好顏色。蓬萊坊裏煙霞深。昔種蟠桃親手摘。忽思舊隱玉隆宮。怪物鎮在深潭中。浪濤無聲江漢靜。兩劍噓氣如長龍。爾來復作西南去。織女迴車引歸路。解纓秋濯洞庭湖。采藥晨餐石鍾乳。翩翩飛駟金盤陀。芙蓉玉冠高嵯峨。醉中長謠送君發。一夜北風吹女蘿。

送鄭復常歸三山省親

嵯嵯塵湖山。飄飄紫微仙。十年山中鍊形魄。縹緲御氣凌蒼煙。采芝朝入虎窟飲。抱月夜就龍宮眠。洞天石扇星斗落。紫鳳一舉天風旋。君家正在滄海頭。十洲三島煙霞幽。手持瑤華度海去。白雲亂洒扶桑秋。歸來何以爲親壽。蟠木結實行當求。

宿山遊

祈仙古觀摩空青。手持鐵柱山中行。浮邱真人不可見。窈窕萬谷酣秋聲。捫蘿直登六七里。下頰世間真井底。雷霆震動獵雲碾。奕奕靈光夜深起。尊師有道虎狼馴。瑤草滿地山如春。仙公不歸鶴自語。老木夾路生龍鱗。鄧卿顧我三歎息。滄海蟠桃幾時得。千年虎魄尙可殮。會見紅顏生羽狄。

五月廿有二日同鄧漸叔儀誓季昭旭肆父昶喇父晚眺以森木亂鳴蟬分韻

良朋宴遊不可失。鄧氏諸昆晚同出。橫槎溪口弄飛泉。桐樹坳頭看落日。長山唐突短山青。山上十丈蒼雲橫。大風振林歸鳥疾。枯木壓石殘蟬鳴。登高長嘯招晴月。古竹吹涼夜如雪。夜如雪。秋氤氳。溪流無滓山無塵。寫詩聊寄山中人。

和吳尊師遊鐵柱觀

已從龍興遊。卽往鐵柱觀。龍興不出奧區囚。鴻水奔流合江漢。沈沈古井清如空。東方大海長相通。千年

神劍不可忽。老屋夜夜生雷風。

子規啼

子規啼。白月低。春雲迢迢春水遠。芳草遶庭花亂飛。子規啼時征夢苦。郎船定發瀟湘浦。瀟湘江上風浪多。春晚胡爲不歸去。子規好去瀟湘啼。重來借汝春樹棲。

寄張太乙張時留江湖

我曾身著夫容裳。笞麟遊遍蓬萊鄉。蓬萊仙人留我住。醉枕大石歌瑤章。高秋及上塵湖頂。下頰八極天茫茫。石林風煙白日靜。但有顯氣如飛霜。張君獨乘紫鳳凰。我得霞珮騶翱翔。星官下謁奏廣樂。衆客燕集翻瓊漿。層樓高空不得寢。神飈夜撼金琳琅。歸來雲林閉戶坐。忽憶舊事心飛揚。竊聞三月之初吉。飛車直過東海傍。莫從故都歎禾黍。定駕大舶窮扶桑。湖山迢迢澗水長。何由寄贈雙明珠。

小孤山歌

大孤之石衡且擔。青青長在湖中臥。小孤之石銳以高。峭立淮岸當洪濤。滔滔逝水東流去。兩石崑巖屹天柱。蜀巴之原浩沄沄。壯哉此地江海門。鴻龐稍見土宇曠。疏鑿方知夏后勤。名山大澤神所主。過者震驚誰敢侮。云何作廟向江壩。搏土媵媵象龍女。篙師賈客爾何知。坎坎伐鼓持豚蹄。倚篷清嘯漁歌起。日莫沙禽來去飛。

贈朱元吉賣墨

深山閉門二月初。白日雨打梅花枯。野夫讀書大石上。粵有一客來吾廬。水杭舟楫陸乘車。來徵後語行江湖。峩峩石峯起雲氣。下壓古井蛟龍居。詎知小人夜燒墨。墨色吹作煙模糊。元光貫天衆星沒。草字滿壁陰風噓。述文志者奚假文。通達古今良非迂。悲哉結繩易書契。剖割元氣疑無餘。遭逢盛年當返樸。誰復瑣細稽蟲魚。遠遊京師願寄贈。謹爲皇帝書真符。

趙文敏飲馬圖

蕭君學道龍瑞宮。此圖持贈寶林翁。魏公畫馬得馬趣。落筆宛有曹韓風。脂肥不見筋骨露。騰驤始知氣力雄。朝逢圉人吸秋水。精神炯炯方雙瞳。卷中題詩十四客。唯有括蒼留古色。卷舒雪涕憶前修。太息後來那可識。越城戰鬪白日昏。故物紛披橫道側。清涼衣鉢與馬圖。似有神明常護惜。法師未老傾囊囊。古書法畫門徒將。道初持來慰愁寂。如造吳興大雅堂。前年沙漠射黃羊。我馬飛行雲雪岡。誰挽天河洗兵甲。但騎款段還家鄉。

田按此圖見江村消夏錄。圖後有柯九思、丁復、唐珙、釋祖暕、劉基、沙門守仁、韓性、張大可、胡一中、凌脫、潘嘉、姚安道、沙門本無、李李光題咏。卽此詩中所謂十四客也。括蒼古色指劉基也。

寄題大瀛海道院

明州東海角。道院幾年開。寶構通丹極。瓊林闕玉臺。鍊形長對竹。遣興獨尋梅。羽駕乘雲氣。瑤章拜斗魁。鳴簫朝引鳳。飛檄夜鞭雷。芝草靈苗潤。珊瑚老樹摧。滄波馴白馬。幽窟瑣黃能。水怪能言語。龍精自往來。仙家凌宇宙。弱水截蓬萊。漢使遊空返。秦皇去不回。青山襄翠色。赤日漲黃埃。望極蒼茫外。羨門安在哉。

贈鄧叟追和蘇子贈扶風逆旅詩

鄧翁老耄食無糧。臥病愁多白髮長。千里南閩無過燕。五更秋雨亂啼螿。年來破屋塵生甑。歲莫空山雪似牆。愧我相逢貧到骨。悲歌此曲意蒼茫。

送張幼初之京

振衣鳴玉上青霄。銀漢清秋轉斗杓。北闕飛龍天杳杳。南雲歸雁路迢迢。朝登華嶽風生腋。夜飲灤河月入瓢。水竹清虛好真館。劉安有賦爲相招。

梅峯

諫疏當時奏漢宮。至今名迹遍諸峯。經臺半掩三花樹。丹白橫遮五粒松。近水衣裳清露溼。並崖芝朮白雲封。因君更憶非非子。杖履登臨得屢從。

陳物初秋暉堂

尊師家世華山陳。新築高堂古澗濔。臨水每同鷗結社。采花間與鹿爲鄰。窗通晴旭排高樹。簾捲秋風暗

綠筠振屐。梯山煙淅淅。縛船登瀨。石粼粼。鳳銜春色。頌真誥。龍吐霞光。夾羽輪。陰洞。舒中雲。似塔。白崖奔處。雪如困。拂衣蘭草。已多碧。在眼。楸花無數新。鐘磬撼林羣。鶴唳。丹砂貫井。毒蛟馴。張公昔者來歸隱。陸子前朝此問津。煙雨晦明。真若畫。山川靈怪。豈無神。未應芝嶺終辭漢。可是桃源不記秦。我欲從今就君住。定看東海卷黃塵。

題三韓沙門玉田花鳥圖

畫史幽居得物情。毫端春色可憐生。高僧已是禪心定。花鳥逢人更不驚。

題宋好古墨竹

我憶東曹粉署郎。琅玕寫就拂雲長。祇疑散步雲林曲。獨聽秋聲待晚涼。

題趙子昂竹石

叢篁偏映寒雲色。古石猶凝碧蘚痕。曾是碧瀾堂上月。獨臨茗水照王孫。

和吳尊師過清遠驛

雲滿故鄉芳草迷。江東江西人別離。征船幾日洪都去。清遠驛前聽子規。

送友人遊澗

常山縣前放船開。桐廬江口寄書回。君行不受人間熱。六月海潮如雪來。





# 明詩紀事卷六

## 甲籤

胡翰一首

翰字仲子。一字仲申。金華人。明初以薦授衢州教授。洪武二年。召與修元史。賜金帛遣歸。有胡仲子文集。長山先生詩集。

田按洪武元年。大將軍徐達取元都。獲其十三朝實錄以歸。二年二月。召修元史。命前起居注宋濂。漳州通判王禕。爲總裁官。徵山林遺逸之士。祁門汪克寬。德輔。餘姚宋禧。无逸。天台陶凱。中立。臨海陳基。敬初。新淦曾魯。魯得之。休甯趙汙。子常。甯波張文海。淳安徐尊生。大年。新喻趙壘。伯友。鄞傅恕。如心。長洲謝徽。元逸。傅著。則明。高啓。季迪。及黃篋。王錡。爲纂修官。仲申與焉。開局天界寺。八月。史成。諸人各授官。賜金帛遣歸。无逸。寄潛溪詩。所謂當時十八士。去留各有緣也。惟庚申君一朝。史官職廢。無實錄。可徵。召禮部遣使行天下。其涉於史事者。令郡國上之。三年二月。重開史局。濂。禕。仍爲總裁官。與纂修者。臨海朱右。伯賢。崇德貝瓊。廷瑤。義烏朱廉。伯清。嘉定王彝。常宗。浦江張丁。孟兼。河南高遜志。士敏。當塗李汶。宗茂。江陰張宣。藻。仲吳。張簡。仲簡。杜寅。彥正。未陽李懋。中卿。殷弼。俞寅。壘。復與焉。七月。書成。授官賜歸。如前。余錄前後兩局諸公詩。惟子常。德輔。敬初。无逸。仲簡。顧俠君。已採入元詩選。不列。此集與詩綜體例差別。竹垞采詩時。元詩選本尙無大集。元遺老詩。不妨兼收。此集義取斷代。如舒道原。謝龜巢。華黃場。沈茶山。劉仲修。賈南湖。張光弼。吳圭一。沈花溪。諸人。概不入選。仲申文與潛溪。華川。鼎峙。金華。詩學有端。

係爲吳立夫入室弟子。立夫有胡仲申至詩云：新文十餘篇，筆墨擅百鍊。口傳發秦壁，竹簡鑿晉竊。考論無差爽，風雅有正鑿。世儒弄俗學，雅曲極繁衍。羣羊雖冒虎，草悅豺則戰。誰其制橫潰，或者膠瞑眩。牛毛獨不多，鱗角時一現。獎許甚至余，讀淵穎集。凌厲震宕，仲申詩乃純古蒼渾。師弟子之淵源，豈必在面貌之似哉。

夜過梁山灤

日落梁山西，遙望壽張邑。洸河帶灤水，百里無原隰。葭菼參差交，舟楫窈窕入。割若厚土裂，中含元氣濕。浩蕩無端倪，飄風向帆集。野闊天正昏，過客如鳥急。往時冠帶地，孰踵萑苻習。肆噬劇跳梁，潛謀固坏蟄。古云萃淵藪，豈不增快悒。蛙鳴夜未休，農事告春及。渺焉江上懷，起向月中立。

汪師韓韓門綴學。元志河渠食貨俱不及梁山灤。惟於決隄偶序及之。明洪武初，胡翰過梁山灤詩：洸河帶灤水，百里無原隰。葭菼參差交，舟楫窈窕入。又云：往時冠帶地，孰踵萑苻習。肆噬劇跳梁，潛謀固坏蟄。是明初猶有水盜也。景泰間，河決沙灣，徐有貞請開廣濟河，謂其外有八十里梁山泊，可恃以爲泄。其地之窪下而閒空，可知。今人見其無水，并疑小說言有水者爲謬。豈知地在宋、元爲衆水之所聚哉。

趙壩一首

壩字伯友，新喻人。元鄉舉爲上猶教諭。洪武初，與修元史，賜金帛遣歸。尋召修日歷，授翰林編修。出爲靖江王長史。

田按纂修元史兩局皆與者，伯友一人而已。宋景濂元史目錄記所謂獨壩能始終其事也。徐大章與王符制書亦稱伯友有史才史學，其爲名輩所推如此。惜詩不多見。

阮仲謙客子光陰集

楚水吳山記勝遊。嗣宗孫子尙風流。故園歸種千頭橘。浮世休論萬戶侯。雙景往來成晦朔。羣芳開落自春秋。古來豪傑皆堪恨。獨賴長歌散隱憂。

徐尊生二首

尊生字大年。淳安人。洪武二年與修元史。史成旋留禮局。禮書成受賜歸。六年與修日歷。以薦授翰林。應奉文字。有懷歸稿十卷。還鄉稿十卷。制誥二卷。

田按大年以洪武二年奉召至京師。與修元史。史成辭歸。旋留禮局。集禮成。乃得歸。高季迪送徐先生歸嚴陵序云。嚴陵徐先生大年。被召至京。與修元史。書成上進。詔擇纂修之士。官之。先生以老乞還。甚力。會春官議修五禮。爲一代之曲。乃復奏留之。未幾其書又成。先生固申前請。大臣知其志。不欲強煩以事。乃命有司具禮傳送以歸。據此則修史時未受官矣。六年召修日歷。以宋景濂薦。復與纂修。日歷成。謝病歸。景濂送徐大年還淳安序云。中書奉旨纂修日歷。朝紳各薦所知。余疏大年名以聞。使者持書下郡國。大年驩然應命。日歷成。廷議將錫之官。大年固辭。今當堯舜在上。夔龍滿朝。大年春秋猶未高。沈疴容有卻藥之時。行當枚策造朝。盡展所蘊。又景濂進日歷序云。纂修官則有布衣臣徐尊生。據此則修日歷時未受官矣。其官翰林應奉。不知果在何時。決不在修日歷前矣。竹垞詩話引懷歸稿中有授翰林應奉詩云。布衣昨日孤寒士。翰苑今朝已授官。幼有文章淹滯久。老無筋力進趨難。隨班香案晨簪筆。列坐宮門午賜餐。早晚歸休宜引分。免教白髮點金鑾。以爲通籍之證。誠爲確鑿。復云。六年九月詔編日歷。大年復與纂修之列。固辭還山。拂帝意。出爲陝西教授。未行而卒。則大年官應奉。又似在修日歷以前。事疑不能明。竹垞又云。大年自引求去。省臣留之。續修庚申君史。此則絕無之事。宋景濂元史目錄記云。舊所纂錄之

士或仕或隱散之四方。惟趙孺始終其事。據此則修庚申君史者。惟孺一人。重參史局。大年無緣得與於十四人之列明矣。至全浙詩話於大年事蹟。修史先後。全不明晰。豈置辯。又不足論矣。

送操公刻還鄱陽

宿德高年史局尊。經年病廢想邱園。相期麟至方投筆。忽報驪歌已在門。幽谷使須從李愿。空齋恨不閉何蕃。芝山當戶青如舊。笑把青巒入酒樽。  
汗牛何啻三千牘。奕葉相兼二百年。太史網羅無軼事。諸生繇菟愧新編。綠陰晝永毛錐健。青鎖宵分蠟炬連。千里揚帆東匯澤。也應回首會丹鉛。

田按趙子常送操公琬歸番陽序云。聖天子既平海內。盡輦勝圖。國史典籍。歸于京師。乃詔修元史。起山林遺逸之士。使執筆焉。沆以衰病屢謝徵命。亦誤在選中。既至京師。聞番陽操公琬在書館臥病。旦夕以聞。即可歸。公琬學通諸經百氏。述作滿家。沆日上堂。與諸公從事筆硯間。退則省公琬疾。俾予連榻臥。談論經史。俄而得旨遣歸。公琬乃爲文一篇。以告同舍。同舍之士。莫不惜公琬之歸。咸賦詩爲贈。大年此二詩。當卽此時作也。宋景濂亦有奉詔總裁元史。故人操公琬。實與纂修。尋以病歸。作詩序舊云。帝曰。元有史。是非尙紛揉。苟不亟刊修。何以示悠久。宜簡岩穴臣。學識當不苟。袞斧嚴義例。執筆來聽受。使者行四方。持檄盡蒐取。非惟收鬣鬣。最欲尊黃耆。余時奉詔來。君亦至鍾阜。一見雙眼明。不翅蒙發蔽。大啓金匱歲。一一共評剖。發凡及幽微。勝辨白與黜。奈何君有疾。客邪干氣母。僵臥木榻間。臚逆夜加嘔。日念芝山青。親之若甥舅。翩然賦式微。使我心如灸。平生湖海情。臨岐思分手。官樓沽酒別。無錢更留綬。須記送君時。四月日丁丑。計開局始二月。史成在八月。公琬以四月去。故表上元史時。未得列名也。

謝徵二首

徵字元逸。長洲人。洪武初與修元史。授翰林編修。改吏部郎中。辭歸。復起國子助教。有蘭庭集六卷。

田按元逸與高季迪同徵修元史。史成同授編修。洪武三年帝御闕樓召對。擢季迪戶部侍郎。元逸吏部郎中。俱以踰冒辭。賜白金放歸。季迪有詩酬元逸云。顧余忝鄉里。才華敢論美。丹詔偶見徵。雲蘿款同起。謁帝入九關。咫尺瞻天顏。從茲謬通籍。接武諸公間。朝侍青坊讀。夜陪玉堂宿。講罷分御羹。吟成刻官燭。並命起列卿。寵極翻憂驚。我叨掌國計。君佐持權衡。借辭向明主。叩天聽天語。敕賫內帑金。東還特相許。紀其事也。

禪窩師子林十二咏

陰壑寒猶闕。空山響已沈。白雲無路入。禪向定中深。

臥雲堂

朝臥白雲東。暮臥白雲西。白雲長共我。此地結幽栖。

朱右八首

右字伯賢。臨海人。徙居上虞。洪武三年。以考禮徵。與修元史。授翰林編修。六年修日歷。七年修洪武正韻。尋改晉府長史。有白雲彙十二卷。

田按明史及諸家撰述。均不言伯賢以考禮徵。惟謝肅密菴集。有送朱先生赴京考禮序云。皇帝混一初元。命中書暨翰林太

常率諸儒定擬三禮。明年再命集議禮樂。又明年徧徵在野道德文章之士。相與考訂之。而吾鄉朱伯賢先生。實在徵焉。據此則伯賢以考禮徵。而潛溪又薦之。以修元史。此足補史闕矣。明茅坤有八大家文抄。至國朝諸欣。增爲十家。然言古文者。至今仍謂八家。不謂十家也。明詩綜四庫提要。均謂伯賢嘗選定韓柳歐陽曾王三蘇爲八先生集。八家之目。實權輿於此。余檢貝廷琚清江集。有唐宋六家文衡序云。唐宋文衡三百三十篇。天台朱伯賢氏之所選也。昌黎韓氏。倡於唐。河東柳氏次之。廬陵歐陽子。倡於宋。而南豐曾氏。臨川王氏。蜀蘇氏。父子次之。據此則文衡所選。實八家。云六家者。并蘇氏父子爲一家也。又謂六家文衡。損益東萊呂氏之選。則伯賢亦有所本矣。白雲稿十二卷。四庫所收僅五卷。有琴操而無詩。余據魏氏敦交集。石倉明興詩選。所錄差廣。然終不如得全稿之爲完備也。

零詠亭續蘭亭會補餘杭令謝勝

陟彼崇阿。遊目遙岑。川雲凌岫。林木蔽陰。喈喈黃鳥。懷之好音。亦有良朋。載歌載吟。

息徒坐蘭渚。臨流濯清泉。光風被林薄。春服麗以鮮。持觴撫流景。鳶魚樂天淵。俯仰同一慨。弱毫從所宣。

席上次王交山韻

湖波漲新綠。水花生晚涼。開軒燕嘉客。合座送飛觴。持此杯中物。共聽松上簧。泠泠遞金奏。濟濟鳴玉鏘。良會不可再。清歡未渠央。

客臨濠奉寄竹深隱居

相知更親舊。相思無盡時。山川阻繇邈。音問渺難期。華月出東嶺。白日淪西陲。南箕北有斗。夜夜天河湄。

念茲中腸熱。千里同依依。安得乘長風。放舟祈山陂。松居坐清暑。竹間吟新詩。擷蔬擊鮮鯉。共爾斟酌之。優游以佚老。餘生復奚爲。

過楊井山

霧盡寒初退。風清雨欲晴。山田春飽水。農舍早趨耕。行李青雲近。煙波白髮明。正愁泥路滑。林外竹雞鳴。

江上秋懷

水國風高木葉霜。滿舟山色入荒涼。小孤殘照收江左。大別寒煙鎖漢陽。新飯輒炊菘米白。濁醪香泛菊花黃。故鄉千里空回首。雲樹茫茫鬢髮蒼。

田按列朝詩集作楊子善詩。今據曹石倉明興詩選採入。

次韻奉謝竹深契友

側身天地一閒人。寄迹東西浙水濱。賴有詩書迴白首。肯隨車馬逐紅塵。向時知己還誰健。老去論心獨爾親。夏蓋鳳山皆咫尺。不妨來往擷青蘋。

與竹深同舟過姚江秋雨應候涼氣襲人陪飲守拙齋醉還明日竹深以詩來因次韻以答

初秋同抵舜江城。曉析聲聲渡柳營。雁塚過雲山色暗。虞淵浴日海光明。龐公足跡甯浪出。李氏仙舟逐水生。醉上籃輿向城市。葛衣風輒酒初醒。

陶凱一首

凱字中立臨海人元末領鄉薦洪武初召修元史除翰林應奉擢禮部尚書出爲湖廣參政召還爲國子祭酒改晉王府右相致仕追論在禮部事死有集

田按徐大章作陶尚書集序稱中立才高學博識見卓遠又與王待制論修元史書稱中立有史學惜集今不傳中立致仕後號耐久道人帝聞而惡之追論在禮部時朝使往高麗主客曹誤用符驗論死當時士之以文字受禍者高季迪以作上梁文王常宗以作文孫西菴以題藍玉畫王叔明以往藍玉家觀畫蘇平仲以表箋忤旨王弇州云洪武間三司衛所進表箋皆令教官爲之當時以嫌疑見法者不少其可知者浙江府學教授林元亮爲海門衛撰增官吏俸謝表內用作則垂憲誅北平府學訓導趙伯甯爲都司撰賀萬壽表內用垂子孫而作則誅福州府學訓導林伯環爲按察司撰賀冬節表內用儀則天下誅桂林府學訓導蔣質爲布按二司作正旦賀表內用建中作則誅常州府學訓導蔣鎮爲本府作正旦賀表用睿性生知誅常德府澧州學正孟清爲本府作賀冬節表內用聖德在秋誅陳州學訓導周冕爲本府作萬壽賀表內用壽域千秋誅懷慶府學訓導呂容爲本府作謝欽賜馬匹表用遙瞻帝扉誅祥符縣學教諭賈翥爲本縣作正旦賀表用取法象魏誅鳳陽府亳州訓導林雲爲府作賜燕謝東宮箋用式君父以班爵祿誅尉氏縣學教諭許玄爲本府作萬壽賀表用雷震天下誅德安府訓導汲登爲本府作賀冊立太孫表用永紹億年誅德安府訓導吳憲賀冊立表用永紹億年誅又有以天下有道及望拜青門誅者諸所誅者則嫌於賊也生知嫌於僧也帝扉嫌於帝非也有道嫌於有盜也其他則不可曉矣史既諱不載而雙槐歲抄出於黃氏祖孫之筆頗核因節而志之余又檢李文達日錄云高廟時有張翰林者以直諫謫蒲州學正表詞有天下有道萬壽無疆之句上怒曰謗我是強盜卽嚴逮殿鞠張仰首曰陛下有旨表文不許杜撰務出經典天下有道乃四書聖言萬壽無疆乃國風頌語何云誹謗上良久曰還鶩強釋之左右相謂曰數年以來惟容此一人觀此則不容者多矣當時有廣文御囚



撰表墓誌之謠哀哉。

### 送醫士戴元禮歸金華

昔遊金華山。振衣上層雲。清風生兩腋。草木發奇芬。尋幽出澗阿。坐石散羊羣。僊人渺何許。可望不可親。別來三十歲。滄海幾揚塵。翺翔清都上。喜見金華人。鉤深談玄理。稽古勘典墳。手持活人書。長揖動搢紳。歲暮歸故山。驅車出城闔。西風吹寒雁。送別滄江濱。初平儻相見。爲我道殷勤。聖主御六合。坐使風俗淳。從茲調玉燭。四海皆陽春。

### 曾魯一首

魯字得之。新淦人。洪武初徵修元史。授禮部主事。擢侍郎。以病歸。道卒。有守約齋集。

田按侍耶以博綜舊典。受知孝陵。甘露降鐘山。羣臣獻詩賦。獨見褒賞。詩集失傳。選家僅錄送黃道士還九宮山詩一篇。余從查夏重西江志。見題蔡淵仲散木菴詩。亟登之。淵仲樂平人。元徽州教授。洪武初。陶主敬守饒州。薦於朝不起。

### 題番陽蔡淵仲散木菴

蒙莊古達士。涉世熟憂患。著書雖寓言。垂戒非誕謾。有生勿爲材。祇以身試難。杞梓堪棟梁。何曾保枝幹。彼樗乃散木。匠石眼不看。終然老山林。長將櫟爲伴。年壽齊古椿。傲睨寒暑換。就中一轉語。妙處最宜玩。既全曳尾龜。復殺不鳴雁。萬事貴無心。倚伏昧前算。材與不材間。至理須剖判。舉似散菴人。笑齒爲余粲。

朱廉一首

廉字伯清，義烏人。洪武三年，與修元史。史成乞歸，復與修日歷。除翰林院編修，遷楚府長史。

輓朱長史伯賢

昭代聲名被八埏，吾宗文采更輝然。曾持史館春秋筆，復入王門醴酒筵。他日淩煙期畫像，一朝馭氣逐飛仙。絕奇喜有徐卿子，翠石鐫銘照九泉。

田按伯清詩不多見。此詩見朱性父珊瑚木難。同時輓朱長史者，尙有金華鄭濬麟溪、吳興林靜子山、金華劉剛養浩。此數人詩亦罕見。又方希直詩二首，遜志齋集亦未載，並附錄於此。鄭詩云：結巢方共白雲依，夜壑舟藏忽爾移。一代才華歎已遠，百年書傳正堪悲。爾風忍見新封土，薤露興歌諷有詞。須信承祧賢嗣續，烝嘗克奉謹時思。林詩云：口城山水未能歸，幾度宮花照錦衣。窩裏白雲無定所，又隨明月上天飛。劉詩云：學士鑿坡親草時，金蓮夜賜子同歸。如今尙憶清光近，地下修文孰是非。方詩云：東浙騰聲久，詞林受薦遲。才高當世用，心付後人知。遇主甯非命，傳經幸有兒。蕭條大夫里，聞道更從誰。士雖今始覺，文在世應傳。幸不求封禪，從人歎草玄。神交秦漢上，氣貫斗牛躔。一飯懷遺德，臨殮每慨然。

李汶一首

汶字宗茂，當塗人。洪武初，召修元史。除巴東知縣，改南和。

田按當塗二李，在元季有重名。吳淵穎稱伯羽之文，簡密嚴奧，一辭弗苟。仲羽之文，豐腴縟麗，五采爛然。伯羽名習，仲羽名翼。史稱明太祖取太平，書儒李習與陶安，率父老出迎，授習太平知府。卒，官習有檄攬集、峩漁小稿、沙樵雜抄。惟檄攬集著錄明史藝文志。今亦罕傳。宗茂，仲羽之子，與兄宗泰齊名。宋景濂稱文行凝峻，俱爲名儒。又稱宗茂之祖，父翼三世俱以文名。祖

母姨夫人亦有梅窗集

牛渚春濤

牛渚磯頭望眼開。桃花浪煖積成堆。隨風怒捲半山雪。帶雨遙轟徹夜雷。照水已憐溫嶠去。乘潮疑有子胥來。瞿塘三峽應相似。會擬乘槎覽勝回。

張孟兼一首

孟兼名丁。以字行。洪武三年。與修元史。史成。授國子學錄。歷禮部主事。太常寺丞。出為山西按察僉事。遷山東按察副使。為吳印所訐。論棄市。有白石山房稿。

田按孟兼官國子學錄時。國學旁有玉兔泉。宋丞相秦檜之所鑿也。孟兼作玉兔泉銘。為泉洗辱。劉伯溫聞之。繼作後玉兔泉銘云。嗚呼泉乎。夫何辜為檜所污。世無吳隱之。孰昭其污。檜死為蛆。泉潔自如。我作銘詩。衆惑斯祛。洪武五年。宋潛溪與仲子璩。過孟兼於成均。命侍史汲玉兔泉。論茗。俄熊參軍鼎。劉職方崧。周虞部子諒。皆集。呂太常仲善聞之。亦驢然來會。孟兼出新造玉兔泉銘。諷之。且曰。今夕何夕。勝友如雲。不可無以為娛。請舉泉聯詩。潛溪為之倡。餘則以次而續。鬪奇據勝。閱閱弗能休。至二鼓詩成各散去。詩曰。成均地何靈。聖澤資灌沃。灑免奔兆奇徵。井渫發新斷。鼎自非三窟深。孰湛一泓綠。孟兼儲精本從金。生色絕勝玉。子諒霜毛蘸寒飲。雪竊翻夜浴。崧釀冽補酒經。沐丹驗仙籙。仲善杵舂蟾宮粟。珠噴鱣堂觸。璩孕月生陰精。觀天漏晴旭。灑冰澄毛骨堅。鑑澈鬚眉燭。鼎魏名徒自奇。獐行穢難贖。孟兼雖涵東郭狡。難洗上蔡辱。子諒引滿瓶未贏。探幽經。類續。崧。流巖滲銀床。出竇濺瓊粟。仲善醉沃目暈花。凍波指連珠。璩滯毫乃自潤。照影從人欲。灑光沈天上魄。祥啓地中躡。鼎搗辭挹餘清。鹽蘆侑嘉告。子諒劍刺非貳師。池移豈身毒。孟兼燕支愧淫陳。鹽鹵鄙富蜀。崧不動疑籬雪。頻探笑風蠶。仲善天

光一眼開，雲影片鱗束。璣劇嘖覺瘳，蹶足雖彳亍。濂虜沸虎爪，跑剝吸狼臂。白鼎潔士濯冠纓，渴卒卸刀鞞。子諒精當昂君降，液或井宿督。孟兼誰知鍾阜分，脈與伊洛屬。崧錫名爾固嘉，戰句吾何局。仲善聯將指鼎比，疾勝擊鉢促。璣驚風落燈燼，斜月墜檐曲。靈源詎能窮，短咏聊可錄。濂孟兼子諒，賸辱二聯，蓋猶是洗辱之意也。潛溪此會，招高季迪不就，季迪明日作詩呈潛溪云：白兔如嫌桂宮冷，走入杏花壇下井。姮娥無伴每相尋，水井亭亭落孤影。曾搗秋風玉臼霜，至今泉味帶天香。玉堂仙翁欲飲客，鹿盧夜半響空廊。齋燈明滅茶煙裏，醉魂忽醒松風起。只愁詩就失彌明，殘雪滿庭寒似水。諸公才藻風華生，際承平岸幘哦詩。洵可作成均一段佳話也。孟兼以潛溪薦得召見，孝陵謂曰：張丞相骨相薄，仕宦徐徐進可耳。卒與禍會，方希古爲作傳云：法雖過嚴，其底於此酷，厥有自哉。孟兼恃氣凌人，而才鋒峻立，青田與孝陵評臚才人品居第三，惜白石山房稿散佚，莫由賞其神駿耳。

春日遊鍾山以溪回松風長分韻得長字

訪古來鍾阜，尋僧問草堂。千年猿鶴靜，一徑石苔荒。泉落春冰細，梅留臘雪香。鄉心憐薄暮，矯首碧雲長。

王彝一首

彝字常宗，其先蜀人，徙居嘉定。洪武三年，以布衣召修元史，賜金幣遣歸。尋薦入翰林，乞養歸，坐魏觀事死，有三近齋稿。

王士禎香祖筆記：王徽士集都少卿元敬編，元敬稱其古文明暢英發，又或以爲吳中四傑之一，以常宗代張來儀者。今觀其詩，歌行擬李賀，溫庭筠，墮入惡道，餘體亦不能佳，安能與高楊相頡頏乎。

田按楊鐵崖攬名元季，王常宗作文妖以詆之，李西涯領風雅於成，弘之間，張孟獨謂其蕪沒先進，嗣一韻之艱，爭一字之巧。

以詆之。厥後錢牧齋爲西涯修怨。至謂孟獨竊康德涵之詩。王漁洋爲鐵崖復仇。至謂常宗擬溫李。墮入惡道。士憎多口。天道好還。亦可畏哉。平心而論。常宗詩類鐵崖。本自眷屬一家。胡乃操戈同室。都元敬謂常宗文明暢英發。或以此屈鐵崖。未可知也。

### 江貫道長江圖

霜後洞庭淺。崖枯不見苔。朔鴻南岳去。千嶺一猿哀。楚俗依稀在。吳帆浩蕩迴。平生此離抱。偏向畫中開。

田按貫道此圖。題者二十五人。文徵仲跋云。諸賢題詠。皆清麗可喜。字畫亦精謹不苟。余錄常宗此作。並錄諸作之佳者。附見於此。高啓詩云。前峰落照明。後嶺層嵐積。葉盡露山村。潮來沒江石。遙遙射雁子。慘慘聽猿客。何處下歸帆。西陵渡頭夕。張適詩云。溪南山曲折。舍北水西東。樵響千峰雨。漁歌五兩風。煙生寒谷暝。潮落晚江空。爲客經行處。悠然此畫中。徐賁詩云。風定江聲稍息。霜清山色逾妍。浦橋漁舟夜火。沙市人家晚煙。陶琛詩云。石出夜潮落。山明寒霧消。江空千里棹。村迥一歸樵。樹色連沙嶼。人家傍野橋。還同舊樓地。風景日蕭蕭。潘伯濟詩云。岷峨雪消春水急。瀟湘雨餘雲樹濕。迢迢翠嶼孤鷓迴。湛湛珠宮老蛟泣。征帆數點風濤中。出沒不計天西東。鄉關杳渺在何處。矯首遙送雙飛鴻。金間詩云。霜落半林秋。鷓鳴衆山靜。僧寺夕陽邊。殘鐘送孤艇。悵望未歸人。空江澹雲影。王璠詩云。涼風動蘋州。江上秋來早。落葉滿溪橋。荒村人跡少。何處是漁家。炊煙起林杪。此圖曾藏高淡人詹事家。載江村消夏錄。

### 張宣三首

宣字藻仲。初名瑄。江陰人。洪武三年。以考禮徵。與修元史。授翰林編修。以事謫濠。道卒。有青陽集。許學夷澄江詩選。張仲藻古詩。語多警絕。律則始振唐音。使天假之年。未有涯矣。

田按漢仲少有才名尤善草書高季迪有草書歌贈漢仲云昔聞汝祖東吳精醉傳草聖醒而驚汝今能飲不滿杓逸氣欲與相崢嶸高堂把筆若把槊長綃一拂悲風生陰垂大澤雷雨過響破巨峽波濤傾颯颯遊絲霄晴晝落落高斗回寒更飲援連臂深澗絕饑鶴振翅荒煙橫自言靜裏觀萬物故能變化窮其情其爲當時推重如此詩亦俊爽有氣格

染絲行

吳蠶吐絲白於銀染絲上機顏色新往來拋梭不停手及時花樣隨他人以色媚人人見喜不惜蘭房勞玉指莎雞弔月鳴夜鳴杼軸啞啞淚如水明日彤廷促功賞輸官不得虧銖兩績麻成布自可衣染絲莫上寒女機

長洲春雨

東風漲新綠吳雨斷復鳴細淹花粉墮斜暈水紋生臺琴不成弄廊屨俱有聲朝觀思無那白鳥煙江明吳江夜泊

貝瓊八首

風壤三州接江湖一水過虹消滄海雨日落洞庭波羌笛梅花引吳歛子夜歌從軍古云樂吾意竟如何瓊字廷琚一名闕字廷臣崇德人洪武三年徵修元史賜金帛遣歸六年以薦除國子助教九年改中都助教有清江集四十卷

四庫總目瓊學詩于楊維禎然其論文稱立言不在嶄絕刻峭而平行爲可觀不在荒唐險怪而豐腴爲可樂蓋雖出於維禎

之門而學其所長。不學其所短。宗旨頗不相襲。朱彝尊靜志居詩話。謂其詩爽豁類汪廣洋。整麗似劉基。圓秀勝林鴻。清空近袁凱。風華亞高啓。朗淨過張羽。繁縟愈孫賈。足以領袖一時。鄉曲之言。未免過實。然其詩溫厚之中。自然高秀。雖不能兼有諸人之勝。而馳驟諸人之間。實固無所多讓。

### 真真曲

姚文公爲承旨時。一日玉堂燕集。聲伎畢奏。有真真者。操南音。公疑而問之。泣對曰。妾建甯人。西山之苗裔也。父司筦庫於濟甯。坐盜用縣官財。賣妾以償。遂流落倡家。公憫之。遣使白丞相。三寶奴爲落籍。且謂翰林屬官王棣曰。汝無妻。以此姬配汝。吾卽其父也。費裝皆出於公。棣字棣華。後官至翰林待制。噫。以西山之賢子孫陵遲。疑不至於此。然辱於始而正於終。是亦天也。箕谷筆談記其事。余乃賦四十二韻。而沈鬱悽婉。亦足以盡其大略矣。

斷絲棄道邊。何日緣長松。墮羽別炎洲。不復巢梧桐。請君且勿飲。聽我歌懊懣。在昔全盛時。冠蓋紛相從。盤遊易水上。意氣天山雄。金刀手割鮮。酒給葡萄濃。坐有一枝春。秀色不可雙。娉婷劉碧玉。綽約商玲瓏。寶髻金雀釵。已覺燕趙空。或聞操南音。未解歌北風。上客驚且疑。姓字初未通。問之慚復泣。乃起陳始終。妾本建甯女。遠出西山翁。父母生妾時。謂是金母童。梨花鎖院落。燕子窺簾櫳。迢迢官朔方。南歸山水重。侵貸國有刑。桎梏加父躬。粥女以自贖。白璧淪泥中。秋娘教歌舞。聲價傾新豐。永爲倡家婦。遂屬梨園工。

攬鏡拂新翠。吹簫和小紅。身居十二樓。屢入明光宮。京華多少年。門外嘶青驄。自傷妾薄命。失路隨秋蓬。不如孟光醜。猶得嫁梁鴻。客聞爲三歎。祖德甯未崇。回黃忽變綠。人事何匆匆。有客傷緹縈。無人憐蔡邕。遣使白丞相。削籍歸舊宗。小史三十餘。勿恨相如窮。配汝執箕箒。今夕看乘龍。鴛鴦並玉樹。鸚鵡開金籠。銀甲不復整。紅牙不復從。提甕自汲水。絺綌亦御冬。應非事羊侃。頗類歸建封。琵琶感商婦。老大猶西東。崔徽怨顛顛。浪寫丹青容。依依章臺柳。落絮春無蹤。小妾恨題驛。竟與瓊奴同。時多困坎壈。事或欣遭逢。焉知百尺井。歛登羣玉峯。借問爲者誰。內相姚文公。

列朝詩集按諸集並載貝瓊無貝闕光岳英華載貝闕廷臣無貝瓊程慶珙會選則貝闕貝瓊並列據陶九成輟耕錄載姚文公嫁伎女事云嘉興貝闕有詩今真真曲載在清江集中而貝瓊本字廷臣則闕乃瓊之別名非兩人也今正之

田按廷瓚此詩見質谷筆記而作高季迪膏邱集有真氏女詩序云余在史館日談次有言姚文公飲玉堂落籍真氏女事者同館之士聞之多賦詩余亦爲作一首妾恨非緹縈上書動天子自鸞償縣官幸得脫父死誰知故相家失身居狹斜遂令園中柏翻作道旁花當筵唱金縷朝客驚聞語相問忽相憐開籠放鸚鵡棄置舞衣裳新理嫁時裝良人身作吏不是販茶商花鏡映羅扇初與郎相見賁賤士難當妾心那敢怨願郎去作官莫掌官錢穀生子但生男家門免多辱

醉芙蓉歎

蜀江芙蓉四十里。花外樓臺夾江水。蜀主龍舟八月來。日照千門錦雲起。一朵依稀武都女。雪色宮衣輕欲舉。已竊元珠化水仙。不同石鏡埋黃土。朝妍夕態還相惱。傅粉塗黃俱草草。春風入髓猶未蘇。丹砂換



骨應長好。凌波殿廢花亦殘。江上秋深風雨寒。武林城南偶識面。把酒共看頰玉盤。十年流落雲間路。欲尋舊賞知何處。芳心一點對斜陽。脈脈無言歲華暮。

題火龍烹茶圖并序

右火龍烹茶圖。蓋寫古帝王事。而斷縑落粉。半爲好事者裂去。獨有茶具及黃衣中使拱而立者二人烹茶者一人。錢惟善定爲唐之元宗。豈嘗見其全歟。然所謂元宗者。不知當勵精圖治。與張說一二大臣共樂集仙時耶。抑其既耄而昵於妃子時也。特人物位置。要非院工所及。未暇考譜以實之。姑爲題其左云。

松聲忽作秋濤雄。銅龍吐火鱗甲紅。黃衣中使備玉食。泉出金沙甘露濃。春風一旗色尙活。建溪山人雨前掇。蓬萊殿裏沃焦餘。玉盃分霑侍臣渴。名花喚起海棠魂。細葉未數丁香根。宮中一日歌舞散。世上千秋圖畫存。開元盛事何人省。書生亦解誇雙井。空人埽葉燒破鑪。閉門讀書秋夜永。

徐給事山水歌并序

給事中徐以文善山水。嘗爲禮部員外張惟中作層巒疊嶂圖。惟中求余題詩於上。予放置篋中。竟爲好事者持去。乃賦長歌而復之。

吳門故人徐給事。一山一水稱絕藝。濃毫燥墨隨意成。位置非難在神氣。大山積鍊青巒岼。小山伏起蛟

龍蟠水有百道噴薄之飛湍。宛然坐我明星玉女下。五月六月松聲寒。荆關筆法自奇古。未數畫師楊契丹。仙家樓臺十二闌。飲煮胡麻須可餐。採藥何人入少室。讀書有客居王官。我遊白下未得去。五更出門雪滿鞍。虛空翠黛不復覽。一日剪向高堂看。員外張公尙文采。身住南宮志滄海。李白已死今無詩。卷示老夫增慷慨。近來好事復持去。夢覺煙霞竟安在。白鶴夜怨青猿悲。山中春老歸何時。寫我平生有聲畫。償君太古無聲詩。

姑蘇

城潰姑蘇伯業終。蕭蕭茂苑自秋風。青絲白馬來江表。紫蓋黃旗入洛中。宮殿獨留殘月照。綺羅應逐曉雲空。如何十萬貔貅士。不及吳陵一旅雄。

郊居

背郭茅堂低入燕。通邨小徑曲縈蛇。碧雞坊裏詩人宅。石鼈崖前刺史家。流水暗通三徑竹。曉雲濃掩一溪花。他年著我林間老。垂釣共分鴻瀟沙。

蜀山圖

連峰接岫寫秦州。雨洗蛾眉積翠浮。石出劍門皆北向。水通鹽澤自西流。松頭一片秋雲溼。鳥背千盤細路幽。策馬匆匆度關客。何如漁父一扁舟。

送王克讓歸湖南侍親并柬李中卿縣丞

五兩風生楚客歸。夢魂先已到庭闈。九疑舜塚蒼梧野。三國周郎赤壁磯。天地茫茫人自老。古今歷歷鳥空飛。若逢李白頻相問。別後平安二字稀。

田按中卿名懋。耒陽人。洪武三年。與修元史。除蒙邑縣丞。明史文苑附見趙璠傳中。而不詳其字里事蹟。廷瑤文集有送李敏卿赴桂陽教授序云。湖南李敏卿。謁余成均。蓋蒙邑丞中卿之弟也。中卿與余預編纂元史者五月。學極博。凡三十六年。君臣行事。余每咨之。而中卿亦稱余之序事。直而不說。史成。予歸橋李。且三年。又徵爲國子助教。相望四千里外。不得一見。及見敏卿。道其出處。則知老於衡山之下。挹瀟瀟玩雲月也。據此則中卿學問出處。均有可觀。錄此以補史闕。并以告湖南之徵文獻者。

杜寅一首

寅字彥正。吳人。洪武三年。與修元史。除岐甯衛知事。八年。番賊既降復叛。被害。

田按史稱彥正死於番賊。僅官知事。列朝詩集謂彥正仕至侍郎。莫得其詳也。彥正與高季迪爲素交。季迪集中有與杜進士寅登白蓮閣對雨詩。則彥正爲元進士矣。寄杜二進士詩云。花開寄別離。花落正相思。交誼多年進。鄉愁近日知。白蓮寺次韻。杜進士話舊詩云。不辭鳴棹遠相尋。欲向江齊伴旅吟。百事未成年已長。幾時纔別夏將深。二人交分不淺。彥正詩不多見。病柏聯句。附見季迪集中。錄於此。抱質雖輪困。託根何坎珂。杜寅。死色見已深。生意存猶頗。高啓。老枿焦牛身。餘葉禿偏髻。徐貢。恩謝漢陵春。炎非陸渾火。寅。柯傾痺待扶。節漏瘡思裹。啓。下窾封蚍蜉。上穴綴螺贏。貢。風欺聲告哀。雨冒汗憎顛。寅。蟄空虺喜容。蹙脆猿愁墮。啓。將斲豈中梁。欲剝詎宜柯。貢。蓋瘁缺青葱。枯枿辭猗籬。寅。乏子供爐焚。無陰庇床坐。啓。蠹盡啄鳥饑。巢傾

難跋。賁臞形慘若魃。突腹腫如果。寅藤纏偶假妝。薜剝每慚裸。啓主惜覲匠顧。樵窺避僧邏。賁土瘠力易衰。巖危勢難安。寅殺懼苦霜仍。醫期甘露可。啓成器未爲福。不材返逃禍。賁依林尙支撐。亞石猶磊砢。寅閱歲失貞姿。承陽愧纖朵。啓操率孔語稱。名負杜吟播。賁敢要秦樹封。執效禹梅鎖。寅蟠深漫欲踞。架重甯堪荷。啓氣同生固均。數異測誠巨。賁膏乾燃不明。屑墜掃還夥。寅客憐弔賦悲。童棄培功惰。啓終護竟煩誰。今看幸遭我。賁句奇韻險。頗不相下。

曲江寫懷似良夫

曲江羈旅愁。見食思螺女。門徑悄無人。斜陽下洲渚。芻蕘晚相過。兩賤成賓主。不識懷瑾人。雜言相爾汝。癡絕祇自憐。知遇有誰許。世味須飽嘗。梟鸞方混處。出戶一悽然。埃風暗吳楚。

呂復一首

復字仲善。章貢人。洪武初爲國子典膳。采史北平。山東還。遷太常典簿。歷太常丞。

田按仲善常充史局。往北平。山東。採元統以後事。其行也。宋潛溪有序送之。其採史南還也。凡詔令。章疏。謠俗。野史。碑碣。家集。錄爲百二十帙上之。官集爲目錄四編。而職其副於家。劉子高。宋潛溪爲之序。其簡首。又揭北平碑文四百通。山東碑文一百通。可謂好事。史稱歐陽佑等往北平採遺事。此語殊欠分明。當時遣使十二人。分行各省。仲善與佑往北平。山東。劉夏往河南。陝西。在北平開局。故國子監。在河南開局。武成廟側。其名氏可考者。尙有黃盅。張貫。不知所往何省。決非北平一省可知矣。史家損文。往往事不明晰。皆此類也。佑字公輔。元學士。歐陽玄孫。採史還。擢陝西按察僉事。見蘇平仲文集。

題方壺蒼山秋意圖

昔遊華蓋仙人掌。萬疊芙蓉紫翠生。猶記月明聞鐵笛。人間無處著秋聲。

李叔正一首

叔正名宗頤。以字行。改字克正。靖安人。明初以薦授國子學正。改渭南縣丞。遷興化知縣。召爲禮部員外郎。以老乞歸。不許。除助教。拜監察御史。巡嶺表。還擢湖廣參政。遷禮部侍郎。進尙書。

田按列朝詩集於叔正名字仕履不得其詳。曾煥江西詩徵亦沿其譌。今據明史改正。叔正名列江西十子。惜集不傳。

送呂君采史北平

八月烏矚海子橋。南來使客下青霄。雲埋石室丹書在。日落延秋翠輦遙。麟史未全歸聖代。龜文猶得認前朝。詞臣載筆需文獻。莫遣回車久寂寥。

田按呂仲善采史北平名流皆有贈詩。今附錄於此。胡仲子詩云。又見陳農去。遙臨析木墟。山川遊幸後。文獻亂離餘。備極傳聞異。歸從直筆書。百年殷監在。盡獻玉階除。高季迪詩云。有詔纂前史。徵儒起巖阿。顧子豈其才。亦來預編摩。勝國社已結。遺書歎無多。忍令百年間。忠邪半湮磨。君今使燕齊。往事煩蒐羅。會看得萬編。歸獻載以馱。傳聞貴有徵。議論期無頗。諸公執筆。去矣毋蹉跎。趙子常詩云。龍庭返騎如飛煙。真人端拱恢中原。北平圖籍載連舸。挂一漏萬無完篇。妖星夜斗躔奎宿。山川千載還清淑。國書不使外廷傳。翰林青簡空如玉。監股監夏思前車。詔起羣儒當疾書。皇家制作貴傳信。未許太史徵無且。舊事遺文促搜訪。狼籍幽燕藉君往。五車上送見書成。一代興亡如指掌。



# 明詩紀事卷七

## 甲籤

高啓七首

啓字季迪，長洲人。洪武二年，與修元史，授翰林編修，尋擢戶部侍郎，辭放還。以魏觀事坐法死。有鳳臺、吹臺、江館、青邱、勝壬、南樓、槎軒、婁江、姑蘇雜詠等集。自選爲缶鳴集。景泰中，吳人徐庸彙爲大全集。國朝桐鄉金檀復搜逸輯注，爲青邱集十八卷。

四庫總目：高啓天才高逸，實據明一代詩人之上。其於詩，擬漢魏似漢魏，擬六朝似六朝，擬唐似唐，擬宋似宋。凡古人之所長，無不兼之；振元末纖穠縛麗之習而返之於古，啓實爲有力。然行世太早，殞折太速，未能鎔鑄變化，自爲一家。故備有古人之格，而反不能名啓爲何格。此則天實限之，非啓過也。特其摹仿古調之中，自有精神意象，存乎其間。譬之褚臨禊帖，究非硬黃雙鉤者比。故終不與北地、信陽、太倉、歷下同爲後人詬病焉。

都穆南濠詩話：韓文公詩曰：我生之初，月宿南斗。東坡謂公身生磨蝎宮，而已命亦居是宮。蓋磨蝎卽星紀之次，而斗宿所躔也。星家言身命舍是者，多以文顯。以二公觀之，名雖重於當世，而遭逢排謗，幾不自容。蓋誠有相類者。吾鄉高季迪爲一代詩宗，命亦舍磨蝎。又與坡翁同生丙子。洪武初，以作文竟坐腰斬受福之慘。又二公之所無者，吁亦異矣。

張習四傑集序：國初以高、楊、張、徐比唐之四傑，故老言不惟文之似，而其攸終亦不相遠。眉菴盈川令終如一。太史之斃，同乎

寶王北郭雖不瀾海。僅全要領。而非首邱。司丞投龍江。又與照鄰無異。噫亦異矣。

葉盛水東日記。楊文定公嘗云。范文正。高季迪。皆出姑蘇。兩人氣象不同。蓋於其所賦。卓筆峯見之。范云。笠澤研池小。穹窿架石峩。仰憑天作紙。寫出太平歌。高云。雲來初似墨。雁過還成字。千載只書空。山靈恨何事。

田按季迪諸體並工。天才絕特。尤爲明三百年詩人稱首。不止冠絕一時也。青田作二鬼詩。自負與潛溪並峙天壤。豈知江上有青邱子哉。季迪青邱子歌云。青邱子。臞而清。本是五雲閣下之仙卿。何年降謫在世間。向人。不道姓與名。但好覓詩句。自吟自酬。寶朝吟忘其飢。暮吟散不平。當其苦吟時。兀兀如被醒。頭髮不暇櫛。家事不及營。兒嘵不知憐。客至不果迎。不慚被寬褐。不羨垂華纓。不問龍虎苦戰鬪。不管烏兔忙奔傾。向水際。獨坐林中獨行。斲元氣。搜元精。造化萬物難隱情。冥茫八極遊心兵。坐令無象作有聲。微如破懸。益壯若屠長鯨。清同吸沆瀣。險比排崢嶸。鸞羈晴雲披。軋軋凍草萌。高攀天根探月窟。犀照牛渚萬怪呈。妙意俄同鬼神會。佳景每與江山爭。星虹助光氣。煙露滋華英。聽音諧韶樂。咀味得太羹。世間無物爲我娛。自出金石相轟鏗。其自負亦復不淺。入史館後。驟擢戶部侍郎。以不能理天下財賦力辭。蓋亦有托而逃。觀其京師寓解詩云。拙宦危機遠。其志可見矣。迨夫魏守獄。與牽連以死。舊遊素交。同聲哀悼。楊孟載詩云。鸚鵡才高竟殞身。思君別我愈傷神。每憐四海無知己。頓覺中年少故人。祀托友生香稻糲。魂歸邱隴杜鵑春。文章穹壤成何用。哽咽東風淚滿巾。徐幼文詩云。昔別會有期。茲別涉無迹。茫茫堪輿間。飄然竟何適。且暮淒以深。形影弔單隻。惟餘瑤華言。和諧重金石。一讀一愴情。老淚屢揮滴。張來儀詩云。平生五千卷。甯救此日艱。又云中。即幼女今癡小。遺藁千篇付與誰。浦長源詩云。鼓罷瑤琴遂解形。蕭蕭日影下寒城。薄田供祭遺妻子。新家題名望友生。地下未應消俠氣。人間誰肯沒詩名。舊廬重過悲聞笛。欲賦招魂竟不成。玉碎崑崙蘭焚楚澤。千古才人同聲下淚矣。



洪武二年八月十三日。元史成。中書表進。詔賜纂修之士。一十六人銀幣。且引對獎諭。擢授庶職。老病者則賜歸于鄉。閱二日中秋。諸君以史事甫成。而佳節適至。又樂上賜之優渥。而惜同局之將違也。乃卽所寓天界佛寺之中庭。置酒爲翫月之賞。分韻賦詩。以紀其事。啓得衢字云。

聖主念前鑒。述作徵名儒。羣來高館間。廝迹愧我愚。孰謂此責輕。毫端有褒誅。書成進丹陛。召對共拜趨。去留雖不同。雨露均沾濡。已淹三時勞。可廢一夕娛。況逢端正月。當空照眉鬢。流光滿金界。境與人間殊。廣庭布長筵。嘉肴薦芳腴。豈惟多士集。亦有名僧俱。興酣資形忘。諧笑不復拘。觴行豈辭勤。仰看轉斗樞。明晨卽分袂。此樂誠須臾。人生四海間。相見皆友于。不知誰使令。流蕩無根株。忽然此相遇。旋復成天隅。願各崇令名。逍遙步亨衢。明年重見月。相憶當長吁。

穆陵行并序

永穆陵。宋理宗陵也。在會稽。元至元初。西僧楊發輦眞住。請發宋諸陵。許之。旣取其殉寶。復以理宗頂骨爲飲器。後籍入官。以賜帝師。天兵克元。詔求得之。命有司歸葬焉。

樓船載國沈海水。金槌畫入三泉裏。空中玉馬不聞嘶。日落寢園秋色起。魚燈夜滅隧戶開。弓劍已出空幽臺。髡胡暗識寶氣盡。六陵松柏悲風來。玉顛深注醪酥酒。誤比戎王月支首。百年帝魄泣穹廡。醉骨飲冤愁不朽。幸逢中國眞龍飛。一函雨露江南歸。環珮重遊故山月。冬青樹死遺民非。千秋誰解鋼南山。世

運興亡覆掌間起輦谷前馬蹶散白草無人澆麥飯。

田按周密癸辛雜識云楊髡先啓甯宗理宗度宗楊后四陵劫取寶玉惟理宗之陵所藏尤多啓棺之初有白氣亙天蓋寶氣也理宗之屍如生越三日竟失其首或謂西番僧回向其俗以得帝王髑髏可以厭勝致富故盜去耳未言其爲飲器也羅有開所撰唐玉潛傳鄭天祐所書林義士事備詳西僧發陵始末亦未及飲器事臨川危太樸博洽舊聞嘗與太祖論宋元興替因言及夏人楊叢真駒爲江南總攝悉掘徽宗以下諸陵攫取金寶宸帝后遺骨瘞於杭之放宮築浮屠其上名曰鎮南以示厭勝又載理宗顛骨爲飲器真駒敗其資皆籍於官顛骨亦入宣政院以賜所謂帝師者太祖聞之歎息良久遣工部主事谷乘輿至北平索飲器北平守將購得於西僧汝訥所詔應天府尹瘞瘞鳳臺門高座寺之西北及紹興以永穆陵圖來獻遂敕葬故陵此事見於明史太樸傳末余謂太樸入明惟此事差強人意史官綴此亦有微意也貝廷琯清江集亦有穆陵行云六陵草沒迷東西冬青花落陵上泥黑龍斷首作飲器風雨中魂夜嘔當時直想金棺腐鑿石通泉下深固一聲白雁度江來寶氣竟逐妖僧去金屋猶思宮女侍玉衣無復祠官護可憐持比月氏王甯飼烏鷲及狐兔真人歛見起江東緞馬九月踰崆峒百年枯骨卻南返雨花臺下閉幽宮流螢夜飛石虎殿江頭白塔今不見人間萬事安可知杜宇聲中淚如霰此詩蓋與季迪同時而作附見於此

贈醉樵

川釣已遭獵野耕終改圖不如山中樵醉臥誰得呼采山不采松松花可爲酒酒熟誰共斟木客爲我友木客已去空石牀舉杯向月邀吳剛借汝快斧斫大桂要令四海增清光林風吹髮寒擁耳獨枕空尊碧巖裏此時忘卻負薪歸猛虎一聲驚不起世間萬事如浮煙看某何必逢神仙青松化石鶴未返酒醒又

是三十年。

藝苑卮言。勝國時法網寬。大人不必仕宦。湖中每歲有詩社。聘一二名宿。如楊廉夫輩主之。宴賞最厚。饒介之分守吳中。自號醉樵。延諸文士作歌。張仲簡詩擅場。居首坐。贈黃金一餅。高季迪白金三斤。楊孟載一盃。後承平久。張洪修撰爲人作一文。得五百錢。

田按仲簡醉樵歌。竹垞謂此詩殊不見好。殆如李獻吉之嗤袁海叟白燕詩。最下最傳也。今錄季迪詩。并錄二張詩於此。以俟具眼之品評者。仲簡詩云。東吳市中逢醉樵。鐵冠欲削飄蕭。兩肩矻矻何所負。青松一枝懸酒瓢。自言華蓋峯頭住。足跡踏遍人間路。學書學劍總不成。惟有飲酒得真趣。管樂本是王霸才。松翁自有煙霞具。手持崑岡白玉斧。曾向月裏斫桂樹。月裏仙人不我嗔。特令下飲洞庭春。興來一吸海水盡。卻把珊瑚樵作薪。醒時邂逅逢王質。石上看棋黃鶴立。斧柯爛盡不成仙。不如一醉三千日。于今老去名空在。處處題詩償酒債。淋漓醉墨落人間。夜夜風雷起光怪。來儀詩云。華蓋山高互南楚。股產奇材少榛莽。山人嗜酒而業樵。背負清樽手持斧。丁丁伐木雲之深。束薪欲擔力不任。且傾醞醪藉盤石。痛飲莫知西日沈。白眼。天歌鼓腹。櫛衣半染苔花綠。頽然俯枕樹根眠。鼻息如雷撼巖谷。起來卻笑朱買臣。底用金紫纏其身。堪羨劉伶行荷鍤。生死無累全天真。梗楠豫章等枯槎。惟取醪醕真樂境。泛觀世士多沈酣。誤入牢籠猶未醒。

### 天閑青驄赤驃二馬歌

漢家諸將開經濟。列宿儲精降人世。天遣同成一代功。亦有房星化騏驥。青驄剪髮高作花。赤驃灑汗微成霞。人間何處得奇種。恍惚西至踰流沙。年來百戰從天子。曾逐烏騅到江死。不慙飽食玉山禾。天廐時清少鞭使。周王八駿去不來。唐帝六馬應凡材。何如二龍總超絕。蹴踏四海荆榛開。圉官雙鞵頻迴顧。萬

里長楸恐驚驚。嘶處秋生閫闔風。浴時曉動昆明霧。一匹前牽一匹騎。馳道每出隨龍旗。態閒步穩識上意。不敢搖頓黃金羈。昨看巡狩還都邑。鏡吹聲催移仗急。羽林萬騎從如雲。追逐飛塵豈能及。嗟哉此馬不異人。乘時際遇蓋有神。請看垂耳鹽車者。那得昂藏八尺身。

送王檢校錡赴北平

半年同舍客京華。看遍龍河寺裏花。纔進史書朝日下。便紆官授去天涯。平蕪遠塞秋驅騎。衰柳遺宮晚噪鴉。莫道窮邊成久別。待君歸草玉堂麻。

田按王錡洪武二年與修元史。附見明史文苑趙彞傳中。史不詳其授官。此詩足以補闕。

弔七姬塚

疊玉連珠棄草根。仙遊應逐墜樓魂。孤墳掩夜香初冷。幾帳留春被尙溫。佳麗總傷身薄命。艱危未負主多恩。爭妍無復呈歌舞。寂寂蒼苔鎖院門。

王藝姑蘇志。七姬墓在郡城東北隅。潘氏後園。張羽作權厝志。七姬皆良家子。事浙江行省左丞滎陽潘公。皆爲側室。性皆柔慧。姿容皆端麗。修潔善女。紅翦製衣繡。經手皆精巧絕倫。事其主及夫人。皆能以禮。其羣居和而有序。皆不爲怙寵恃美之行。公每聞閨閣婦女。能以節概自立者。歸必爲語其事。皆應曰。彼亦人爲耳。公笑曰。若果能耶。及外艱興。敵抵城下。公日臨戰。一旦歸。召七姬謂曰。我受國重寄。義不顧家。脫有不宿誠。若等當自引決。毋爲人恥也。一姬跪而前曰。主君遇妾厚。妾終無二心。請及君時死以報。毋令君疑也。遂趨入室。以其帨自經。死于戶。六人者。亦皆相繼經死。公聞之曰。何若遽死耶。實至正丁未。

七月五日也。以世難弗克葬，乃斂其屍焚之。復以其遺骸瘞于後園，合爲一塚。公還啓其封曰：是非若所安也。行營高敞地而遷焉。時以日薄，故未暇爲志。及踰月，始狀其事。屬羽將勒石追瘞于塚側。嘗觀古之史氏，所載貞妃烈婦，能識節義，決死生而不顧者，恆曠世而一見。今乃于一家一日，而得七人焉。吁不奇矣哉！乃列其姓氏于石，而系之以銘。程氏蜀郡人，年三十，生女一人，生奴。翟氏廣陵人，年二十三。徐氏黃岡人，年二十，生女一人，不惜。羅氏漢州人，年二十三。卞氏海陵人，年與羅氏同。彭氏與卞氏同郡，其年與徐氏同。段氏大甯人，年十八，其先死者也。公名元紹，字仲昭，實宋魏王廷美之裔。其先以避禍，易今姓。未復云。銘曰：生也同其天，死也同其時。而瘞又同其封，壤樹蕭條，匪子之宮。尙卜高原，以永無窮。

田按七姬權厝志：張羽文、宋克書、盧熊篆。嘉靖間石始出。文徵仲跋云：僞周據吳日，開寶賢館，以致天下豪傑。故海內文章技能之士，悉萃於吳。其陪臣潘元紹，以國戚元勳，位重宰相，雖醜酒嗜殺，而特能禮下文士。故此石出於倉卒之際，而一時文章書字，皆極天下之選。陳基夷白齋集有羣珠碎詩云：繡紋刺綺春纖長，鬪膏鬢髮瓊肌香。芳年豔質媚花月，三三兩兩紅鴛鴦。翠靴踏雲雲帖妥，海棠露溼胭脂柔。冶情紛作蝶戀花，新曲從翻玉連鎖。畫堂銀燭天沈沈，揚眉一笑輕千金。明珠買得綠珠心，欲揮魚腸掃妖彗。主君勿疑心似醉，一宵痛擊羣珠碎。門前鐵騎嘶寒風，奇勳解使歸元戎。此詩亦爲七姬作也。余又檢鐵崖樂府有金盤美人歌，序云：刺僞駙馬潘某也。潘娶美媚凡數十，內一爲蘇氏，才色兼美。醉後尋其罪殺之，以金盤薦其首於客宴。絕類北齊主事。國亡伏誅臺城，投其首於溷。歌云：昨夜金床喜喜薦美人體，今日金盤愁愁薦美人頭。明朝使君在何處，溷中人溺血骷髏。君不見東上琵琶骨，夜夜鬼語啼笳篴。潘暴戾如此，而七姬甘爲之死，亦異矣哉。

## 宮女圖

女奴扶醉踏蒼苔，明月西園侍宴迴。小犬隔花空吠影，夜深宮禁有誰來。

列朝詩集吳中野史載：李迪因此詩得禍。余初以爲無稽，及觀國初昭示諸錄，所載李韓公子姪諸小侯爰書，及高帝手詔豫

韋侯罪狀初無隱避之詞。則知季迪此詩蓋有爲而作。諷諭之詩。雖妙絕今古。而因此觸高帝之怒。假手于魏守之獄。亦事理之所有也。論者詳之。

徐軌本事詩。按袁山堂外紀。載洪武間。金華張尙禮爲監察御史。一日作宮怨詩云。庭院沈沈畫漏清。閉門春草共愁生。夢中。正得君王寵。卻被黃鸝叫一聲。高帝以其能摹寫宮闈心事。下蠶室死。此事正與季迪相類。

靜志居詩話。世傳侍郎因宮女圖詩。賈禍。孝陵猜忌。情或有之。然集中又有題畫犬詩云。獨兒初長尾茸茸。行响金鈴細草中。莫向瑤階吠人影。羊車夜半出深宮。此則不類。明初掖庭事。或是刺唐申君而作。好事者因之傳會也。

楊基四首

基字孟載。其先嘉州人。家於吳。爲張士誠記室。明初安置臨濠。旋徙河南。放歸。起爲滎陽知縣。召至京。改太常典簿。再謫鍾離。被薦爲江西行省幕官。以省臣得罪落職。復起奉使湖南。廣西。授兵部員外郎。出爲山西按察副使。進按察使。奪官。輸作。卒於工所。有眉菴集十二卷。

陶宗儀書史會要。楊基正書師鍾元常。行草師二王。畫史會要。孟載善山水竹石。

麗堂詩話。楊孟載春草詩最傳。其曰。六朝舊恨斜陽外。南浦新愁細雨中。曰。平川十里人歸晚。無數牛羊一笛風。誠佳。然綠迷歌扇。紅襯舞裙。已不能脫元詩氣習。至麗爲看山盡捲西。更過纖巧。春來簾幕怕朝東。乃豔詞耳。

南濠詩話。世稱高楊。張徐孟載詩律尤精。如云。花無桃李非春色。人有笙歌是太平。一官不博三竿日。萬事無過兩鬢星。予愛其閒曠。及亂。世身如危處立。異鄉人似夢中來。千金已廢牀頭劍。一字無存架上書。則又歎其困窮。如云。紅雨落花來袞袞。綠波芳草去迢迢。六朝舊恨殘陽裏。南浦新愁細雨中。予愛其含蓄。及云。柳色嫩於鷓破殼。蘼蕪斑似鹿辭胎。小雨透花青見萼。輕雷催笋碧抽尖。則又驚其新巧。至翠袖錦箏邀上客。畫船銀燭照歸人。高樓錦瑟花連屋。深巷珠簾柳映橋。則又見其情致。

之綺麗矣。宣王石鼓青苔澁，武帝金盤玉露多。八陣雲開屯虎豹，三江潮落見鼉鼉。則又見其氣象之突兀矣。他如半醉半醒，花冉冉，閒愁閒悶，雨沈沈，恨不髮如春草綠，笑曾花似面顏紅。萬里歸心鷗送客，片時殘夢鳥驚人。則又優柔痛快，而無牽合排比，其亦詩人之豪者哉。

詩藏楊孟載，結客少年行，用沈君攸體，如豪名獨擅秋千社，俠氣平欺蹴鞠場。白璧一雙酬劍客，明珠千斛買胡姬。金丸挾彈，章臺左，寶騎聞箏太液旁。梅子隔牆羞擲果，桃花深院笑求漿。等語，視沈作遠過之。又岳陽一首，壯麗欲亞孟浩然，其末句，何人夜吹笛，風急雨冥冥，尤爲膾炙。

明詩別裁，楊孟載七言短古，原本李頎，常建，諸公。

田按孟載少負詩名，楊鐵崖來吳，下于坐上，屬賦鐵笛歌，卽效鐵體歌云：鐵崖道人吹鐵笛，宮徵嚙含太古音。一聲吹破混沌竅，一聲吹破天地心。一聲吹開虎豹關，彤庭跪獻丹宸箴。問君何以得此曲，妙諧律呂，可以召陽而呼陰。都將春秋一百四十二年筆削手，譜成透天之竅。價重雙南金，掉頭玉署不肯入，直入弁峯絕頂，俯瞰東溟深。王綱正統著高論，睡彼傳辭兼書淫。時人不識我不厭，曾有使者徵球琳。具區下浸三萬六千頃之白銀浪，洞庭上立七十二朶之青瑤岑。莫邪老鐵作龍吼，丹山鳳舞江蛟吟。勗哉宗彥吾所欽，赤泉之盟猶可尋。更吹一聲振我清白祖，大鳴盛世載寶阜財解慍南風琴。鐵崖得此詩大喜，挾與俱東，謂從遊者曰：吾在吳，又得一鐵，優於老鐵矣。此詩雖不見工，然對客揮毫，可以想其豪宕之氣矣。眉菴集中，不乏冲雅之作，特才華爛漫，時傷纖巧。弇州摘其判醉望愁醒，愁因醉轉增，是詞中菩薩蠻語，尙短柳如新折後，已殘花似未開時，是浣溪沙調語。竹垞附刊之，摘至數十聯。昔人評蘇子瞻詞是詩，秦少游詩是詞。弇州竹垞所云，固未損其聲價。

### 白門蒼高二聘君

結交貴知己，不在早與遲。嗟我識子晚，深淺唯子知。每於朋儕間，擊節賞我辭。前年吳城破，子居我西馳。

交遊非不多。獨念與子離。相去日已遠。數與禍患罹。道路傳我死。可信子尙疑。日暮過我廬。爲我涕交頤。今年我還京。適子應詔來。握手發長歎。示我夢我詩。我昔患難中。精爽無不之。而子獨夢我。與子若有期。方子夢我初。正我念子時。春風鳥嚶嚶。花落滿故枝。爲買一斗酒。痛飲春江湄。生死固常理。勿爲達士嗤。

田按孟載與季迪。交分不淺。青邱集有贈楊榮陽詩云。嘉陵美山水。亦復富文彥。楊君產其邦。材拔性高狷。平生眼無人。遇我獨相善。陌頭每並出。兩騎無後先。喜從兔園遊。慚受狗監薦。君歌我固服。我賦君亦羨。有時出城西。山水恣攀踐。龍門剝陰苔。高什記題徧。歡遊正相酬。世事忽驚變。朋儔半死生。一往如激電。我棹返江溇。君車赴淮甸。旋聞逐流人。居濠又移汴。聖恩忽加憐。收拔佐山縣。卑曹敢云辭。執版謁府掾。低飛蓬蒿間。不異雉帶箭。有親寓京師。年老闕供饌。欲奉朝夕歡。去職胡敢擅。晨上宰相書。得歸遂微願。我時別君久。聞訊愧無便。空題憶君詩。細字書滿卷。今春被詔起。前史預編撰。始來長干門。楊柳正飛燕。蓬君風塵餘。不改舊顏面。握手話苦辛。悲喜雜慶唁。據此則孟載令榮陽後。以養親得告。來遊白門。而季迪適以修史至。兩人酬唱。情誼何其深摯也。又青邱集中。有次韻楊儀曹雨中。次韻楊禮曹移疾。五律二首。初不知儀曹所指何人。及檢徐幼文集。有次韻楊孟載詩。正與青邱二詩韻合。據此則孟載嘗官禮曹矣。孟載寓江甯。村居寫懷詩云。囊無太史新頒歷。衣有容臺舊賜香。張來儀續懷友詩云。寶筵罷醇醲。容臺淹下秩。下注云。懷嘉陵楊典簿也。據此則孟載官太常典籍矣。云禮曹者。太常統於禮部也。又劉子高有奉寄楊使君孟載詩云。憶昔京闈初相逢。承詔作樂調笙鏞。形闌春樹集鸞鳳。畫省秋水開芙蓉。江西徵選入司馬。天上兵曹助聲價。據此則官禮曹當在江西幕官之前矣。徧檢明史。及列朝詩集。明詩綜。江東之眉菴集序。劉子威續吳先賢贊。均無言孟載官儀曹者。而余以數詩鉤稽得之。姑附見於此。以補孟載仕履之闕云。

題宋周曾秋塘圖有序



右宋周曾秋塘圖一卷。前元皇姊大長公主所藏也。前有皇姊圖書印記。後有集賢翰林諸詞臣奉皇姊教旨所題。自大學士趙世延、王約而下。凡十六人。時鄧文原、袁伯長俱爲直學士。李泂以翰林待制居京師。爲監修國史。實至治三年也。元運方隆。皇姊雅尙文學。一時名公鉅儒。以文章翰墨。寵遇當時。其盛蓋可想見。元旣革命。此卷遂出江左。吾友薛起宗得於其私沈祥氏。一日攜以見示。且徵題詩。余雖不獲援筆其間。而一十六人者。猶及親炙一二。袁、鄧二老。又皆先子之友。不可作矣。把玩再四。敬題于後。

陂塘九月菰蒲老。菱葉無多荷葉少。無數飛來白鷺明。一羣遊去青鳧小。寒雲弄影忽成霞。雁帶斜行下淺沙。晚色不隨流水去。秋光都在拒霜華。當時內殿春風細。紫衣傳教詞臣醉。鮑謝文章沈宋才。詩成曲盡秋塘意。塘水秋來景漸疏。低煙斜日照平蕪。鴛鴦去盡芙蓉死。空向人間看畫圖。

聽老京妓宜時秀歌慢曲

春雲陰陰圍繡幄。梨花風緊羅衣薄。白頭官妓近前歌。一曲纔終淚先落。收淚從容說姓名。十三歌學郭芳卿。先皇最愛芳卿唱。五鳳樓前樂太平。鼎湖龍去紅妝委。此曲宜歌到人耳。潛向東風作慢腔。梨園不信芳卿死。從此京華獨擅場。時人爭識杜韋娘。芙蓉秋水黃金殿。芍藥春屏白玉堂。風塵回首江南老。衰鬢如絲顏色槁。深歎無人聽此詞。縱能來聽知音少。說罷重歌爾莫辭。我非徒聽更能知。樽前多少新翻

調一度相思一皺眉。

田按青樓集順時秀姓郭氏字芳卿高季迪聽教坊舊妓郭芳卿弟子陳氏歌云燕國佳人號順時蓋順時秀芳卿別號也又云回頭樂事浮雲改瘞玉埋香今幾載世間遺譜竟誰傳弟子猶憐一人在蓋謂芳卿死後弟子僅遺陳氏一人也又云江南年少未曾聞元是當時供奉曲孟載此詩亦云風塵回首江南老蓋二人聽歌同在江南則所謂宜時秀者當卽陳氏之別號也孟載又有贈宜時秀絕句云欲唱清歌卻掩襟晚風亭子落花深坐中年少休輕聽此曲先皇有賜金

寄楊鐵崖先生

不見雲間楊鐵史。寮中七客近如何。老來詩句疏狂甚。亂後文章感慨多。長笛參差吹海鳳。小瑤楊柳舞天魔。春明且盡嬉遊樂。莫解梁鴻五噫歌。

田按鐵崖文集七客者志云抱遺老人嘗得斷劍於洞庭緱氏子鍊爲笛又得古琴於赤城相傳賈師相故物得胡琴於太陵呂氏得管於杭老宮人所云宋道君內府物又得玉帶硯一古陶甕一硯爲文文山之手澤甕爲秦祖龍藏中器也旣而闢一室以居六者老人時燕居其中六者皆以客待之而又命之名鐵笛曰洞庭鐵龍君琴曰赤城焦氏秋胡琴曰西域斛律珠管曰象山管氏同硯曰文山石帶玉甕曰陶氏太古春老人以不遇於世又自客六者之間而七焉纔而顏客之所曰七客者之寮孟載此詩所云寮中七客卽謂此也抱遺老人鐵崖別號也

張羽十一首

羽字來儀潯陽人徙於吳元末領鄉薦爲安定書院山長洪武初徵至京應對不稱旨放還再徵授太常司丞坐事竄嶺南未半道召還自知不免投龍江死有靜居集六卷

書史會要張羽喜臨蘭亭帖

李日華六硯齋筆記張來儀不獨能詩兼亦善畫曾臨高房山小幅感而作歌有云我縱有心嗟欲老又云乾坤浩蕩江湖闊縱我執筆嗟何從蓋深心於是者

畫史會要張靜居畫法米氏父子筆意最妙亦喜高房山曾臨其小幅山水有五峯秀出青芙蓉雲氣鬱鬱如遊龍之句國雅張司丞來儀體裁精密情喻幽深頗似錢郎其送僧還日本云杖錫去隨緣鄉山在日邊徧參東土法頓悟上乘禪呪水歸龍鉢翻經避浪船本來無去住相別與潛然字字沈著至遊山寺句有松老知僧臘禪空悟佛心或譏其剽竊韓柳僧臘禪心語也昔子卿有明月照高樓想見餘光輝子美有落月照屋梁猶疑見顏色不以爲病今來儀用老知空悟虛字轉妙余近題南林禪院亦云門前流水經行意湖上青山宴坐心寓目得句偶與此合豈有意述古耶

田按來儀榜所居曰靜者居因以名集高季迪有靜者居記云今有人焉處空谷之中棲長林之下干戈之聲不聞車馬之迹不至其居靜矣而利祿之念不忘於心窮約之憂每拂乎慮雖夸然而行塊然而坐顛倒攪攘無異奔驚於埃壙者子謂其靜者乎又有人焉遊於邑都宅於市里鄰有歌呼之喧門有造請之雜心倦乎應答身勞於將迎其居非靜矣而抱廉退之節慎出處之誼雖逐逐焉羣於衆人而進不躁忽視世之揮霍變態倏往而倏來者若雲煙之過目漠然不足以動之子謂其非靜者乎季迪此言庶幾知退者而卒與禍會亦所遭之不幸也來儀送季迪赴壘詩云天網詎恢恢康莊徧榛菅讀之良可悲矣來儀五古可肩隨孟載七古奔軼絕塵超孟載而上之特方之季迪尙非其倫如蚪髯客見太原公子未堪并驅中原

題陳長司書是其臨難時作

若人悟縣解委蛻順天刑慷慨赴東市一日爲千齡李公悲上蔡陸子喟華亭識機若不豫達生良可經朱絃亦易絕仄景不可停從容洒芳翰炳煥若丹青好藝永傳世精魄長歸冥披圖懷平素涕淚緣襟零

列朝詩集陳惟允洪武初官濟南經歷坐法死臨難從容染翰畫畢就刑張來儀記其事惟允西市之日能以翰墨結習遺語至怖視稽生琴夏侯愨尤爲難事以兵解之法推之謂之畫解可也

題赤城霞圖送友歸臺

結髮好名山。遨遊遍吳楚。東遊不到天臺路。長憶與公賦中語。赤城煥高霞。翩然空中舉。靈溪碧草春。淒淒瀑水和風響。秋雨我欲振金策。飄飄凌九垓。遊神不死庭。迴光眺瓊臺。手招丹邱人。共臥石上苔。紅顏去人不復返。老大求仙嗟已晚。生今一去愁人心。贈生赤城圖。聽我赤城吟。勞勞亭下一杯酒。離愁萬里生秋陰。客車明日當早發。雲颿孤飛度東越。國清寺前千尺松。歲晚應歸望山雪。道逢塞山子。爲寄相思情未絕。山人若欲知我心。五界峯頭看明月。

徐黃門畫

黃門給事三十餘。面如紅玉少有鬚。風骨豈是山澤癯。問著只愛山中居。前年版下鶴頭書。徵起直上青雲衢。文華堂高凌紫虛。出入侍從陪金輿。排方小帶紅羅襦。精神宛如馮子都。朝下手拈八尺笏。左旋右轉風生軀。有時自擘雙雕弧。命中疊發誰爭呼。歸來賓客滿直廬。京城酒貴不住酤。爛醉坐叱蒼頭奴。執燭寫此雲山圖。方今臺閣多文儒。似君才藝衆中無。文宣侍中武金吾。不負堂堂美丈夫。山中故人交不疎。十年貧賤長相俱。升沈忽如鳥與魚。麋鹿敢逐夔龍趨。見君此畫恆嗟吁。關西行李今何如。祝君名成

歸五湖來尋高陽舊酒徒。何辭解衣貫百壺。與君痛醉黃公墟。

韓介玉畫爲童中州掌教題介玉乃張仲舉門人

我識河東老詞客。鶴骨伶俜長八尺。白頭徒步拾公卿。人生變化誰能測。將軍跋扈天爲傾。公持寸管力與爭。當時直氣動朝野。至今文采傳諸生。諸生白面今已老。三載儒冠空潦倒。罷歸百事無所爲。萬壑千巖恣揮掃。丹邱元圃落眼前。澗水松風鳴浩浩。由來絕藝出天機。肉眼紛紛爭醜好。吳興博士今鄭虔。故山未歸雪滿顛。今年召對席屢前。蒙恩親賜水衡錢。歸來見畫心茫然。拄杖欲問金華船。金華之洞小有天。下與五岳相鉤連。初平鍊丹去成仙。弟兄聯袂風翩翩。洞前白石如羊眠。我欲訪之何由緣。要得與子相周旋。饑餐紫霞拾瑤草。不止一笑三千年。

戴山迎送神曲

山蒼蒼兮多木。橫絕四野兮下無麓。懽遠望兮登高。神不來兮勞予目。煦煦兮雅雅。靈修儼兮紛來御。叶胡不來兮夷猶。將誰須兮遠者。芳莫芳兮澗有萍。潔莫潔兮卣之清。雲爲蓋兮霓爲旌。神之來兮山冥冥。絳闕兮朱堂。冠余山兮神所宮。神之愉兮旣降。叶翾龍駕兮雲中。屢舞兮僊僊。紛進拜兮庭前。靈天姣兮好服。神弗言兮意已傳。牲不實兮酒不旨。將淹神兮神安止。神弗止兮福遺我。事夫君兮長無已。

懷友詩有序

周道方殷。猶歌伐木。陶情無慕。尙賦停雲。況屬時艱。久乖朋好。欲據契闊。實藉篇章。自牛文學而  
下得廿三首。因懷成詠。不以爵壽爲序。徐需續賦。用繼末篇。

念君多苦節。亂後竟悠悠。古巷青襟散。空闌白髮愁。近書無片紙。舊業有扁舟。最憶相尋處。柴門獨樹秋。

韓徵君相

破宅臨湖住。閒身過鶴長。逢人矜俠氣。遇難恥儒裝。有婦頻修藥。無兒解捧觴。從來多遠志。今日在何鄉。

華孝廉野

送別記初春。書來報哭親。干戈方滿目。衰墨未離身。文體高如命。官程拙似人。曾聞舊徒說。懷德易沾巾。

唐助教蕭

灑掃空齋住。渾忘應世情。身閒成道性。家散剩詩名。古器邀人玩。新圖揀客呈。窮怡山水興。垂老失時平。

倪山人墳山

曾住潛龍地。逢人話昔緣。行高生俗敬。法勝怪師傳。沙鳥聽朝梵。胡奴伴夜禪。未應愁末劫。塵想自成憐。

沙門懷渭

聲譽徧時流。風沙慘弊裘。泛交通俠士。長揖說諸侯。夜雨菱湖館。秋風剡水舟。從來爲客慣。漂泊可無愁。

胡參政鉉

李日華六硯齋三筆。張來儀博學有高致。善畫。以摩詰爲宗。世不多見。周敏仲攜示一卷。雲林蕭疎。煙岫出沒。乃平遠之佳者。來儀詩澄淡婉逸。與徐幼文、張伯雨並行。卷中有懷友詩二十三首。人占其一。然獨及倪山人瓚。而幼文輩不與。想此詩作於蕲黃盜起後。各自避戎離散。因而興懷。故所舉不同耳。來儀書法纖婉有異趣。髣髴謝莊月賦。亦墨寶中結璘火齊也。詩本集逸去。今錄於此。

田按來儀懷友詩不及季迪、孟載、幼文、止仲、唐弼。蓋作詩時同在吳城園中。來儀本集有續懷友詩序可考也。懷友詩自牛文學諒以下廿三人。懷牛文學云。名高登第後。俸歇喪親時。諒於元蓋曾登第者。此可與張志道詩稱諒爲元末甲午大魁相印證矣。





# 明詩紀事卷八

## 甲籤

徐賁三首

賁字幼文。其先蜀人。徙常州。再徙吳。張士誠辟爲屬。已謝去。居湖州蜀山。吳平。謫徙臨濠。洪武初。用薦奉使晉冀。還授給事中。改御史。出按廣東。改刑部主事。遷廣西參議。再遷河南左布政使。以事下獄死。有北郭集六卷。

國雅。徐方伯幼文。詞彩道麗。風韻灑朗。殆如楚客叢蘭。湘君芳杜。每多惆悵。皋亭山作。全佳。當似耿澹。余嘗愛其折蓮子絕句。云。柔絲零落芳心苦。未及秋風已斷腸。讀之頗增悲慨。集中有送曾伯滋赴西河將幕云。上將初分闔。儒官解習兵。風旗春獵野。雪帳夜歸營。洮水從岷下。祁山入隴平。知公能截筆。草檄報邊聲。中二聯並佳。

王穉登吳郡丹青志。徐幼文畫山水。林石。瀟灑可愛。六硯齋三筆。徐幼文作繪。清澗恬雅。所題楷筆。亦秀整端慎。不爲沓拖自恣。今得觀其草書。泰山紀遊三詩。雄緊跌宕。出入旭素。無不淋漓快健。乃知古人之不可測也。詩云。萬仞峯頭上帝居。紫宸絳節接清虛。崑崙尙想周王制。蠱蠱猶傳秦相書。盤礴三齊橫地軸。孤根西北接天樞。自是仙人真窟宅。願得安期一起予。其二曰。山下更衣路漸難。巖巖高上歷巉峴。天關遙控三千里。煙磴斜懸十八盤。復殿尙留元狩碣。老松仍挂祖龍官。怪來爽氣清人骨。玉峽流雲瀑布寒。其三曰。翠削芙蓉倚碧霄。盤空霞磴度飛輶。絕壁金銀雙闕迴。澄空鐘磬萬山岑。天門過雨嵐光合。日

觀標霞海色遙。穹碑讀罷占遺跡。欲共元暉問沈瀟。畫史會要陳仲醇云。幼文字學晉王虞。畫法董源。曾于項氏見之。本事詩。楊孟載夢錄軒序曰。余與幼文同謫鍾離。結屋四楹。幼文居東。余居西。詩云。去年吳城正酣戰。卻憶危樓望葱蒨。今年放逐到長淮。萬綠時於夢中見。因題其室曰夢綠。幼文紀夢詩云。夢裏綠陰芳草。畫中春水人家。何處江南風景。鶯啼小雨飛花。又聽歌云。纔得聽歌便淚垂。眼前不似舊題時。青春多半遭離亂。白髮能消幾許悲。知其身傷離亂。又遭逢遷謫。故閒情之作。亦復淒楚。

田按季迪與幼文投契不淺。季迪送徐七往蜀山書舍詩云。獲君乃瑚璉。顧我猶斗筲。高懷矯衰薄。雅音變哇咬。談詩辨六義。讀易窮諸爻。情親豈殊意。氣合真同胞。因依輪輻暢。和諧壤。妓席夜留宴。僧扉晝搗敲。要眇送謳唱。翻翻雜詠調。北郭秋夜。喜徐幼文遠來。兼送南歸云。東海徐君我同里。日共周旋接冠履。斯人自是真可人。不見心憂見之喜。懷徐七云。客行日已遠。我思日已積。東南望歸棹。鳥去煙波夕。憂來不成言。滿抱空戚戚。徐記室謫鍾離歸後。同登東邱亭云。同上高亭一賦詩。喜逢君是謫歸時。不然此日登臨處。應望天涯有遠思。可謂情溢言外。幼文詩才不及高楊。張而陷矩中規。亦自善用其短。詩集稱北郭。而呂志學跋幼文惠山圖云。幼文所製樂府詩文若干卷。籤題悟澹集。此又讀幼文詩者所當知也。

蜀山在吳興弁山南十里

喧囂厭已久。閑居喜茲遂。茆茨起高明。澗道入深邃。鑿牖通震方。開扉面離位。藩編槿雜篁。壁補蘿牽荔。并欄旋解苞。田植齊吐穗。溪山固可娛。風雨亦足庇。到日始八九。良友得三二。客情卒難愜。人性頗煩記。時具茶果招。或攜酒肴餽。感激壯歲心。慰藉平生意。茲欲尋幽期。弗暇理事塵。諸方未遍遊。近處聊一至。指引賴苾芻。隨行有童稚。陟怯危磴欹。瞰訝頽岡陂。褰蔓悟險途。披叢見傾隧。緩流似矜清。舊藏欲呈瑞。

變綠亂葦。發賴老葉醉。深村羈旅絕。荒山古祠闕。匡攢紫閣陰。松映綺疏緻。聖像委蒙塵。靈幡颯驚吹。青史失記名。朱榜但題諡。庭空衆草羅。地僻百蟲蚊。鳴禽語供弦。飄雲影翻幟。螢停暗帷燈。蝸篆仆碑字。柏瘦蟠輪困。瓠子懸重腿。喬林神鴉號。卑薄鬼蝶戲。螿虛泉脈通。級夷石髮被。怒蛙恆瞋睛。癡螳忽掉臂。鼠行黠無聲。蝓旋馴有次。壞柱腐耳垂。敗几蒸眼潰。絲颺胃蠹蝻。鱗飛見魑魅。螟蝻供後花。猿窺祭餘器。浮煙不熏爐。溜雨常停罈。崩垣竄驚鷹。崇檐巢惡鴟。野蒿食復生。園棗啄將墜。牧笛秋霜清。樵歌晚風遲。嵐光凝積愁。谷氣如發喟。對景獨感懷。覽物各求類。耀祝勞遠陪。慵僕倦久侍。歸時羣動息。日腳在平地。

### 陽臺

靜志居詩話。張來儀先從吳移居戴山。以詩招幼文云。吳興好山水。子我盍遷居。繞郭羣峯列。迴波一鏡如。驚餘卽宜稼。樵罷亦堪漁。結屋雲林下。殘年共讀書。幼文乃移居蜀山。兩山蓋相望也。

昔聞陽臺名。今上陽臺路。我因興古懷。驅車暫停駐。餘基尙突兀。雲雨自朝暮。哀猿失故聲。野色膽孤樹。當時襄王夢。曾與神女遇。幽冥事莫測。萬載誰能悟。平原互千里。巫山渺何處。淒涼宋公子。深情見遺賦。

田按此幼文晉冀紀行十四首之一。自識云。賁於洪武九年。往山西。與顧廉同受上命。問俗于晉民。自京師下長江。歷淮。蔡。入大梁。渡黃河。登太行。覽唐虞故都。周旋於吉。降。汾。沁。間。過雁門。代郡。回觀上黨。長平之舊迹。跋涉五千餘里。其間山河形勢。佳景殊俗。未暇盡述。姑賦其萬一。聊以擴晉之見聞云爾。史稱遺賁廉訪晉。冀簡其靈。惟紀行詩數首。授給事中。卽此詩也。詩綜已錄十章。輒復補此。

榮適爲永嘉余唐卿右司賦

遠辭華蓋居。來卜山陰宅。乍到俗未諳。久住地旋闢。屋廬尙樸純。楹桷謝雕飾。高營踞山跗。深甃逗泉脈。檐將狼尾苦。門用鼠筵織。缺垣唯補蘿。圮砌總蒙鶻。編籬限邇鄰。封棹表殊場。本來是野性。豈是耽地僻。學圃欲擬樊。爲功敢侔稷。甯惜勞外形。自甘食餘力。耕鋤限兒課。灌溉當僕役。破塊何咄咄。陳器亦粲粲。駕許俗士回。屐向鄰翁借。筐筥織湘材。鋤鍤鑄棠液。卓饜鷹嘴利。負蓑蝟毛磔。俯仰疲枯棹。沾灑漬襤褸。循畦行策蹇。偃林臥欹石。鎌披欲芟邱。刈削竟驅礫。值阜卽爲坡。遇凹就成洫。堤崩防密葭。竇隙拒亂棘。地同農畝計。區學井田畫。長畛縱復橫。曲渠廣還窄。接流引餘清。疏沼匯深碧。架桁秋實垂。籬落夏蔓羃。雨露加膏腴。糞土發磽瘠。識種題裏藏。辨類分行植。蒔法常按譜。候時卽看歷。蕨芽拳握紫。薑檠拇駢赤。兩合憐薊葦。叢生愛銚芑。初笳迸蟄雷。新薑長春蕨。雀弁莞葉峨。馬帚莽莖直。蕢繁微駘縣。瓠老枯瓣折。芍苗卷龍鬚。藥榦擁牛膝。黃獨雪晴收。紫萼露晞摘。陰階茂蓆萋。下田豐菲蔥。卷輪木耳垂。攢刺菱角射。秋筵采更稀。夜韭翦仍殖。芝芳凝海瓊。菱鬱點池墨。枸杞香可醪。竹筴熟堪臘。石皮被柔薄。土酥膾肥葍。細葍八饌鱸。鮮萋雜羹鮓。茶苦槩與儔。菘脆冰爲敵。菌櫨西蜀致。苜蓿大宛得。長縈苻帶流。亂簇陳絲繹。芹效野人獻。瓜爲天子副。決明纒一方。萑苳連數席。瑤糜慰渴心。玉延起羸疾。簞毒笑非喜。芥辛泣詎戚。盤根芽蕤壤。脫穎筍穿壁。搗香憐雞蘇。折甘嗜燕麥。粟腐切方圭。乳餅斲員璧。孕子櫻受剝。贅珣石被臧。

兔目淘夏槐。鹿角芼臘炙。善託諸葛呼。巢以元修斥。莧褻蔡守清。薇怨周節逆。邪蒿義所攘。穢姿理堪啞。薄利嘉拔葵。省謗惡遺蕙。窮饜齏酸黃。儉啖薤留白。閑情付田園。生意仰膏澤。莢齊翠疑剪。甲圻綠訝擘。掩冉煙際姿。蔥蒨雨餘色。始掇惜滓染。載滌畏蟲螫。新薦或在籩。薄湘亦須鬲。求久漸投醴。致爽遽沃醴。不煩僚友送。敬向先聖釋。對屠誇大嚼。燕客忻小摘。舛羞不過二。甕菹當飲百。未能著蔬經。安敢踰食籍。旨蓄足山廚。素供過香積。用茲卒歲年。庶得勤朝夕。賓魏徐見厭。厄陳顏自擇。潔畚士恥污。造橋盜懷恤。抱甕忿設機。授書誚求益。縱馬因致憂。吞蛭遂亡謫。萬錢柳復乞。片金華還擲。仕知呂姪妄。居味鄭人識。枕肱仲尼樂。傷指范宣扼。鼎臠固云嘉。食單亦足適。敷淡分所安。堪味欲易極。毋因口體累。遂使愆民德。

田按唐卿於越之桂桐里。治圃結茅。署曰菜薹。徧徵名流題咏。幼文此詩。最爲擅場。楊孟載舟入蔡河。懷幼文詩云。縱橫千字。威生筆。迭宕百韻。余公萊。卽謂此詩也。高季迪。姚獨菴詩。附錄於此。季迪詩云。桂桐里中君始歸。菜花滿園黃蝶飛。桔槔倚樹。長不用。江南雨多山土肥。方畦獨逸看新綠。晚食何須尙思肉。翠縷登盤春薹香。金釵出盎冬菹熟。我家亦在葦蕪鄉。秋風便。應歸共嘗。潮州司馬成何事。回首空愁萬足羊。獨菴詩云。余君抱奇言不誇。種菜擬學元修家。臨溪築廬競誅草。傍路樊圃多。編葭。長鑱短纜自成列。不與文筆相交加。畦界條條任橫縮。溝澮一一隨紆斜。種多不減三十品。分苗撒子時無差。漑灌未能。親抱甕。設計巧爲翻車。一畦旣傳渤海薹。五色更接東陵瓜。新菘脆美初研餚。嫩瓠肥白纔爆肥。馬齒忽驚齊發莢。牛乳始。識駢垂茄。芳心纏絲惡網蛛。老葉畫繒忻涎蝸。自能墾土不無穢。便可應候登柔嘉。長奴芟夷腳自赤。老婢採擷頭還靈。不令。篋宮混葵葢。以任鼎俎兼魚蝦。純美自適頗豪邁。游躡可辨何咄嗟。誰云小摘長傷指。我欲大嚼常搖牙。何時攜杖叩君室。且

需木耳并槐芽。苟能真率見情親。奚鄙酒薄兼尊汗。一食自足飽空腹。豈待薑桂烹雞鷓。丈夫不能知此味。五鼎日食成淫奢。君今措事慕諸葛。憂善隨處爲生涯。

余堯臣一首

堯臣字唐卿。永嘉人。爲張士誠客。明初謫徙濠梁。旋放還。授新鄭丞。有菜蕘集。

田按唐卿與楊基、張羽、徐賁、王行、王彝、宋克、呂敏、陳則、釋道衍爲高季迪北郭十友。季迪答余新鄭詩云。日高破窻煙未起。閉戶不絕哦詩聲。又云。須臾出君寄我札。上有秀句如瑰瓊。亦豪於吟事者。惜集不傳。僅見題秀野軒一詩而已。

秀野軒詩

溼翠浮草芽。空青散木杪。輕舟理橫塘。歸人渡清曉。棲鴉返故巢。潛鱗濯新藻。倒景淡斜暉。迴飈蕩晴昊。衡門夜不扃。燕坐事幽討。落葉秋自飄。殘花春慚掃。我欲往從之。稅駕苦未早。揮手謝孤雲。去去沒蒼徼。

田按秀野軒圖卷。乃朱澤民爲吳人周景安作者。澤民山水蒼潤清逸。此圖最爲名蹟。歷藏橋李項氏。江邨高氏。卷前周伯溫爲之引。首篆秀野軒三大字。卷尾題者二十一人。唐卿此詩亦在其列。今并綴諸公詩之佳者。附錄於此。高啓詩云。江晚洲渚交。雨晴草萋萋。前山靄欲圍。吾師度水歸。望煙知君家。花竹隱半扉。乍休田中耒。猶響林下機。此鄉卽桃源。亂後世有稀。開圖身已到。不知塵境非。徐賁詩云。何處問幽尋。軒居湖上林。竹陰看坐釣。苔跡想行吟。嶂日斜明牖。渚風涼到琴。相過有鄰叟。應只論閒心。王行詩云。高館罷零雨。前榮颺微風。霏霏碧蘿花。吹落酒罈中。移席俯流水。揮絃度秋鴻。透思獨樂意。邈哉誰與同。王彝詩云。古苔十畝青山麓。窈窕幽花映深竹。中有高人畫掩扉。裊裊藤梢上書屋。清風出谷灑秋香。返照穿林破春綠。不省睢陽畫裏看。細路經邱杖藜熟。徐達左詩云。春風十里翡翠屏。玉遮對峙峨眉青。清泉白石雜花竹。天放畫圖鍾地靈。高人開

軒當此景，酌酒賦詩，白日靜，四檐風作翠濤聲。八窗簾捲晴霞影，我亦托迹耕漁間，結屋讀書湖上山。抱琴訪子從茲始，布襪青鞵相往還。

### 王行一首

行字止仲，長洲人。洪武末，坐藍玉黨死。有半軒、楮園二集。

四庫簡明目錄：王行詩格清剛峻爽，在北郭十子內，與高啓亦稱勦敵。

筆精，吳郡王止仲國初布衣也。王文恪筆記稱其才敏，嘗識姚廣孝於未遇，余嘗得楊文敏公遺書，中有王行半軒文集十二卷，寫本也。其詩不甚多，如高館疏簾晚乍開，讀書聲裏故人來。山中本自無塵土，僅得家僮掃綠苔。清逸可誦。

田按北郭十子能畫者五人，幼文畫蹟流傳最多，孟載來儀，仲溫、止仲，今罕傳者。止仲喜潑墨成山水，時人謂之王潑墨，自題所作畫詩云：高館良宵睡思遲，葛巾重著半曛時。都將滿抱林泉興，付與閒窗墨半池。可想見盤礴之趣矣。

### 題雲林畫

每看新圖憶舊游，遠情閒景共悠悠。亂鴻沙渚煙中夕，黃葉江村雨外秋。亂後得安翻訝夢，醉來因感卻生愁。那能便結滄洲伴，重向煙波覓釣舟。

### 宋克一首

克字仲溫，長洲人。明初徵爲侍書，出爲鳳翔府同知。

劉鳳續吳先賢讚：仲溫謝客杜門，取蒲屣臨魏晉書，窮晝夜不廢，遂精其藝，真行草，皆有意稱妙盡古法。今所傳七姬志等類，鍾元常、祝允明論畫，謂如初筵忽見三代鼎彝，蓋亦天授，非人工能逮。時又有宋昌裔者，工力不減克，時稱精媚。

六硯齋二筆。宋仲溫書法急就。勁利古雅。鬚鬢鐘鼎。溢爲繪事。唯寫細竹。嘗見其作雞栖石叢篠一幅。題語極自滿意。有藝成不覺自斂手之句。蓋謂不可復得也。

畫史會要。宋仲溫善畫竹。評者云。雖寸岡尺壑。而千篔萬玉。蕭然無俗氣。曾在試院卷尾。以硃筆掃竹一枝。故張伯雨有偶見一枝紅石竹之句。

田按。明初書家。仲溫與宋廣稱二宋。合宋璫稱三宋。倪元鎮贈仲溫詩云。江上欣逢宋仲溫。蕭條古道向君論。我居笠澤已十載。看竹惟君款我門。又云。宋公天下士。畫竹就鼓琴。來我北渚下。相從論古心。元鎮不輕許人者。仲溫之品。概可知矣。

### 秋日懷兄弟

秋至憶兄弟。蕭蕭木落初。如何去鄉國。不見有音書。漂泊全與定。存亡半是虛。風塵幾時靖。還似昔同居。

### 呂敏二首

敏字志學。常州人。徙無錫。元末爲道士。洪武初。官無錫教諭。有無礙居士集。

田按。高季迪有送呂山人入道序云。山人少欲舉進士。遭時兵興。避地梁溪汾湖之間。閉門教授。服弊茹糲。以勤苦自厲。絕不干於人。久之。猶以爲未也。迺著黃冠。謝遣弟子。將東遊海濱。求大山長谷而居之。又贈之以詩云。海風寒拂紫鬚煙。初著黃冠已稱便。篋裏竟拋紅葉字。燈前唯寫碧苔篇。客窗炊黍回新夢。仙圃偷桃記昔緣。亦欲盡將書策棄。山中依子學長年。同時李延興。亦有送志學詩云。賦罷長楊戴鶡冠。笑人慕道不休官。窗間風雪三餘學。林下煙霞七返丹。白社年深成雅會。紫垣秋靜禮虛壇。夜窗欲問長生術。月轉西樓十二闌。蓋元末朝政不綱。賢者皆有托而逃。宋景濂入金華山爲道士。不僅志學一人而已。



再寄高季迪

空谷白駒那可羈。高踪祇欲慕天隨。吳江日去應無恙。甫里春來定有詩。花憶杏園攜酒日。雨思山館聽鶯時。去年亂裏從遊處。肯信于今又別離。

爲惠機長老題徐幼文寫惠山圖

天寒華表鶴歸遲。隔世令人起遠思。偶見漪瀾堂上畫。猶看悟澹卷中詩。幼文爲道機長老寫惠山圖。肆筆適麗清潤。而帶書法。幼文已矣。而畫獨存。感歎賦此。幼文詩籤題悟澹集。漪瀾卽惠山堂扁也。無錫縣庠呂志學題。實洪武庚申七月也。

陳則一首

則字文度。崑山人。洪武初。以秀才舉。授應天府治中。擢戶部侍郎。謫大同府同知。遷知府。

張大復梅花草堂集。陳文度少與高啓、徐賁、張羽、楊基相倡和。嘗賦紫菊。同社亟稱之。呼陳紫菊。

小孤山阻風寄止仲季迪

山葉盡霜飛。空菴出翠微。一僧同月宿。萬鳥合雲歸。地勢疑成峽。湍聲不過磯。自非風信阻。登覽亦相違。

唐肅十六首

肅字處敬。會稽人。元末官嘉興學正。洪武初。召修禮樂書。擢應奉翰林文字。兼國史院編修。以失朝罷歸。謫佃濠。有丹崖集八卷。

詩談唐肅謝肅驕驕並馳藝苑唐有子之淳克繼其學

國雅唐處敬山色元來蜀江聲直到吳月到翻經榻苔綠挂壁琴亦是高唱

田按處敬入吳與高季迪爲詩友季迪贈處敬序云余世居北郭同里之士有文行而相友善者王君止仲一人而已十餘年來徐幼文自毘陵高士敏自河南余唐卿自永嘉張來儀自潯陽唐處敬自會稽各以故居吳於是北郭之文物遂盛矣其移家橋李也贈以詩云杏花開北郭誰復共招攜其爲寓公增重如此處敬與謝密菴稱會稽二肅密菴集佚四庫館開從永樂大典錄出丹崖集收藏家尙有傳本迄今並峙藝苑核其詩品正不相下處敬兼長六法嘗自作梅石圖賦詩題之

送陶元庸

有酒澆趙州無酒酌鸚鵡不逢平原君何須識黃祖殺姬謝翫士茲事付塵土誰能愛文章甘受嫚罵侮  
丈夫氣蓋世身爲知己許蒼茫風塵際因子慨今古臨歧舞銅劍霜隼凌平楚去矣江國遙相思隔津鼓  
會上人臨流亭

長川流聲疊華構鬱翹翹翬飛涵綠淨洞敞納鮮飗遙窺衆峯碧仰睇孤雲飄開簾聞鷺鷥俯檻見遊鯈  
杜蘅旣春敷芰荷復夏饒以茲悟物理於焉解天弢

偕朱伯賢王叔閏過怱上人庵得出字

幽莖接重郭窮冬變陽律爰從隱者徒適憩禪子室翩翩花雨滿冉冉妙香出止水不生瀾空林長見日  
觀習神宇澄言忘道機密由來玄度高獨愛支郎逸

夜坐懷龍子高

暫別已覺久。重來杳難期。憶君山下屋。啜茗談新詩。君詩無今人。李杜期攀追。酒酣髮衝冠。燕歌激虹霓。壯哉江海士。天馬脫羈羈。如何舍之去。仗劍逐軍麾。韓鷹十二翮。傍人良苦飢。何當飛墮前。共此秋月輝。

題畫

春齋畫坐花落初。客來示予古畫圖。圖中人物誰所摹。衣冠似是晉代餘。中床獨踞美丈夫。烏紗籠髮蚪髯鬚。右手摘阮意自如。左手控絃分急徐。繞床六人皆麗姝。纖腰鬢髻長裙裾。一擎羽扇立床餘。一負塵拂髻柄朱。左右二姬意態舒。一垂短袂一鸞襦。一姬手中紙筆俱。濡毫展幅若有需。一姬執器製特殊。非簫非篥非笙竽。紛然列侍豔且都。爭妍競巧爲主娛。公忠世許王司徒。亦有短轅金犢車。還客此圖起長吁。

智伯頭飲器歌

飲伯頭些伯鬼。伯死甯知頭作器。玉盤酒滴腥腥紅。血波倒浸泥丸宮。雷吼無聲電睛墜。伏犀骨斷漆花膩。老龍一吸銀海漉。飲闌擲杯怒髮立。英魂夜半不敢泣。君不見君漆頭。臣漆身。恨君藍臺爭諫臣。

秋江圖

妾家住銀塘。石楠秋葉香。憶君蕩槳去。江水與愁長。西風夜泣蕩花露。鴨嘴岸低人不度。冷莎如鍼刺煙

素鴛鴦飛來鵝鵝去。

縉雲歸隱圖送陳魯山

高堂雪壁雲模糊。挂君縉雲歸隱圖。縉雲之山古仙都。千朵萬朵青芙蓉。側聞軒皇此云徂。至今瑤草甘露腴。陳侯十年戎馬劬。腰間厭帶黃金符。侯封廟食胡爲乎。不如還山尋舊廬。青林石道羊腸紆。上有裊裊哀猿呼。陳侯是時騎蹇驢。卓鞭微吟落日孤。山中之人夷皓徒。聞侯此曲應笑娛。丹泉釀酒香拍壺。玉桃如瓜味如酥。陶然一醉千日餘。侯不歸來實侯愚。

劉松年山居圖

曾逐大茅君。峯頭臥古雲。鳥青呼作使。鶴白養成羣。客較丹砂法。童窺玉券文。近來煙火斷。花氣作鑪薰。

送朗上人遊天臺

嵐翠溼袈裟。春寒礪未花。峯尖認華頂。鳥語譯頻伽。葉落常眠虎。瓜香不啖蛇。遙知齋鉢裏。仙女借胡麻。

蔡淵仲散木菴歸來圖

虎觀袖書罷。龍江返棹初。白金君賜重。黃髮宦情疏。浩蕩芝山色。蕭條散木居。春田猶及種。歸理白雲鋤。

鏡湖圖

自憐一曲有心期。不用黃冠詣闕辭。舟近香爐峯下泊。馬從酒甕石邊騎。春雲竹護方千島。霜樹鴉啼漢

守祠。面面屏風開水墨。輞川今日屬王維。

答虛室別後見寄

喜同溪上狎鷗羣。行看山光坐看雲。棋拂露枰松下著。藥敲煙碓竹間聞。飛觴酒許從頭飲。險韻詩教隔手分。爭遣別來相憶甚。正如前日未逢君。

錢塘書事

鬼馬蕭蕭踏暮雲。花奴嘵殺故將軍。雕弓不返腰間鞬。玉貌空嘵馬上裙。報國有心徒耿耿。馭兵無律竟紛紛。關西太尉非華胄。誰撰騏驎石上文。

列朝詩集此詩爲楊完哲而作。

雲林畫竹石

木落秋吟夜露翻。山空無人石榻寒。不似君家子午谷。雲旗晝下玄都壇。

應制賦海東青

雪翮能追萬里風。坐令狐兔草間空。詞臣不敢忘規諫。卻憶當時魏鄭公。

姚福青溪暇筆。洪武間翰林應奉唐肅。有應制賦海東青一絕。自記云。是日上御奉天門外西廡房。觀海東青。翰林學士宋濂。因陳曰。禽荒古所戒。上曰。朕聊玩之耳。不甚好也。濂曰。亦當防微杜漸。上遂起。嗚呼。我太祖聖明天縱。固非唐太宗所能肖。然宋公之直。誠不在鄭公之下。而肅之詩。亦可謂善於規諷矣。

謝肅十四首

肅字原功。上虞人。洪武中舉明經。官福建僉事。以事下獄死。有密菴集八卷。

戴良九靈山房集。密菴五言古。則本之魏。歌行則遵李杜。近體則祖少陵。他若山川之離合。土地之沿革。人物之廢興。可以正史策之訛謬。補志之缺略。紀行之詩。而至原功。可謂盛矣。

田按四庫提要。稱密菴集傳本久希。藏書家罕著於錄。惟永樂大典中所錄肅詩文頗多。採綴編次。歷爲八卷。我朝四庫館開。凡前人著作之遺佚者。無不甄錄。明初專集。如錢宰臨安集。藍仁藍山集。藍智藍澗集。鄭潛樛菴類稿。龔敦鶴湖集。皆從永樂大典錄出。原功古詩。樸健。七律尤爲到格。牧齋謂原功出按漳泉。有虎患。移文告境內之神。卽日遁去。今觀集中。有論虎行。自序云。將之泉南。道出興化。人云有猛虎。傷人者甚衆。余未信。薄暮而行。果遇虎。虎伏不敢動。良久將遁。辭以諭之。并示八閩官吏。詩云。當前立馬一叱虎。卒隸意氣方崢嶸。鍊籃焚香明奪晝。照耀崖谷無潛形。夫以卒隸之衆。焚香奪晝之明。虎雖猛。卽不逢按察。詎不遁且伏耶。原功之意。蓋以虎喻苛吏。其曰。我職分符省風俗。狐兔必掃豺虎逐。於菟踴躍最豪雄。嗚人肥已當先戮。其後劾布政使薛大昉不職寘法。有如此虎矣。世途附會其說。移文告神。虎遁出境。若宋均渡虎之事。不絕於後世也。異哉。

河陰渡

朝發武陟城。夕宿河陰渡。平原鬱蒼蒼。蔓草已多露。展我素氍毹。偃息並匡樹。洪濤與風會。恚若迅雷怒。揆余江海士。止遊隨所遇。一葦苟可杭。濟險亦奚懼。所念形影單。恆饑在長路。中田豈無稼。不受一飯顧。引領望故鄉。已復星漢曙。宣尼川上歎。使我獲深晤。

門有車馬客行送倪孝方

門有車馬客。意氣何桓桓。既持倚天劍。復戴切雲冠。自云報恩子。不畏行路難。有能遇國士。一語披肺肝。而我不解事。抱瑟齊門彈。知己諒難得。盛年嗟易闌。落拓走吳楚。與子聊遊盤。懷才既無補。竊祿非所懽。念彼古豪俊。豈必卑小官。逢時展經濟。乃使蒼生安。之子素倜儻。此道期相敦。明當別我去。贈以翠琅玕。

和楊鐵崖分韻顧仲英春夜樂

回文織就春機紅。郎君歸馬如飛龍。香閨畫屏燒絳蠟。小几清箏響銀甲。翠鳳纓炮白鹿烹。鬱金美酒玉花罌。瓊杯漱澹妾爲行。氣酣笑絕縵胡纓。大地有維天有柱。妾寧與心終事主。還憐獨宿含嗁婦。燕子樓寒半簾雨。

宋內門

何處前朝虎豹關。海鮮橋上雨斑斑。落花暮逐流觴水。芳草春迷疊石山。列帝玉京孤塔底。梵王金構夾城間。空餘往事南翁說。汎海龍舟斷不還。

題丹山赤水洞天

雲北雲南山萬盤。仙人宮闕俯巒岈。晴峯落影半天碧。雪瀑飛花六月寒。白日雙鸞翔玉宇。長年一虎臥瑤壇。桃花莫使春光老。遲我歸來轉大還。

送浙東憲史陳天祥歸永嘉

迎客臨江小小亭。官梅花發酒初醒。舟前浪起蛟門白。馬首風迴雁蕩青。進食吏人趨傳舍。索衣兒女拜中庭。會令憲法行中國。三尺鈇刀始發硎。

洪澤

東流澤受羣流廣。遠近雲飛倒影過。萬古蛟龍深處有。太陰雷雨四時多。牙船實欲通淝水。錦纜虛疑轉汴河。會整廢田重灌溉。楚農齊唱有年歌。

盱眙

長淮清泗東南闊。第一山當碧漢橫。勝地幾迴經戰馬。客舟千里聽號鷲。波濤晴動僧伽塔。草木春深義帝城。天際汴河來滾滾。陳留遺俗最關情。

入閶門

亂後閶門暫得歸。暮春三月馬駢駢。遺花也復如人面。柳絮依然點客衣。畫舸神仙流水遠。綵雲樓閣劫灰飛。姑蘇兩度看游鹿。莫倚東風問是非。

自査湖下湖頂還蓀溪

大査湖曲地透池。北轉蘿巖萬古奇。返照弄霞美女嶠。冷風激樹雁門祠。木樨穩載蘆簫響。小鳥驚看蓀



帽欹黃葉滿林茅屋近。不妨吟嘯過溪遲。

甲寅六月十五日夜蓀溪書舍玩月有懷任魯民先生時任已逝

嬾婦山高湖水深。狂夫遙夜發清吟。臨流團扇颺荷氣。玩月胡床轉樹陰。聊適灌園今日意。敢論經世百年心。乾坤俯仰相知少。愁對朱絃振古音。

再過積慶菴

厓谷盤迴路轉緣。日高猛虎臥庭前。好茶曾啜山僧椀。獨樹重維野客船。夏蓋峰青龍過雨。上妃湖白雁橫天。低徊謾盡登臨意。海寓蒼生已宴然。

七月十五夜太湖看月

震澤早秋秋月明。老夫此夜頗關情。三千餘里出閩海。七十二峰看洞庭。滉漾金波浮大地。淋漓元氣溼青冥。茫然錯料鷗夷子。倒載西施一舸行。

詠小桃用前韻

每愛天桃紅勝錦。桃紅何似客愁新。去年花裏曾傷別。萬里天涯又見春。芳景易隨流水謝。多情猶韻玉笙頻。劉郎白髮風流在。莫道尋真未遇真。



# 明詩紀事卷九

## 甲籤

孫賈十一首

賈字仲衍，南海人。洪武庚戌舉人，授工部織染局使，尋出爲虹縣主簿，擢翰林典籍，復出爲平原主簿，坐累逮繫，旋爲蘇州經歷，謫戍遼東，坐藍玉黨死，有西菴集八卷。

四庫總目：孫賈當元季綺靡之餘，其詩獨卓然有古格，雖神骨倚異，不及高啓，而要非林鴻諸人所及。黃哲、李德、王佐、趙介與賈，號南園五先生。哲之五言古體，祖述齊梁，德之七言長篇，胎息溫李，俱可自名一家。惟佐氣骨稍卑，未能駢駕，而介詩所存太少，不足以見所長。

黃佐明音類選，吳下四傑，嶺南五先生，大家輩出，莫不比與成音，其深於詩者乎。

詩談：嶺南孫仲衍、王彥舉、黃庸之、趙伯貞、李仲修，時稱五傑，惟仲衍清圓流麗，明珠走盤，不能自定，彥舉雄俊豐麗，殆敵手也。德慶李文彬，亦時勁敵，後瓊山邱濬，詞雖豐腴，勁秀則少矣。

國雅：廣中四傑，並有盛才，特闕於七言，如孫之蔣陵兒、次武昌、黃之戰城南，李之秋情等篇，能自邇出常境，綺嶠處亦類初唐語。

詩藪：孫仲衍驪山老妓行，瀟灑繁富，殆過千言，而中多猥冗，孫同時，嶺南黃哲，亦長七言古，才情少劣，氣骨勝之。

屈大均廣東新語。廣州南園詩社。始自國初五先生。越山詩社。始自王光祿。漸達。倫祭酒以訓。浮邱詩社。始自郭光祿。裴。王光祿學曾。訶林淨社。始自陳宗伯子壯。而宗伯復修南園舊社。與廣州名流。十有二人倡和。槩石洞云。東廣好辭。縉紳先生解組歸。不問家人生產。惟賦詩修歲時之會。粵人故多高致。乃爾。粵詩自五先生振起。至黃文裕而復興。陳雲淦云。太史公謂齊魯文學。其天性。粵於詩則有然矣。我國家以淮甸爲豐鎬。則粵應江漢之紀。風之所爲首二南也。五先生以勝國遺佚。與吳四傑。閩十才子並起。皆南音。風雅之功。於今爲烈。

本事詩。仲衍才調。傑出四人之上。卽吳中四傑。亦應讓步。

鄧球。沐化類編。孫賈博學善詩。豪逸足道。古爲宋潛溪高弟。太祖誅藍玉。賈嘗爲玉題畫。被逮將刑。口占一詩云。鼙鼓三聲急。西山日又斜。黃泉無客店。今夜宿誰家。旣誅。太祖問監殺指揮。賈死時有何言。指揮以前詩對。太祖怒曰。彼有如此好詩。汝乃不奏而遂殺之。何也。亦命殺之。

趙翼陔餘叢考。明孫賈爲藍玉題畫。臨刑口占云云。按此詩乃五代時江爲所作。爲建州人。值王氏國亂。其友欲亡奔江南。爲爲草投江南表。其友未出境。被擒。搜得稿。遂併收爲。爲臨刑詞色不撓。乃索筆爲詩曰。衙鼓驚人急。西傾日又斜。黃泉無旅店。今夜宿誰家。事見潯陽陶岳所撰五代史補第五卷。今乃移之仲衍何耶。豈仲衍被刑時誦此詩以寓哀。聞者不知遂以爲仲衍自作耶。

田按。仲衍與彥舉。庸之。仲修。伯貞。稱南園五先生。其實南園結社。抗風軒中吟侶。仲衍一一舉之。伯貞不與也。西菴集中。琪琳夜宿。與彥舉聯句。序云。疇昔年十八九時。一時聞人。相與友善。若洛陽李長史。仲修。鬱林黃別駕。楚金。東平黃通守。庸之。武夷王徵士。希貢。維揚黃長史。希文。古岡蔡廣文。養晦。番禺趙進士。安中。及其弟通判澄。徵士。訥。北平蒲架閣子文。三山黃進士。原善。共結詩社。南園之曲。豪吟劇飲。更唱迭和。而彥舉與余爲同庚。情好尤篤。獨不及伯貞名。黃才伯云。伯貞嘗以一囊自隨。遇景卽投詩其中。絕不爲人留題。縉紳恆病其狷。日往還西樵石間。獨與八十翁劉樂善。相倡和以自娛。方孫。王。李。黃。結社南

園更迭倡和而伯真自成一家言。世以四子並之稱五先生。此亦伯真不與結社之一證也。繼讀伯真聽雨詩。有云。南園多酒伴。有約候新晴。又似曾與南園詩社者。或入社較晚。故仲衍琪琳聯句序。偶不及之耶。仲衍於詩社中。獨推許彥舉。其作南園歌云。昔在越江曲。南園抗風軒。羣英結詩社。盡是琪琳仙。滄洲之盟。誰最雄。王郎獨有謫仙風。狂歌放浪玉壺缺。劇飲淋漓宮錦紅。青山日落情未已。王郎拂袖花前起。歡呼小玉彈鳴箏。醉倚庭梧按宮徵。哀絃冷冷樂未終。忽有華月出山東。裁詩復作夜遊曲。銀燭飛光白似虹。當時意氣凌寰宇。湖海聲詩萬人許。酒徒散落黃金空。猶臥茅檐夜深雨。讀此詩。可想見南園風雅之盛。迄今遊嶺海者。託爲美談。仲衍家有煙霞寄傲亭。當與南園抗風軒並峙不朽也。

### 輸役蕭牆

係組赴烏臺。解佩辭禁垣。弛刑許輸役。獲譴尙承恩。跼蹐感明宥。引咎復何言。平明換板築。日沒就徽纆。寒氣襲敝裘。重負頰我肩。撫己諒無愧。服勤思蓋愆。息杵入屏城。仰瞻東華門。祥光拂左纛。卿雲護彤軒。翬鳳麗羽翰。飛梭高中天。重關起象魏。光彩一何鮮。百辟羅周行。鳴珂翕鏘然。臬夔儼穆肅。董賈來翩翩。自日光昭融。下照甯有偏。微命嗟薄劣。獨茲阻周旋。

田按黃才伯廣州人物志云。仲衍爲平原簿。以事逮繫。有旨輸左校板築。蕭牆望都門。謳吟爲粵聲。督工者以聞。召至上前。陳所作詩。皆忠愛語。特命釋之。當卽指此詩也。

### 紫駟馬

紫駟馬。黃金羈。妾家夫婿金陵兒。金陵正值繁華時。日與遊俠相追隨。追隨遊俠金陵下。長跨金羈紫駟

馬賭勝初登蹴鞠場。縱酒還來鬪雞社。越羅楚練照晴空。飛鞍揚鞭去似龍。卻轉端門迴輦路。斜穿夾道過行宮。行宮夾道通三市。長使旁人誇意氣。紫陌春融錦繡連。青樓日暮簫笙起。青樓娼女研羅裙。清歌宛轉駐流雲。歌闌陌上春風度。舞罷樓前璧月新。陌上樓前相識多。相陪相引屢經過。房櫳寂寂交疏裏。雲鬢粧成奈爾何。

羅浮歌寄洛陽李長史仲修

亭亭西樵峯。宛在南海湄。日華麗仙掌。影漾金銀池。我昔偏舟恣長往。凌風浩蕩煙霞想。尋幽更欲探神奇。復向羅浮事仙賞。仙家三十六洞天。羅浮復與滄洲連。丹霞射影四山靜。羣真環珮來翩翩。藥珠之峯數十丈。君時與我緣蘿上。水簾直下飛晴虹。萬壑天風度流響。山中劉郎司玉臺。仙書授我琅函開。心如明月爛虛照。身與浮雲同去來。此時會合那能再。塵土分飛忽三載。我行奏賦登金門。君亦乘船渡淮海。淮海迢迢煙樹深。相思歲晚結愁心。長風萬里碧雲遠。何由一寄還山吟。山中洞房春寂寂。山中之人長嘆息。松花酒熟人不歸。瑤草春風幾回碧。

平原田家行

零星矮屋茆數把。散住榆林柳林下。磊牆遮雪防飄風。婦女頽垣拾磚瓦。黃牛買得新墾田。土戟犁淺牛欲眠。古河無水掛龍骨。自縈蒲繩探苦泉。山蠶食葉黃繭老。野火燒桑桑樹倒。四畔靈雞喔喔。九月霜

風落紅棗。春絲夏絹。輸稅錢。木綿紡布寒暑穿。夜舂黃米爲新酒。學唱清商作管絃。平田旱多麥少熟。杏盡梨枯惟食粟。衣粗食惡莫用悲。猶勝北軍離亂時。

題黃萬戶德清羅浮圖

將軍昔年在東都。虎頭鐵面專城居。重營柳暗流蘇帳。左掖花明金虎符。東都郊外多林壑。將軍公餘事行樂。露冕旌旌隘北山。行廚賓從如東洛。紫雲白雲千萬峯。羅浮更在二雲東。古木千章排疊巘。飛泉百道瀉晴虹。仙家洞天三十幾。羅浮復在滄洲裏。紫極房櫳倚日開。藥珠樓觀經天起。飡霞道士不知年。夜禮星辰誦內編。龍種玉芝耕赤谷。鶴啣瑤草下青田。將軍此時事幽討。追攀極欲凌穹昊。扶桑縹緲徐福舟。輦路依稀漢陵道。別來倏忽幾冬春。京洛相逢車馬塵。石室琅函仙夢遠。朱衣瓊珮歲華新。新圖誰爲將軍作。點染猶能記繇邈。雨過琪花定滿壇。星沈寶氣應連閣。我與將軍總可憐。遠遊經歲復經年。羅浮清賞如堪再。同賦陶潛歸去篇。

捕魚圖

小孤洲前春水綠。泛湖小船如小屋。白頭漁父不解愁。往來捕魚湖水頭。得魚換米納官稅。妻孥衣食長優游。大兒十三學網罟。小女七歲能搖櫓。江口賽神夜吹角。村邊賣魚朝打鼓。雨來維梢依古岸。風起鳴榔入長浦。荻芽短。桃花飛。鱖魚上水鱒魚肥。膾魚燒筍醉明月。蠻歌唱和聲咿咿。月明在天光在水。但

願年年只如此。無風無浪安穩眠。湖中有魚魚得錢。

次李陽河

櫓聲咿軋如人語。魚吹浪花作飛雨。停船把酒小孤山。頃刻回梢失前侶。危檣五兩飛向東。李陽河水起西風。江豚翻浪出復沒。舟人倚柁認晴虹。秋雲陰陰樹葉脫。樹頭黃雉猶聒聒。明日雲開楚天豁。

送翰林典籍張敏行之官西上

燉煌城下沙如雪。燉煌城頭無六月。關西勁卒築防秋。捷書夜半飛龍樓。九重下詔徵貔虎。推轂上將開都府。黃旗卷日大軍行。旄頭化石夜有聲。燉煌迢迢五千里。十月卽渡黃河水。上將翩翩才且雄。平戎不數貳師功。叱咤猶在輪臺北。匹馬已入渠黎國。左校偏裨晚射雕。倚鞍醉索單于朝。西山黑風吹墮瓦。霜角吹秋塞垣下。太平今見遠宣威。君往從戎幾日歸。幕下文儒兼解武。詞林從此有光輝。

田按敏行名訥。長安人。元進士。入明爲翰林典籍。其之官甘肅。衛經歷。宋景濂有序贈行云。敏行官典籍時。四庫之書多藏文華堂。堂在禁中。舊爲諸俊秀肄業之所。中使傳宣索書。卽啓鑰以上。一日上御東房。遙見敏行委蛇入堂。召而前曰。爾能詩乎。敏行研墨濡毫。跪寫以進。上覽畢悅曰。爾詩甚佳。由是日承顧問。特命爲甘肅衛經歷。賜內府金。以寵其行。凡所與游。皆爲賦詩。仲衍此詩。當卽此時作也。仲衍又有詩贈敏行云。文章堂上論交日。對榻哦詩白晝長。晴日畫簾窺水暈。暖風羅袂散天香。尋常應制才堪並。四十從戎鬢未蒼。春牛黃河冰片解。旄鷹幾日望燉煌。敏行蓋亦擅吟事者。惜賦詩可探。附見其事於此。

高郵



山日未出煙渺茫。高郵放船催下江。搖櫓唱歌白鷓子。過湖打鼓黃頭郎。烏拖雲葉低貼水。魚喫浪花高接窗。微官所得幾何計。吟鬢四十今蒼蒼。

采石太白墓

冠履何年墮世塵。先生元是謫仙人。春雲彩筆驚飛燕。暮雨滄江泣石麟。牢落清名元不死。衰遲大雅費誰陳。翛然我亦狂吟客。思殺風流賀季真。

次黃州

日落放船鸚鵡洲。漢陽煙樹白幽幽。江豚數起浪花夕。野鶴一聲山木秋。帆影掠雲過赤壁。櫓聲搖月下黃州。何因散髮林皋下。得似蘇仙爛漫遊。

黃哲五首

哲字庸之。番禺人。明初以薦拜翰林待制。入書閣。侍太子讀書。尋兼翰林典籤。出爲東阿知縣。遷東平通判。罷歸。尋坐法死。有雪篷集。

黃佐廣州人物傳。庸之刻苦讀書。通五經。嘗借文選手抄之。遂能作詩。性好山水。結廬蒲澗。往來羅浮。峽山。南華諸名勝。以爲未足。辭家度庾嶺。遊吳。楚。齊。燕。一時湖海英豪。皆與遊焉。當風雪時。泊舟秦淮。遇朱文昭。徐穎輩。相與握手吟咏。沽酒大噉。二人啗曰。君才如白雪。吾雖知音。如寡和何。自是益有名。

田按孫西菴應制賦醉學士歌贈宋景濂景濂集後附錄獨不載此歌西菴本集亦不錄殊爲缺典西菴集中應制遊鍾山諸詩亦不見好庸之官翰林典籤時左丞相徐達北伐捷聞太祖命賦詩稱旨未幾祈雨鍾山獲應御製七言詩志喜庸之復應命奉和云雨暘時若民乃康孰令僕旱憂吾王九土如焚嗟亢陽天津欲竭陰虹藏齊宮對越騰馨香眞宰默黷微休祥靈祇率職妖魃禳甘霖信宿仍汪洋白龍后土占歲穰黍稷報功王道昌小臣頌述歌虞唐巍巍端拱垂衣裳音節殊自高朗庸之非徒擅長風雅吏治亦復可觀知東阿時值旱麥苗盡彫乃齋戒徒跳烈日中詣洪範祠龍池禱雨詞旨哀惻甘澍應時優渥民驩呼曰此黃公雨也庸之有詩紀事云齋沐戒徒御星言趨絳壇屬茲愆陽序零祀馨衷丹龍湫宵深闕神物時蜿蟠馨潔始云薦靈祈紛可干沛然感敷施騰深濟多艱浙浙在林晚冥冥被岡巒魚原幸沾濡庶類同忻懼鳴鶴集穹窿翔麟躍紋淵郊垌悅童髦庠塾慶衣冠所協詠歸趣方希民俗安宴歌誦雲漢元化奚能殫誦此詩加見元魯山一輩人也

秋月篇

金商鳴素節。瑤律屆先秋。始見西陵月。嬋娟滄海頭。清規臨夜滿。澄影際天浮。媚浦沈珠迴。凝波淨練收。常懸鵝鵲署。初照鳳凰邱。碧落宵同映。銀潢曉共流。梁園生綺夢。陳榭感芳憂。爽浹征人袂。光含思婦樓。玉臺情未已。鸞鑑影空留。詎惜盈虧屢。仍知晦朔周。關山隨別騎。淇水送行舟。願逐餘輝去。蘭堂奉夕遊。

擬古

魯連天下士。夙蘊匡世才。卻敵愧論賞。英聲騰九垓。燕昭市駿骨。樂毅趨風來。虎戰躍中野。名成真壯哉。僕本江海人。西登鳳凰臺。感此千古意。長吟屢興哀。朝經夷門市。夕醉高陽杯。揮戈拂倒影。羲輪爲之迴。

寶匣絢青蓮。龍文拭輕埃。神光夜揮霍。按舞何嫌猜。騰驥爲君舉。願掃浮雲開。

### 臨高臺

臨高臺。高臺百仞凌雲開。丹霞曙色明九垓。咸陽王氣何佳哉。交疏結綺紛崔嵬。虹橋復道雲中來。直過南山表。雙闕遙連北極正。三階宛轉朱闌臨。渭水蜚廉觀閣通。天起銅龍高拱日華鮮。青雀驪巖月明裏。鳴璫搖珮溢層城。錦幄芙蓉翡翠屏。寶鼎香酥調玉食。金莖瑞露屑瑤英。瑤英玉食知難老。鸞鏡青蛾爲誰好。君王八駿上瑤池。日暮長門怨芳草。芳草年年換物華。瑤池歌管醉流霞。皆傳阿母桃成實。又獻安期棗似瓜。蟠桃碩棗真堪羨。方朔談諧侍驩宴。題詩爭擬柏梁新。求仙豈意桑田變。願得層臺更高重。崑崙西望接崆峒。能共赤松鞭彩鳳。仍隨軒后駕蒼龍。下顧淒淒茂陵道。惟餘隴樹生秋風。

### 醉歌行爲鄭復初雄飛昆仲賦

昨日風雨中。我來自西山。不知春早暮。花落長林間。林間幽人心事閑。相逢一笑開雲關。問我別來春幾度。五見飛花滿行路。黃橙丹荔繞池栽。水清離離照芳樹。登高酌我黃金壘。傾情寫意無嫌猜。攜觴復就花下飲。鳥啄餘花鋪綠苔。我惜落花君莫掃。乘興卽來坐芳草。江山如此多閔人。與君相期恨不早。君家伯仲多才雄。白眉更是人中龍。東山遺著謝公屐。百世行藏安得同。爾曹曾辭鶴書召。予亦蹉跎走荒嶠。華髮盈簪已自慚。烏巾折角從人笑。悠悠行路心。惟君可知音。南冠發楚奏。拂拭瑤華琴。商聲淒淒夜沈沈。

沈酒酣風悲月出林終然苦調不可聽爲君更賦還山吟他年訪我桃花洞洞口花殘春正深

送董文啓之江夏宰

委珮晨看拜玉除西游眞食武昌魚王孫碧草秋無際仙掌金莖露下初今日才名須卓茂當年詞賦說相如登臨若對南樓月待爾賓鴻寄尺書

王佐三首

佐字彥舉河東人移居南海洪武初用薦拜給事中有聽雨軒瀛洲二集

田按彥舉與仲衍蹤迹最密何左丞眞開府廣州兩人同爲書記後復同遊琪琳聯句彥舉酬仲衍詩云春風草檄將軍帳夜月聯詩羽客增紀其事也彥舉給事黃門二年卽乞骸骨歸時臣僚自陳者多被譴斥彥舉以恭慎得歸當時以爲難彥舉舟次匡廬寄同朝諸公詩云天上鶴鸞選接武江邊鷗鷺已忘機他年行部如相問秋水蘆花是釣磯以高季迪諸人視之有幸有不幸矣

應制賜宋承旨馬

聖明天子齊唐虞四方混一同車書大宛西域總臣附萬馬入貢皆名駒天閑十二森成列牝牡驪黃色俱別羅帕輕籠錦作韉絲韁穩鞚金爲勒玉堂學士眞老臣日日趨朝赴紫宸承恩特賜飛黃馬騎出通衢不動塵飛黃之精眞天駒四足騰驤若星駛況拜親題御製詩奎壁垂芒照人世須知君恩如海深臣騎黃馬當赤心風雲會遇有如此彤筆宜書煥古今

田按洪武九年拜宋濂爲翰林學士承旨。濂子璣爲中書舍人。孫慎爲儀禮序班。太祖時訓誡之。笑語濂曰。卿爲朕教太子諸王。朕爲卿教子孫。以濂行步艱。詔太子選良馬以賜。親灑宸翰作馬歌。並詔諸臣和之。考功監令華克勤詩云。黃馬大宛種。權奇骨不凡。天子賞其駿。象在十二閑。勅賜詞林老承旨。太僕牽來玉墀裏。霜蹏蹴踏風颿翻。錦鞍新翦千花麗。老臣有子兼有孫。同時出入黃金門。白頭趨朝戴星起。子孫扶持來謝恩。聖朝行賞不濫施。勳臣乃賜龍媒騎。儒冠一人乃如此。稽古恒榮功在茲。給事中虞恭詩云。大明天子御天下。重譯來資混夷夏。日本之東西域西。歲歲梯航買天馬。中間一匹馴且良。鬣尾金色雙瞳方。奔騰休誇照夜白。驕嘶自是真飛黃。禁林學士老詞伯。年過六十毛髮蒼。近臣傳宣特賜此。彤廷拜舞承恩光。官柳垂絲拂寒草。奚官牽來錦鞍好。阿兒前攜孫後共。晚涼騎向東門道。西風振鬣塵不驚。家僮卻訝朝回早。彥舉臣騎黃馬當赤心。句。特爲太祖所賞。賜鈔一錠。

### 午日呈鄭久誠參政

百頃芙蓉罨畫船。賀家湖上水連天。金盤送果沈冰碗。羅扇題詩散舞筵。往事氛埃成遠夢。佳辰風雨憶華年。澗蒲九節根如玉。服食于今笑學仙。

### 江行

江水悠悠行路長。孤鴻嘯月有微霜。十年蹤迹渾無定。莫使逢人問故鄉。

### 李德四首

德字仲修。番禺人。洪武初。用薦授洛陽典史。遷濟南府經歷。改西安。自陳願就教職。授漢陽教諭。

改義甯學官有易菴集

田按仲修歷官洛陽濟南西安自陳不能吏願就教官得漢陽教諭秩滿改廣西義甯教官黃才伯廣州人物傳云仲修任義甯縣學孜孜勤諭科貢漸盛此正學官之職而列朝詩集詩綜均云仲修官義甯知縣誤矣仲修詩長於古體短篇音節流美長篇則才力較弱不奈多吟耳

青樓曲

青樓春酣鸚鵡杯。孔雀屏風錦繡開。銀鸞玉鳳嬌未歇。楊柳斜飛舞迴雪。越娘含醉弄絲桐。十織宛恨哀絲中。裁成白雪惱芳容。長卿茂陵髮如蓬。

房中曲

金井烏啼風撼撼。桂樹團團江月白。洞房秋思滿嬌娥。淚滴珊瑚眠不得。玉臺塵鑑少光輝。彷彿孤鸞彩翼垂。蓮枯蕙折無人惜。露溼綺疏生網絲。

秋情

蠟炬搖紅紗隙凍。沈香帳底鴛鴦夢。芙蓉波冷薄霜凝。一夜離鸞憶單鳳。梧桐金井曙曉鴉。夢郎封侯歸妾家。開門自掃枇杷花。

送友人

關雲櫛櫛吹沙黃。瑤華拂劍春風香。鵝黃淺泛玻璃光。越妓舞衫金縷長。江津白白黃灣月。神魚撇波龜甲裂。湘娥凝綠染春衣。踏踏青雲郎馬歸。

趙介一首

介字伯貞。番禺人。洪武中。坐家累。逮赴京。道卒。有臨清集。

田按伯貞閉戶讀書。無仕進意。時有南海李韓字或華。與伯貞齊名。或華有集名夷白。伯貞集名臨清。黃庸之贈二人詩云。夷白抗浮雲。臨清延素賞。何因儂芳躅。一邱同偃仰。深致推挹。夷白集不傳。附見其姓字於此。

南樓對月

夜上南樓看月色。水晶簾捲銀河碧。冰輪倒射滄波寒。對此清光是何夕。舉酒邀月真吾儔。夜長不用秉燭遊。萬里涼風滿襟袖。洞庭七澤涵清秋。秋聲冷拂珊瑚樹。湘娥鼓瑟鮫人語。試吹玉管過行雲。曲中彷彿霓裳舞。霓裳舞罷迴明璫。北斗已挂西山傍。但願清尊長對月。今人古人何足傷。





# 明詩紀事卷十

## 甲籤

林鴻十八首

鴻字子羽。福清人。洪武初。以薦授將樂訓導。擢禮部員外郎。有鳴盛集四卷。

藝苑卮言。浦長源。林子羽。如小乘法中作論師。生天則可。成佛甚遙。

詩藪。子羽諸體皆工。五言律尤勝。合處置唐錢。劉。不復辨別。七言律如珠林積雪。明山殿。玉澗飛流帶苑牆。諸天日月環龍袞。九城山河拱象筵。兩經雁宕千峯雪。定入峨眉半夜鐘。雲邊夜火懸沙驛。海上寒山出郡樓。皆氣色高華。風骨遒爽。

國雅。林員外才思藻麗。如遊魚潛水。翔鷹薄天。高下各適性情。廬陵劉子高序其集云。已窺陳拾遺之奧。大有開元之風。余所選五言全佳者。如芙蓉峯。出塞送高郎中。讀書臺。其句有苦霧沈旗影。飛霜溼鼓聲。似戰餘落日黃。軍敗鼓聲死。又燈影秋雲。裏。書聲晚磬中。似塔影挂青漢。鐘聲扣白雲。並稱警絕。信不在大歷下也。

陳衍樓上老舌。子羽詩文。一洗元人纖弱之習。爲開國宗派第一。萬歷初。袁太守景從。馬參軍用船。同選十才子詩。雖復精勤。不無罅漏。如人分滄海色。江轉白雲痕。山鐘知寺遠。海月憶家貧。落日扁舟去。秋風萬里心。重關逢雪度。走馬見星移。蜀樹侵吳近。淮流入海長。古柳垂青蔓。沙河急暮流。三軍隨虎竹。萬里度龍沙。古戍冰成壘。春遑雪作花。谿橋寒吐月。驛樹晚藏煙。關雲遮越斷。海雨入吳深。皆五言佳境。何以去之。又七言如雲邊夜犬鳴沙驛。海上寒山出郡城。殘煙野戍聞寒笛。落日楓林見

驛梅南粵雲來蝶。渚北東甌天接虎門蒼。蘇小門前人散後。瀟陵橋上燕來時。江田未熟晴蕪曉。館樹新涼夕鳥嘯。淮南落木南天盡。江上寒雲北雁飛。寒山月落青楓晚。野戍霜空白雁晴。疎砧舊館空江上。遠火人家積雨中。亂山背小孤城晚。獨樹臨關一葉秋。如此蒼辣警策。亦在所刪。何也。

少洲詩話。林鴻寓郡城。洪武中。薦授訓導。起拜膳部員外郎。嘗爲僧吟白蓮云。淡月瑤池夜。微風太華陰。翠翻擎露蓋。玉冷墜波聲。一洗有爲法。應同不染身。誰能招惠遠。結社向東林。又贈行腳僧詩云。朝衝暮復嵩。那識白雲蹤。度磧逢馴象。浮河抗毒龍。衲經何限雪。山過幾多峯。年老無筋力。方懷故院松。閩當國初。詩法尙沿宋元之故。至鴻始以唐人音調。倡鳴鄉黨。遂爲一時風雅之宗。

朱彝尊曝書亭集。閩中善詩者數十才子。鴻爲之冠。十才子者。閩鄭定。侯官王褒。唐泰。長樂高櫟。王恭。陳亮。永福王偁。及鴻弟子周玄。黃玄。鴻之論詩。大指謂漢魏骨氣雖雄。而菁華不足。晉祖玄虛。宋尙條暢。但務菁華少秋實。惟唐作者。可謂大成。然貞觀尙習故陋。神龍漸變常調。開元天寶間。聲律大備。學者當以是爲楷式。閩人言詩者。率本之鴻。

明詩別裁。閩中詩派。以子羽爲首。宗法唐人。繩趨尺步。衆論以唐臨晉帖少之。然終是正派。

田按子羽詩。以盛唐爲宗。諸體并工。論者謂晉安一派。有詩必律。有律必七言。引爲口實。亦蹈襲者之過也。劉子高序鳴盛集云。子羽詩若殷璠所論。神來氣來情來者。莫不兼備。天姿卓絕。心會神融。子高詩流。其言亦可爲定論矣。

無諸釣龍臺懷古

甌閩古夷服。無諸漢英雄。秦鹿旣已死。卻辭隆準翁。組練照海色。旌旗來故宮。赫矣茅土業。大哉開闢功。事往滄海變。龍飛伯圖空。昔日釣龍臺。空餘江水中。桂殿苔色古。空陵雲氣紅。朝夕卷寒潮。隱隱聞雷風。

登臨畢餘景。感嘆無終窮。

同諸生登絳月蘭若

金人青蓮宇。乃在白雲裏。久與名僧期。乘間卻來此。入門聞經梵。絳壁見巾履。落磻泉影紅。侵廊薜花紫。海天正南豁。一望見千里。獨樹川上浮。孤煙島邊起。子生況多暇。所性樂山水。眞賞非外求。冥心巢居子。

鐔上送僧歸衡山

上人孤閑似雲鶴。十五出家住衡岳。說法能超最上禪。持心不受羣疑縛。世上誰知來去蹤。南窺太華北遊嵩。衲經雁蕩千峯雪。定入峨眉半夜鐘。于今戒臘青松古。猶泛慈航到東土。楊柳舟中九曲雲。筍皮笠上三山雨。昨夜歸心繞楚天。西風杖錫又茫然。化龍潭畔清秋別。回雁峯頭舊日禪。

寄王六校文兼似吳二太守

京師二月春雪飛。雪後餘寒添著衣。曹官祿薄酒苦貴。一飲百錢恆不醉。忽然停杯憶鄉里。美髯校文最知己。作詩判不讓高岑。醉後狂吟狂欲死。有時忽得意。竟上金雞山。彈琴酌酒送飛鳥。心比白雲閒更閒。虎頭巖前柳拖地。龍池溪上花滿灣。醉歸騎得將軍馬。城上烏棲門未關。白頭太守別來久。別後還能相憶否。詞賦終爲紙上塵。功名不及杯中酒。芭蕉葉長近何如。前日人來不寄書。莫言閩海少飛雁。何事秦淮多鯉魚。

義象行

有象有象來大都。大江欲渡心咨且。誘之既渡獻天子。拜跪不與衆象俱。象奴勸之拜。怒鼻觸象奴。賜酒不肯飲。哺之亦不鋪。屹然十日受饑渴。俛首垂淚憤且吁。天子命殺之。衆官束手不敢屠。侍衛傳宣呼壯士。披甲各執丈二戈。象戰久不克。兵捷象乃殂。憶昔君王每巡幸。象當法駕行天衢。珊瑚錯落明月珠。被服美錦紅氍毹。紫泥函封載玉璽。萬樂爭擁羣龍趨。玉璽歸沙漠。龍亦歸鼎湖。所以老象心。南來誓死骨爲枯。嗟爾食祿人。空負七尺軀。高高白玉堂。赫赫黃金符。伊昔軒冕今泥塗。嗟爾食祿人。不若飯豆芻。象何潔。爾何污。天子垂衣治萬世。俾全象德行天誅。嗚呼象兮古所無。嗚呼象兮古所無。

王圻稗史彙編。唐有舞馬。祿山使舞不就而戮之。昭宗時有援。賜以緋衣。謂之猴部頭。朱溫既篡。引坐側。援急擲號裂衣。溫叱殺之。此世皆知也。若宋亡崖山時。有白鷗。見幼主崩。哀鳴躑躅。竟墜水死。元有駕象。太祖登極。不肯拜跪。竟死。及下。國初林子羽有義象行。

出塞曲

驪馬畫弰弓。生爲北塞雄。探兵千里外。捉騎萬人中。虎帳秋懸月。龍旗莫颭風。歸來領旌節。立在未央宮。十五薊門行。能探點虜情。潛兵秋度磧。牧馬夜歸營。苦霧沈旗影。飛霜溼鼓聲。昨來承密詔。東築受降城。送殷秀才之武功

送君遠行役。覲省入西秦。五月臺江水。孤舟去國人。蒼山低戍壘。野日暗行塵。無限同遊意。分攜淚滿巾。  
方廣巖記遊

懸巖太古色。恍若入鴻濛。一徑攀躋盡。諸天杳靄中。雲歸山殿冷。月出水簾空。靜境離言說。泠泠松桂風。  
王屋山天壇

名嶽推王屋。孤標跨杳冥。深窺砥柱黑。高並太行青。分野連三晉。風雲萃百靈。鶴歸松已偃。龍去水猶腥。  
竈隱燒丹火。龕餘煉髓經。羽人金磬動。應此禮寒星。

春日遊東苑應制

長樂鐘鳴玉殿開。千官步輦出蓬萊。已教旭日催龍馭。更借春流泛羽杯。隄柳欲眠鶯喚起。宮花乍落鳥  
銜來。宸遊好續簫韶奏。京國于今有鳳臺。

龍堂詩話。林子羽鳴盛集。專學唐宣德間。有晏鐸者。選本朝詩。亦名鳴盛詩集。其第一首。林子羽應制曰。隄柳欲眠鶯喚起。宮  
花乍落鳥銜來。蓋非林最得意者。則其他所選可知。

田按孝陵臨軒。試子羽龍池春曉。孤雁二詩。一日名動京師。其應制諸作。若隄柳一聯。終是唐人名句。不得以西涯之論抑之  
也。

九日登絳月蘭若憶鄭二宣

微霜初下越王城。衰病逢秋也自輕。九日登臨多縱飲。百年感慨獨鍾情。斷蟬野寺黃花晚。遠樹江天白

雁晴。卻憶浮邱炎海上。懶題詩句寄同聲。

賦得垂楊送客

客路垂楊最有情。煖風吹綠漸冥冥。雨深煬帝宮前見。月落桓伊笛裏聽。葉暗乍堪藏乳燕。花飛終恨化浮萍。分攜欲折長條贈。愁絕河橋酒幔青。

憶浮邱生往交州

旬日陰霖結不開。窮居幽草亂侵階。也知白髮緣愁長。無那青山與願乖。行阻看花攜濁酒。臥聞號鳥閉虛齋。比來況與浮邱別。一望南山一愴懷。

將歸冶城留別陳八炫林六敏

南宮歸後歲蹉跎。此日逢君奈別何。野館解鞍行客飯。寒山對酒故人歌。蒹葭水國孤鴻度。橘柚霜林正馬過。爲報已無軒冕夢。清冷臺下臥煙蘿。

登釣龍臺

逐鹿屠龍事渺茫。空臺依舊枕山岡。衣冠神禹傳苗裔。風壤宗周列職方。南粵雲來螺渚白。東甌天接虎門蒼。登臨送別兼懷古。不惜狂吟倒玉觴。

登岳陽樓

湖水平臨夔子國。岳陽絕勝濯龍宮。樓臺迴出丹霄上。島峙浮來玉鏡中。墨客琴尊猶對月。榜人舟楫若乘空。青蘋風起還能賦。不獨蘭臺宋玉工。

題吳江垂虹橋

雲帆秋晚過垂虹。落日鯨波動遠風。欲借仙家遼海鶴。月明吹笛水晶宮。

王恭二十首

恭字安中。自號皆山樵者。閩縣人。永樂初。以儒士薦修大典。授翰林典籍。有白雲樵唱。鳳臺清嘯。草澤狂歌。

四庫總目。恭吐菁清拔。不染塵俗。得大歷十子之遺意。閩書。王安中寓居長樂。採樵行歌。自號皆山樵者。文廟時。修永樂大典。鄭定高廷禮。交薦之。強起至京。年六十餘矣。同郡王傅戲謂曰。君無以會稽章綬故來耶。恭答曰。山中斧柯。幸自無恙。大典成。試詩高第。授翰林典籍。不就。歸益徜徉邱壑。足迹殆徧。有詩數十卷。廬陵解縉稱其布衣蕭然。不慕榮寵。強起決去。若朝陽孤鳳。

國雅。王安中思多悽怨。託喻頗深。如寒下云。嘶馬邊塵黑。鳴笳隴日昏。昭君云。身隨胡地遠。心是漢宮愁。寒村云。古路無行客。閒門有白雲。鷓鴣云。長沙有遷客。莫向雨中嘯。老馬云。只今棄擲寒郊路。猶自悲鳴向主人。讀此例數篇。俱堪淚下。

徐渤閩畫記。趙景哲工水墨山水。師法二米。王恭題其畫云。濡毫不見米南宮。墨客猶傳寶晉風。應有離情何處著。盡隨殘雨上青楓。可以知其風旨矣。

田按安中詩亦是唐調。設色選聲。妙極鑄匠。與王虛舟可抗行。二人品次在子羽之下。漫士之上。安中以六十出山。旋投牒歸。其詠白頭翁云。竹下棠梨花漸稀。白頭相對語依依。五陵年少多金彈。莫戀殘春忘卻飛。可謂善於自喻矣。

虛白子水墨圖爲陳思孝題

開圖見嵩少。妙趣忽已領。濛濛花源陰。窈窕多靈境。石洞闕苔紋。天窗逗雲影。迎秋鷗冠涼。先雪荷衣冷。長夜何所聞。龍鳴在西頂。

松石峯天王寺

炎暑不可度。端居日方永。同袍四五人。共愛山中靜。飛閣軼氛埃。叢林逗蘿徑。潭靜氣已秋。竹深午猶暝。初沿雙溪轉。稍入空中境。婉婉林鳥聲。悠悠野僧定。平生好幽玩。盡日愜佳興。山水發清機。風泉澹初性。日夕徐徐歸。雲間響孤磬。

舟經彭蠡

揚帆過彭蠡。遠見匡廬色。瀑布天上來。芙蓉望中碧。東林鐘磬遠。沾酒潯陽夕。楓林忽鳴猿。淒然念鄉國。

妾薄命

玉釵墮地無全股。雙鳳蟠龍兩飛去。雖藏匣底終棄捐。欲賣傍人不直錢。轆轤宛轉黃金井。手挽銅鉞繫。纖綆誰知綆斷鉞墮泉。千尺深沈不見影。銅鉞墮泉釵墮地。君心何得生離異。



送張少府朝覲

閩州少尹家何處。夢裏青山溧陽樹。訟庭無事獨哦松。走馬金陵看花去。青繩御路連青天。五陵俠少黃金鞭。紅橋青幔多買醉。少尹囊中無酒錢。朝回道過鄉山口。春風又發秦淮柳。溧水芹邊二校文。相逢爲問平安否。

送陳景明遊浯水便登方廣巖

閩山西來多法園。溪西一道通仙源。靈花貝葉紛相映。道林鑿齒皆清言。瑤巖二月霜花積。千丈垂蘿裊煙碧。水簾風捲半空寒。石室雲來萬山白。真僧不見賓頭盧。片月孤峯色相耀。六時天樂聞鐘磬。百尺風潭寫畫圖。仙舟此別饒佳趣。豈學悠悠尙平去。林僧定掃壁間苔。山人況有驚人句。

塞下曲

鏡騎向邊州。行隨定遠侯。戰餘關月冷。兵盡虜塵秋。萬骨填沙草。孤魂集戍樓。惟餘忠憤在。須獻月支頭。

夏夜曲

初月照迴廊。鳴璫出洞房。竹清殘暑氣。荷汎小池香。雪腕宮羅潤。雲鬢夜月涼。庭前有梧葉。早晚落銀牀。

題黃聲玉環清樓

樓虛千嶂合。水木澹清華。積雨仙源白。歸雲鳥道斜。褰衣凌野翠。捲幔拂秋霞。想見橫經夕。蒼藤落數花。

題無諸廟壁

野廟大江干。蕭蕭樹色寒。斷碑荒草沒。畫壁古苔乾。龍去春潮在。猿鳴海月殘。英雄那可問。東逝正漫漫。

吳城懷古

姑蘇城下刺蘭橈。卻憶吳王古市朝。香輦路邊春寂寂。館娃宮外草蕭蕭。千年往事空嗚鳥。半夜疎鐘自落潮。明發不堪回首處。暝煙秋雨過楓橋。

賦得白雁送人之金陵

燕山榆葉望秋稀。雪羽瀟瀟向楚微。夜雨蘆花看不定。夕陽楓樹見初飛。影隨漢騎營邊落。夢遶胡兒夢裏歸。君別石城霜漸冷。暮雲聲斷欲沾衣。

靜志居詩話。袁景文以白燕詩得名。然如月明湘水初無影。雪滿梁園尙未歸。翻不若琴川時大本之珠簾十二中間卷。玉翦一雙高下飛也。顧光遠以白雁詩得名。然如錦瑟夜調冰作柱。玉關曉度雪侵衣。亦不若王安中之夜雨蘆花看不定。夕陽楓樹見初飛也。

賦得寺殘僧

古寺蕭條絕四鄰。寺前松柏幾回春。月明下界猶聞磬。年老荒山少見人。貝葉舊聽雙樹法。衲衣孤坐兩朝身。秋風已爛蒲團草。悟得西來意自真。

竹裏軒

露葉凝曉煙。霜枝老苔石。夜半獨行時。清涼滿巾舄。

苔

要路何曾著。間門積漸多。五陵松柏外。隨雨上盤陀。

秋獵

獵馬向風飛。瑠弓白錦衣。平明射鵬去。日暮五陵歸。

俠客

弓騎獵平原。春衣污酒痕。經過無舊主。苔閉孟嘗門。

衰柳

西風昨夜灞陵秋。千樹蕭條帶驛樓。莫道離人空有恨。暮蟬寒雀也關愁。

題畫

放鶴亭邊月影涼。六橋行處見微霜。瘦筇不過錢塘水。只對梅花嗅冷香。

書王孫射雁圖

錦袍朱帽綠弓弦。卻射飛鴻灞水邊。不識柳林關外路。白狼黃鼠滿秋田。

王侁三十二首

侁字孟揚。其先東阿人。父翰。流寓閩中。著籍永福。洪武庚午舉人。永樂初徵爲國史檢討。充大典總裁。出參英國公張輔軍。坐解縉黨。下獄死。有虛舟集五卷。

劉昌懸笥瑣探。吉水解學士縉。天質甚美。爲文不屬草。頃刻數千言不難。一時才名甚讓。時杭有王洪希範。吳有王璠汝玉。閩有王侁孟揚。常有王達達善。皆官翰林。四人者。詞翰流麗。孟揚常謂希範曰。解學士名聞海內。吾四人者。足以撐柱東南半壁。識者謂爲知言。

國雅。王翰檢孟揚。典雅清拔。綽有天寶俊聲。如諸天花雨遍。雙樹慧燈懸。夜月桓伊笛。秋風驟騎營。孤帆乘吹發。一雁渡江遲。江路援聲早。山城榕葉涼。一燈今夜雨。千里故人心。並是司空、皇甫之餘。

王兆雲詞林人物考。孟揚軀節高勁。議論英發。文章偉博。書法迥妙。學士解大縉嘗稱其人品在蘇長公之列。田按孟揚安中才藻略同。孟揚以跌宕馳才。安中以雅麗著美。孟揚古詩。規撫陳黃門。李翰林。在唐調中。特爲高格。

感寓

團魄載陽燄。終古無虧盈。因人示朏朏。側見死與生。蟾蜍薄陰采。顧兔潛其形。何當凌倒景。一覩天地精。太白夜食昴。流輝燭天街。精感動穹漠。君心甯見懷。白璧忌暗投。徒使按劍猜。所以狂接輿。鳳歌歸去來。嬴皇虢威武。漢帝非仙才。玄關祕靈府。何處求蓬萊。終遣鑄池壁。空獻瑤池杯。但見三泉下。寶衣變寒灰。大庭昔酣醉。遺此鈞天章。遂令鶉首墟。虎視吞八荒。嬴基苦莫敦。所恃逾兇狂。詭命終見奪。百二空蒼涼。

玉麗不盈把。德輝照四隣。段生日偃臥。迺能蕃衛君。澆風薄士節。自碎明月珍。求蟬貴明火。俛仰懷古人。直木忌先伐。甘井忌先竭。何爲抱區區。照如揭日月。至人善閉關。埋照慎不發。入獸不亂羣。虛舟任超越。襄楚迷帝軒。汾陽枉堯轍。棲心玄靈臺。可與世人絕。

尋小雄仙崑二龍潭值風雨歸草堂作

昔人洗玉髓。幽洞驅龍耕。丹成輟瑤耒。成此秋水泓。飛崖夾兩鏡。洞見雲霞生。百鬼不敢嘖。雌雄常夜鳴。有時湍瀨寒。幾曲流瑤英。清秋墮蟾影。白日聞雷聲。偶茲訪靈奇。掃石窺清泠。洗心盟鷗鷺。濯髮解冠纓。長風動懸蘿。颯爽毛骨驚。飛雨洒而至。萬壑松冥冥。歸途檉桂影。了了心目醒。到家興未已。石室披丹經。

秋夜齋居懷唐秦

高梧月未出。暝色疎煙裏。雌雝鳴雁來。聲在秋塘水。孤燈捲簾坐。寒影對窗几。青空吹微霜。瑟瑟動輕葦。援琴不成音。感別在千里。誰值晨風翰。淮波盼遊鯉。

龍寺寒泉

靈源沁寒泉。空在翠微頂。中有修鱗蟠。白日煙雨暝。小僧習止觀。木客照孤影。予亦洗心人。坐來白雲冷。

舟中望匡廬

茲山東南美。植立雲霞中。九疊縈秀色。萬古青茸茸。我懷志靈奇。絳帆喜相逢。林端望飛瀑。天際數雲峯。

香爐紫煙滅。玉鏡澄湖空。飛翠落巾袖。毛髮疏天風。顧此逐行役。無由訪仙縱。長詠遠公傳。坐憶東林鐘。  
宿湧泉寺  
翠微白雲裏。逢秋思一登。聳身躡雲壁。飛泉搖古藤。洞闊海天際。坐見萬境澄。飲澗動羣鹿。宴坐逢真僧。  
邀我宿化城。珠林懸古燈。寥寥片月上。悄悄天籟凝。因愁向城市。塵髮秋相仍。

長歌行

有淚莫泣鮫人珠。有足莫獻荆山玉。赤心徒使按劍猜。至寶翻令笑魚目。千金蹈海稱達人。五噫出關西去秦。負芻不復遇知己。空歌白石南山春。楚卿棄相復何有。於陵甘作灌園叟。雜縣偶集魯東門。惆悵胡能事杯酒。長風蕭騷百草殘。長缺悲歌涕沆瀾。金臺駿骨久已化。瑤水風波不可攀。畏途羊腸能折軸。絨書爲謝雲中鵠。海上三花久負期。醉歸漫託平原宿。

寄答黃伯亨

戎馬從東來。君車正西去。有似風吹海上雲。天際無心忽相遇。與君相遇卽相知。瀝膽輸肝無復疑。虞卿豈顧雙白璧。平原輕擲二美姬。狂歌一斗酒。共醉六屏月。拂曙登古臺。慷慨與君別。君行五嶺南。我阻三山道。何處我思君。天涯但芳草。昨朝鴻雁下。江煙銜得君書置我前。開緘拂冰雪。千里情洒然。念昔與君多意氣。相期豈作桃李妍。驥生立堂下。叔向知其賢。袁宏發朗咏。謝公遂迴船。丈夫一語苟有合。何必結

交窮歲年。我有古干將。鏽澁久棄捐。甯甘困泥滓。恥爲兒女憐。君有長歌向余寫。我有古調爲君宣。月明洞口鳴風泉。清商一曲付哀絃。雲山麋鹿可爲侶。紛紛薄俗何其偏。

### 怨歌行

絃奏鈞天素娥之寶瑟。酒斟流霞碧海之瓊杯。宿君七寶流蘇之錦帳。坐我九成白玉之仙臺。臺高帳煖春寒薄。金縷輕身掌中托。結成比翼天上期。不羨連枝世間樂。參差雙鳳裁筠管。不謂年華有凋換。楚園未泣章華魚。漢宮忍聽長門雁。長門蕭條秋影稀。粉屏珠綴流螢飛。苔生舞席塵蒙鏡。空傍閒階尋履綦。宛宛青陽日將暮。惆悵君恩棄中路。妾心如月君不知。斜倚雲和雙淚垂。

### 凌歊臺懷古

朝發石頭渚。暮宿黃山道。攜酒眺古臺。離離但煙草。憶昔茲臺何壯哉。宋主離宮臺上開。臺前寶樹入層漢。臺下炎歊隘九垓。三千歌舞宿雲端。公子王孫往復還。秦關捷書不再返。鼎湖飛龍誰復攀。繁華一旦乃如此。寂寂荒臺秋色裏。往事徒悲禾黍場。殘碑半墮滄江水。滄江水流去不迴。空陵劫火變寒灰。欲將霸業問行路。黃山落日清猿哀。

### 蒼梧道中

驅車九疑道。獨鳥東南飛。看山不覺遠。秋雲生我衣。深谷走羣籟。半岑明夕暉。中林有蘭茝。薄暮空芳菲。

送沙子進赴祿州別駕

客舍酒初香。都門柳色黃。一官仍別駕。萬里赴炎荒。江路猿聲早。山城榕葉涼。遠人勞撫字。且勿厭殊方。

送趙友同還華亭時水泛三吳

積水渺無際。送君江上還。九峯何處所。迢遞白雲間。舊業菱荷在。秋風鷗鷺閒。定知三泖月。相見一開顏。

塞上曲

逐虜金微道。一上單于臺。關門秋色斷。羌笛夜聲哀。少婦龍沙夢。長安鶴使迴。祇今青海月。流影碧天來。

題米老山水

海嶽菴前覓舊蹤。蒼茫雲樹米南宮。別來幾片青山影。都付寒鷗一笛風。

登月江樓

朝來一上月江樓。江雨長涵瘴水流。望斷釣槎人已遠。青山點點是邕州。

交州卽事

一騎衝寒到市橋。夕陽煙樹草蕭蕭。居人猶指高駢塔。碧瓦朱臺尙未凋。

高廷禮十首

廷禮初名棟。字彥恢。長樂人。永樂初。以布衣召入翰林爲待詔。遷典籍。有嘯臺集二十卷。木天清



# 氣集十四卷。

詩蔽高廷禮擬早朝大明宮及送王季二少府詩如旄旗半捲天河落。閩闔平分曙色來。清川雨散巴山出。大澤天寒楚樹微。殊有唐風。

國雅高廷禮才識博達。嘗輯唐詩品彙。世稱精鑿。及閱其集。文多而意少。且乏新興。至擬古諸作。頗擅雕蟲。往往青於藍者。畫史會要。高典籍畫。原於米南宮父子。出入商高間。方壺子畫妙。貞一初識先生。稱賞不置。曰。異時當爲名家。在翰林二十年。四方求詩畫者。略無虛日。

閩書林真士。長樂人。工山水。與高樸友善。樸題真士畫云。楚天雲外數峯青。春水桃花滿洞庭。落日樓臺明鏡裏。欲停瑤瑟候湘靈。

列朝詩集。漫士流傳驚詠。毋慮千餘篇。選唐詩品彙九十卷。拾遺十卷。議者服其精博。書得漢隸筆法。畫出來南宮父子。時稱三絕。門人林誌志其墓曰。詩至唐爲極盛。宋失之理趣。元滯於學識。而不知由悟以入。自襄城楊士宏始編唐音。正始遺響。然知之者尙鮮。閩三山林膳部鴻。獨倡鳴唐詩。其徒黃元。周元繼之。先生與皆山王恭。起長樂。顏頴齊名。至今閩中詩人推五人。而殘膏賸馥。沾溉者多。林之論閩詩派。可謂悉矣。推閩之詩派。稱三唐而祧宋元。若西江之宗杜陵也。然與否耶。膳部之學唐詩。摹其色象。按其音節。庶幾似之矣。其所以不及唐人者。正以其摹仿形似。而不知由悟以入也。神秀呈黃梅。謂依此修行。免墮惡道。昔人亦謂日撫蘭亭一紙。終不成書。自閩詩一派。盛行永天之際。六十餘載。柔音漫節。卑靡成風。風雅道衰。誰職其咎。自時厥後。弘正之衣冠老杜。嘉隆之嘖笑盛唐。傳變滋多。受病則一。反本表微。不能不深望於後之君子矣。漫士所謂嘖壘集者。其山居擬唐之作。音節可觀。神理未足。時出俊語。錚錚自賞。木天集應酬冗長。塵壘堆積。漫士既以詩遇。出山之後。遂無片什可傳。所謂不復能歌涓城者乎。

香祖筆記。宋元論唐詩。不甚分初盛中晚。故三體鼓吹等集。率詳中晚而略初盛。覽之憤憤。楊仲宏唐音。始稍區別。有正音。有餘響。然猶未暢其說。間有舛謬。迨高廷禮品彙出。而所謂正始正宗。大家名家。羽翼接武。正變餘響。皆井然矣。獨七言古詩。以李太白爲正宗。杜子美爲大家。王摩詰。高逵夫。李東川。爲名家。則非是。三家者。皆當爲正宗。李杜均之爲大家。岑嘉州而下。爲名家。則確然不可易矣。

朱琰明人詩抄正集。漫士詩。俞汝言謂歌行尤勝。殊不然。其最佳者五言短古。高處直逼韋柳。

田按漫士選唐詩。自是雅裁。明時如楊升菴。謝在杭。已有異議。要是小疵。不害其爲佳選也。詩斷自唐以上。前後七子。亦隱宗之。其所異者。七子探源漢魏。十子株守唐一代耳。

將歸龍門留別冶城諸遊好

海水與別意。相看更誰深。長風向東來。吹我東歸心。悵然舊山雲。蒼茫遠洲樹。一雁飛晴空。翩翩又東去。此別非萬里。後遊當幾時。銜杯不盡歡。握手翻成悲。我去聽寒泉。君留釣臺月。唯有長相思。因之奇天末。遊龍峯西巖得傍字

巖下春已深。客心自茲曠。玩奇不知遙。青山鬱相向。溪聲送行客。空翠引寒杖。洞門倚天開。苔磴緣雲上。松際真境豁。石林爭異狀。稍知仙趣深。孰謂此身妄。東厓極眺聽。晚色分遠望。雙境落澄湖。孤帆入溟漲。瀟然微雨來。爽氣橫疊嶂。笑揮青霞杯。醉和白雲倡。茲賞吾道存。良遊保開放。願割區中緣。煙霞許相傍。郭晦之歸辰峯羣公相送至光嚴寺分得客字

化城負東郭。地古嚴公宅。同佩結幽尋。況值將歸客。山門坐翠微。蘿逕入松柏。定水駐行衣。香雲繞離席。銜杯雙樹間。百里見海色。日暮各分飛。空山夜寥寂。

同遊六平山探得燭字

出郭秋已深。寒原騁心目。愛君幽棲地。市廛若林谷。初月諧晚尋。同人遂成宿。樓虛在山翠。書聲向橋木。飛雨一峯來。微雲度疏竹。清鐙對殘尊。孤琴寫幽曲。自得靜者心。何須遊秉燭。

嶠嶼春潮

瀛洲見海色。潮來如風雨。初日照寒濤。春聲在孤嶼。飛帆落鏡中。望入桃花去。

衡江夕露

大江白露下。秋氣橫滄浪。夜色不映水。微風忽吹裳。孤舟待明月。時聞蘭杜香。

柏林明阜林高隱

小隱溪壑古。松風引涼陰。片雲對虛牖。曉日明疎林。百里見海色。孤光霽人心。悠悠塵外意。寄韻邱中琴。

得鄭二宜海南手札

番禺天外古交州。念子南行戀舊遊。故國又經花落後。遠書翻寄雁來秋。梅邊野飯逢人少。海上青山對客愁。爲報羅浮雲影道。早隨明月引歸舟。

夏谷雲泉

雲影蕩山翠。泉聲亂溪湍。長林無六月。蘿薜生秋寒。

秋山釣瀨

萬壑收夕霏。一溪湛秋影。涼風吹釣絲。嫋嫋空波冷。

陳亮二首

亮字景明。長樂人。明初累徵不起。有儲玉齋集。

黃日紀全閩詩雋。景明故元儒。生洪武永樂間。累徵遺逸。或推轂景明。景明曰。吾投迹明時。遊戲泉石間。吾志懶矣。竟不出。作讀陳搏傳詩以見志。山中爲小樓。號曰儲玉。購四方名書藏之。又作草屋滄州中。與名士王恭。高棅。日相過從。以詩酒爲樂。時往三山中。爲九老社。以此終。

龜峯

疇昔過茲鄉。駐馬望龜石。蹉跎兩鬢華。始作登臨客。浮雲散輕陰。霧日見海色。向來多豪傑。聲譽何藉藉。良辰作佳遊。此地幾登歷。我來一感慨。俯視今非昔。落日松風生。遲回景已夕。

晚春閒思

門巷客來稀。閒居靜掩扉。微風花自落。細雨燕雙飛。向曉披遺帙。迎暄換袷衣。年年此時節。惆悵送春歸。

鄭定二首

定字孟宣。閩縣人。陳友定辟爲記室。友定敗。浮海亡交廣間。尋還居長樂。洪武中。徵爲延平訓導。歷齊府紀善。終國子助教。有澹齋集。

高郵女兒歌

高郵湖水清且幽。高郵女兒能盪舟。十八梳粧好高髻。二十嫁夫長遠遊。青菱鏡破寶釵折。翡翠衾寒疊香雪。芳草王孫去不歸。蟪蛄嘒斷秦樓月。樓前楊柳飛絮多。門外蛛絲成網羅。高郵湖水增夕波。高郵女兒將奈何。

再往三山

去歲才從上海還。今年又復戴南冠。榕陰巷陌春風老。荔子樓臺宿雨乾。幾處舊遊重載酒。十年往事一憑欄。回頭卻羨天台道。有客吹簫跨玉鸞。

王褒二首

褒字中美。閩縣人。洪武癸酉舉人。歷瑞州長沙教官。遷永豐知縣。永樂中與修大典。擢漢府紀善。有養靜集。

列朝詩集中美與孟揚、安中、齊名。其詩殊乏才情。不堪鼎足。或其佳者不傳耳。

湖南田舍

藹藹湖上山。迢迢湖上路。田家南湖濱。三五亦成聚。朝耕湖上田。暮喚湖上渡。老稚遠相迎。牛背挂農具。今年喜有秋。不爲租稅慮。牀頭釀茅柴。取醉羅粟芋。相看桑麻長。且樂成嫁娶。

送僧還莆田

都門相送處。無奈柳條長。呪引天花落。經翻貝葉香。浮杯吳水綠。飛錫海天蒼。後夜涵江月。應期到上方。

唐泰三首

泰字亨仲。閩縣人。洪武甲戌進士。授行人。終陝西副使。有善鳴集。

次陳山人隱處

獻春始休沐。輕策尋幽風。煙篠不知路。柴扉隱其中。雜花覆小圃。下映流泉紅。冥心聽喧鳥。解帶投芳叢。誰識此嘉遯。心期黃綺同。南軒有餘興。月出鳴絲桐。

寄林欽

千里一爲別。思君遠更親。雲霄心自遠。江海業長貧。古道迷黃葉。寒汀覆白蘋。秋風如有待。歸計欲垂綸。

周玄三首

玄字徵之。閩縣人。永樂中。以文學徵爲禮部員外郎。有宜秋集。

田按周微之黃玄之皆子羽詩弟子微之差優嘗挾書數千卷止長樂高棟家讀十年卒業辭去盡棄其書曰舉在吾腹笥矣  
所著揭天謠甚有時名竹垞謂二玄詩句續字澆良然余擇其篇幅貫串者錄之

### 道山清冷臺

松門媚煙景探玩輟輕策林谷諧宿懽川雲返初跡鳴絃希叔夜躡屐企安石餘花映樽俎落日散巾舄  
笑語澹忘歸重期諒超隔

### 揭天謠

魚鱗居次龍堂高琉璃砌空銀爛濤波靈泣訴海若恨腥風卷晝雲漕漕珠潭沈光瘞神嫗瘦蛟啾啾走  
沙雨仙郎秋袂斑斑嘒淚花凝碧扶桑樹

### 送曾譯使歸山中

鄰霄臺下罷登臨一曲離歌淚滿襟芳草懷人頻積夢流年遠別又驚心春城雁去餘寒盡野戍花飛暮  
雨深今日遠尋陶令尹青山臥病謝朝簪

### 黃玄二首

玄字玄之侯官人官泉州訓導

### 馬頭江

暝色入長江。江帆疾如鳥。遙遙白雲外。一望更何有。長江滄浪曲。遠映滄浪叟。何處有僧廬。殘鐘到溪口。

送金秀才之溫陵

官亭花發酒初香。白馬翩翩大道傍。醉客盡隨歌舞散。寒山空對別離長。紫雲洞裏逢秋月。赤鯉潭邊度早霜。休說故山多少恨。軍中吹角斷人腸。



